

欽定唐書

卷七十六之八十三



土岐文庫

文庫17

W202

17

十七



文庫 17
W202
17

唐書卷七十六

宋 端 明 殿 學 士 宋 祁 撰

列傳第一

后妃上

唐制皇后而有貴妃淑妃德妃賢妃是為夫人昭儀昭容昭媛脩儀脩容脩媛充儀充容充媛是為九嬪婕妤美人才人各九合二十七是代世婦寶林御女采女各二十七合八十一是代御妻自餘六尚分典乘輿服御皆有員次後世改復不常開元時以后下復有四妃非是乃置惠麗華三妃六儀四美人七才人而尚宮尚儀尚服各二參合前號大抵踵周官相損益云然則尚矣禮本夫婦詩始后妃治亂因之興亡係焉盛德之君帷薄嚴奧裏謁不忤于朝外言不內諸閭關睢之風行彤史之化脩故淑範懿行更為內助若夫豔嬖之興常在中主第禍既交則情與愛遷顏辭媚熟則事為私奪乘易昏之明牽不斷之柔險言似忠故受而不諳醜行已效反狃而為好左右附之儉王慧之狡謀鉗其悟先哀誓權於寵初天下之事已去而恬不自覺此武韋所以遂篡弒而喪王室也至於楊氏未死玄亂厥謀張后制中肅幾斂雜吁可嘆哉中葉以降時多故矣外有攻討之勤內真熾溺之私羣閹朋進外戚勢分后妃無大善惡取

乾隆四年校刊 唐書卷七十六后妃傳

昭和六年二月一日
宋祁書卷七十六
寄

010185193670

充職位而已故列著于篇

高祖大穆順聖皇后竇氏京兆平陵人父毅在周爲上柱國尙武帝姊襄陽長公主入隋爲定州總管神武公后生髮垂過頸三歲與身等讀女誡列女等傳一過輒不忘武帝愛之養宮中異它甥時突厥女爲后無寵后密諫曰吾國未靖虜且強願抑情撫接以取合從則江南關東不吾梗武帝嘉納及崩哀毀同所生聞隋高祖受禪自投牀下曰恨我非男子不能拯舅家禍殺遽掩其口曰毋妄言赤吾族常謂主曰此女有奇相且識不凡何可妄與人因畫二孔雀屏間請昏者使射二矢陰約中目則許之射者闕數十皆不合高祖最後射中各一目遂歸於帝始元貞太后羸老有疾而性素嚴諸娣皆畏莫敢侍后事之獨怡謹盡孝或淹月不釋衣履工爲篇章規誠文有雅體又善書與高祖書相雜人不辨也崩於涿郡年四十五帝在煬帝時多畜善馬后見曰上性樂此盍以獻徒留之速罪無益也不聽頃果坐譴帝後見隋政亂多妄誅殛乃爲自安計數奏鷹犬異駒煬帝果喜擢位將軍因泣謂諸子曰早用而母言得此久矣帝有天下詔卽所葬園爲壽安陵諡曰穆及祔獻陵尊爲太穆皇后始太宗生有二龍之符后於諸子中愛視最篤後卽位過慶善宮覽觀梗欬顧侍臣曰朕生於此今母后永違育我之德不可報因號慟左右皆流涕乃享后于正寢它日幸九成宮夢后若平生既悟潛然不自勝明日詔有司大發倉賑貧瘠以爲

后報焉上元中益謚太穆神皇后

太宗文德順聖皇后長孫氏河南洛陽人其先魏拓拔氏後爲宗室長因號長孫高祖禪大丞相馮翊王曾祖裕平原公祖兕左將軍父晟字季涉書史趨驚曉兵仕隋爲左驍衛將軍后喜圖傳視古善惡以自鑒矜尙禮法晟兄熾爲周通道館學士嘗聞太穆勸撫突厥女心誌之每語晟曰此明睿人必有奇子不可以不圖昏故晟以女太宗后歸寧舅高士廉妾見大馬二丈立后舍外懼占之遇坤之泰卜者曰坤順承天載物无疆馬地類也之泰是天地交而萬物通也又以輔相天地之宜絲協歸妹婦人事也女處尊位履中而居順后妃象也時隱太子賢闔已構后內盡孝事高祖謹承諸妃消釋嫌疑及帝授甲宮中后親慰勉士皆感奮尋爲皇太子妃俄爲皇后性約素服御取給則止益觀書雖容櫛不少廢與帝言或及天下事辭曰牝雞司晨家之窮也可乎帝固要之訖不對後廷有被罪者必助帝怒請繩治俟意解徐爲開治終不令有冤卡嬪生豫章公主而死后視如所生媵侍疾病輟所御飲藥資之下懷其仁兄無忌於帝本布衣交以佐命爲元功出入臥內帝將引以輔政后固謂不可乘間曰妾託體紫宮尊貴已極不願私親更據權于朝漢之呂霍可以爲誡帝不聽自用無忌爲尙書僕射后密諭令牢讓帝不獲已乃聽后喜見顏間異母兄安業無行父喪逐后無忌還外家后貴未嘗以爲言擢位將軍後與李孝常等謀反將

誅后叩頭曰安業罪死無赦然向遇妾不以慈戶知之今論如法人必謂妾釋憾於兒無乃為帝累乎遂得減流越嶠太子承乾乳媪請增東宮什器后曰太子患無德與名器何請為從幸九成宮方屬疾會柴紹等急變聞帝甲而起后與疾以從宮司諫止后曰上震驚吾何自安疾稍亟太子欲請大赦汎度道人蔽塞災會后曰死生有命非人力所支若脩福可延吾不為惡使壽無效我尙何求且赦令國大事佛老異方教耳皆上所不為豈宜以吾亂天下法太子不敢奏以告房玄齡玄齡以聞帝嗟美而羣臣請遂赦帝既許后固爭止及大漸與帝訣時玄齡小譴就第后曰玄齡久事陛下預奇計祕謀非大故願勿置也妾家以恩澤進無德而祿易以取禍無屬樞柄以外戚奉朝請足矣妾生無益於時死不可以厚葬願因山為壟無起墳無用棺槨器以瓦木約費送終是妾不見忘也又請帝納忠容諫勿受讒省遊畋作役死無恨崩年三十六后嘗采古婦人事著女則十篇又為論斥漢之馬后不能檢抑外家使與政事乃戒其車馬之侈此謂開本源恤末事常誠守者吾以自檢故書無條理勿令至尊見之及崩宮司以聞帝為之慟示近臣曰后此書可用垂後我豈不通天命而割情乎顧內失吾良佐哀不可已已諡曰文德葬昭陵因九嶷山以成后志帝自著表序始末揭陵左上元中益諡文德聖皇后

太宗賢妃徐惠湖州長城人生五月能言四歲通論語詩八歲自曉屬文父孝德嘗試使擬離騷為小山

篇曰仰幽巖而流盼撫桂枝以凝想將千齡兮此遇荃何為兮獨往孝德大驚知不可掩於是所論著遂盛傳太宗聞之召為才人手未嘗廢卷而辭致贍蔚又無淹思帝益禮顧擢孝德水部員外郎惠再遷充容貞觀末數調兵討定四夷稍稍治宮室百姓勞怨惠上疏極諫且言東戍遼海西討崑巨士馬罷耗漕饋漂沒捐有盡之農趨無窮之壑圖未獲之衆喪已成之軍故地廣者非常安之術也人勞者為易亂之符也又言翠微玉華等宮雖因山藉水無築構之苦而工力和儼不謂無煩有道之君以逸逸人無道之君以樂樂身又言伎巧為喪國斧斤珠玉為蕩心醜毒侈麗纖美不可以不遏志驕於業泰體逸於時安其剴切精詣大略如此帝善其言優賜之帝崩哀慕成疾不肯進藥曰帝遇我厚得先狗馬侍園寢吾志也復為詩連珠以見意永徽元年卒年二十四贈賢妃陪葬昭陵石室惠之弟齊聃齊聃子堅皆以學聞女弟為高宗婕妤亦有文藻世以擬漢班氏

高宗廢后王氏并州祁人魏尙書左僕射思政之孫從祖母同安長公主以后婉淑白太宗以為晉王妃王居東宮妃亦進冊擢父仁祐陳州刺史帝即位立為皇后仁祐以特進封魏國公母柳本國夫人仁祐卒贈司空初蕭良娣有寵而武才人貞觀末以先帝宮人召為昭儀俄與后良娣爭寵更相毀短而昭儀詭險即誣后與母挾媚道壘上帝信之解魏國夫人門籍罷后舅柳爽中書令李義府等陰佐昭儀以偏

言怒帝遂下詔廢后良娣皆爲庶人囚宮中后母兄良娣宗族悉流嶺南許敬宗又奏仁祐無它功以宮掖故超列三事今庶人謀亂宗社罪宜夷宗仁祐應斷棺陛下不窮其誅家止流竄仁祐不宜引庇廕宥逆子孫有詔盡奪仁祐官爵而后及良娣俄爲武后所殺改后姓爲蟒良娣爲梟初帝念后間行至囚所見門禁錮嚴進飲食竇中惻然傷之呼曰皇后良娣無恙乎今安在二人同辭曰妾等以罪棄爲婢安得尊稱耶流淚嗚咽又曰陛下幸念疇日使妾死更生復見日月乞署此爲回心院帝曰朕卽有處置武后知之促詔杖二人百別其手足反接投醢甕中曰令二嫗骨醉數日死殊其尸初詔旨到后再拜曰陛下萬年昭儀承恩死吾分也至良娣罵曰武氏狐媚翻覆至此我後爲猶使武氏爲鼠吾當扼其喉以報后聞詔六宮毋畜猫武后頗見二人被髮瀝血爲厲惡之以巫祝解謝卽徙蓬萊宮厲復見故多駐東都中宗卽位皆復其姓

高宗則天順聖皇后武氏并州文水人父士護見外戚傳文德皇后崩久之太宗聞士護女美召爲才人方十四母楊慟泣與訣后獨自如曰見天子庸知非福何兒女悲乎母遽其意止泣既見帝賜號武媚及帝崩與嬪御皆爲比丘尼高宗爲太子時入侍悅之王皇后久無子蕭淑妃方幸后陰不悅它日帝過佛廬才人見且泣帝感動后廉知狀引內後宮以撓妃寵才人有權數詭變不窮始下辭降體事后后喜數譽於帝故進爲昭儀一旦顧幸在蕭右濱與后不協后性簡重不曲事上下而母柳見內人尙宮無浮禮故昭儀伺后所薄必款結之得賜予盡以分遺由是后及妃所爲必得得輒以聞盡未有以中也昭儀生女后就顧弄去昭儀潛斃兒衾下伺帝至陽爲歡言發衾視兒死矣又驚問左右皆曰后適來昭儀卽悲涕帝不能察怒曰后殺吾女往與妃讒媚今又爾耶由是昭儀得入其眚后無以自解而帝愈信愛始有廢后意久之欲進號宸妃侍中韓瑗中書令來濟言妃嬪有數今別立號不可昭儀乃誣后與母馱勝帝挾前憾實其言將遂廢之長孫無忌褚遂良韓瑗及濟瀕死因爭帝猶豫而中書舍人李義府衛尉卿許敬宗素險側狙勢卽表請詔儀爲后帝意決下詔廢后詔李勣于志寧韋瓘綬進昭儀爲皇后命羣臣及四夷酋長朝后肅義門內外命婦入謁朝皇后自此始后見宗廟再贈士護至司徒爵周國公謚忠孝配食高祖廟母楊再封代國夫人家食魏千戶后乃製外戚誠獻諸朝解釋譏諫於是逐無忌遂良躡死徙寵煥赫然后城寓深痛柔屈不恥以就大事帝謂能奉己故拔公議立之已得志卽盜威福施無憚避帝亦懦昏舉能鉗勒使不得專久稍不平麟德初后召方士郭行真入禁中爲蠱祝宦人王伏勝發之帝怒因是召西臺侍郎上官儀儀指言后專恣失海內望不可承宗廟與帝意合乃趣使草詔廢之左右馳告后遽從帝自訴帝羞縮待之如初猶意其患且曰是皆上官儀教我后諷許敬宗構儀殺之初元舅大

臣佛旨不閱歲履覆道路目語及儀見誅則政歸房帷天子拱手矣羣臣朝四方奏章皆曰二聖每視朝殿中垂簾帝與后偶坐生殺賞罰惟所命當其忍斷雖甚愛不少隱也帝晚益病風不支天下事一付后后乃更爲太平文治事大集諸儒內禁殿議定列女傳臣軌百寮新誠樂書等大抵千餘篇因令學士密裁可奏議分宰相權始士護娶相里氏生子元慶元爽又娶楊氏生三女伯嫁賀蘭越石蚤寡封韓國夫人仲卽后季嫁郭孝慎前死楊以后故寵日盛徙封榮國始兄子惟良懷運與元慶等遇楊及后禮薄后銜不置及是元慶爲宗正少卿元爽少府少監惟良司衛少卿懷運淄州刺史它日夫人置酒酣謂惟良曰若等記疇日事乎今謂何對曰幸以功臣子位朝廷晚緣戚屬進愛而不榮也夫人怒諷后僞爲退讓請惟良等外遷無示天下私繇是惟良爲始州刺史元慶龍州元爽濠州俄坐事死振州元慶至州憂死韓國出入禁中一女國姝帝皆寵之韓國卒女封魏國夫人欲以備嬪職難於后未決后內忌甚會封泰山惟良懷運以岳牧來集從還京師后毒殺魏國歸罪惟良等盡殺之氏曰螻以韓國子敏之奉土護祀初魏國卒敏之入弔帝爲慟敏之哭不對后曰兒疑我惡之俄貶死楊氏徙鄴衛二國咸亨元年卒追封魯國諡忠烈詔文武九品以上及五等親與外命婦赴弔以王禮葬咸陽給班劍葆仗鼓吹時天下旱后僞表求避位不許俄又贈士護太尉兼太子太師太原郡王魯國忠烈夫人爲妃上元元年進號天后建

言十二事一勸農桑薄賦徭二給復三輔地三息兵以道德化天下四南北中尚禁浮巧五省功費力役大廣言路七杜讒口八王公以降皆習老子九父在爲母服齊衰三年十上元前勳官已給告身者無追覈十一京官八品以上益粟八十二百官任事久材高位下者得進階中滯帝皆下詔略施行之蕭妃女義陽宣城公主幽掖庭幾四十不嫁太子弘言于帝后怒醜殺弘帝將下詔遜位于后宰相郝處俊固諫乃止后欲外示寬裕劫人心使歸已卽奏言今羣臣納半俸百姓計口錢以贍邊兵恐四方妄商虛實請一罷之詔可儀鳳三年羣臣蕃夷長朝后于光順門卽并州建太原郡王廟帝頭眩不能視侍醫張文仲秦鳴鶴曰風上逆砭血頭可愈后內幸帝殆得自專怒曰是可斬帝體盃刺血處即醫頓首請命帝曰醫議疾烏可罪且吾眩不可堪聽爲之醫一再刺帝曰吾目明矣言未畢后簾中再拜謝曰天賜我師身負贈寶以賜帝崩中宗卽位天后稱皇太后遺詔軍國大務聽參決嗣聖元年太后廢帝爲廬陵王自臨朝以睿宗卽帝位后坐武成殿帝率羣臣上號册越三日太后臨軒命禮部尙書攝太尉武承嗣太常卿攝司空王德真册嗣皇帝自是太后常御紫宸殿施慘紫帳臨朝追贈五世祖後魏散騎常侍克己爲魯國公妣裴卽其國爲夫人高祖齊殷州司馬居常爲太尉北平郡王妣劉爲王妃曾祖承昌王諮議參軍贈齊州刺史儉爲太尉金城郡王妣宋爲王妃祖隋東郡丞贈并州刺史大都督華爲太尉太原郡王妣趙

爲王妃皆置園邑戶五十考爲太師魏王加實戶滿五千妣爲王妃王園邑守戶百時睿宗雖立寶匹之而諸武擅命又諡魯國公曰靖裴爲靖夫人北平郡王曰恭肅金城郡王曰義康太原郡王曰安成妃從夫諡太后遣册武成殿使者告五世廟室於是柳州司馬李敬業括蒼令唐之奇臨海丞駱賓王疾太后脅逐天子不勝憤乃募兵殺揚州大都督府長史陳敬之據州欲迎廬陵王衆至十萬楚州司馬李崇福連和盱眙人劉行舉嬰城不肯從敬業攻之不克太后拜行舉游擊將軍擢其弟行寶楚州刺史敬業南度江取潤州殺刺史李思文曲阿令尹元貞拒戰死太后詔左玉鈐衛大將軍李孝逸爲揚州道行軍大總管率兵三十萬討之戰于高郵前鋒左豹韜果毅成三朗爲唐之奇所殺又以左鷹揚衛大將軍黑齒常之爲江南道行軍大總管并力敬業興三月敗傳首東都三州平始武承嗣請太后立七廟中書令裴炎沮止及敬業之興下炎獄殺之并殺左威衛大將軍程務挺太后方怫恚一日召羣臣廷議曰朕於天下無負若等知之乎羣臣唯唯太后曰朕輔先帝踰三十年憂勞天下爵位富貴朕所與也天下安佚朕所養也先帝棄羣臣以社稷爲託不敢愛身而知愛人今爲戎首者皆將相何見負之還且受遺老臣伉軀難制有若裴炎乎世將種能合亡命若徐敬業乎宿將善戰若程務挺乎彼皆人豪不利於朕朕能戮之公等才有過彼蚤爲之不然謹以事朕無貽天下笑羣臣頓首不敢仰視曰惟陛下命久之下詔賜若

復辟者睿宗揣非情固請臨朝制可乃治銅匱爲一室署東曰延恩受千賞自言南曰招諫受時政失得西曰申冤受抑枉所欲言北曰通玄受織步祕策詔中書門下一官典領太后不惜爵位以籠四方豪傑自爲助雖妄男子言有所合輒不次官之至不稱職等亦廢誅不少縱務取實材真賢又畏天下有謀反逆者詔許上變在所給輕傳供五品食送京師即日召見厚餽爵賞欲動之凡言變吏不得呵詰雖耘夫斃子必親延見稟之客館敢稽若不送者以所告罪之故上變者徧天下人人屏息無敢議新豐有山因震突出太后以爲美祥赦其縣更名慶山荆人俞文俊上言人不和疣贅生地不和堆阜出今陛下以女主處陽位山變爲災非慶也太后怒投嶺外詔毀乾光殿爲明堂以浮屠薛懷義爲使督作懷義鄆人本馮氏名小寶倖岸淫毒佯狂洛陽市千金公主嬖之去其寶小寶可入侍后詔與私悅之欲掩迹得通籍出入使祝髮爲浮屠拜白馬寺主詔與太平公主婿薛紹通昭穆紹父事之給廐馬中官爲驍侍雖承嗣三思皆尊事惟謹至是護作士數萬巨木率一章千人乃能引又度明堂後爲天堂鴻麗嚴奧次之堂成拜左威衛大將軍梁國公始作崇先廟于西京享武氏承嗣僞款洛水石導使爲帝遣雍人唐同泰獻之后號爲寶圖擢同泰游擊將軍於是汜人又上瑞石太后乃郊上帝謝祝自號聖母神皇作神皇璽改寶圖曰天授聖圖號洛水曰永昌水圖所曰聖圖泉勒石洛壇左曰天授聖圖之表改汜水曰廣武時禰去

王室大臣重將皆撓不得逞宗室孤外無寄足地於是韓王元嘉等謀舉兵唱天下迎還中宗琅邪王沖越王貞先發諸王倉卒無應者遂敗元嘉與魯王靈夔等皆自殺餘悉坐誅諸王牽連死滅殆盡子孫雖嬰祿亦投嶺南太后身拜洛受圖天子率太子羣臣蠻夷以次列大陳珍禽奇獸貢物鹵簿壇下禮成去永昌元年享萬象神宮改服袞冕摺大圭執鎮圭容宗亞獻太子終獻合祭天地五方帝百神從以高祖太宗高宗配引魏王士護從配班九條訓百官遂大饗羣臣號士護周忠孝太皇楊忠孝太后以文水墓爲章德陵咸陽墓爲明義陵太原安成王爲周安成王金城郡王爲魏義康王北平郡王爲趙肅恭王魯國公爲太原靖王載初中又享萬象神宮以太穆文德二皇后配皇地祇引周忠孝太后從配作盟丙堊

②田○唐惠風鳳平十有二文太后自名盟改詔書爲制書以周漢爲二王後虞夏殷後爲三恪除唐屬籍拜薛懷義輔國大將軍封鄂國公令與羣浮屠作大雲經言神皇受命事春官尙書李思文詭言周書武成爲篇辭有垂拱天下治爲受命之符后喜皆班示天下稍圖革命然畏人心不肯附乃陰忍驚害肆斬殺怖天下內縱酷吏周興來俊臣等數十人爲爪吻有不嫌若素疑憚者必危法中之宗姓侯王及它骨骸臣將相駢頸就銜血丹狴戶家不能自保太后操奩具坐重幃而國命移矣御史傅游藝率關內父老請革命改帝氏爲武又脅羣臣固請妄言鳳集上陽宮赤雀見朝堂天子不自安亦請氏武示一尊

太后知威柄在己因大赦天下改國號周自稱聖神皇帝旗幟尙赤以皇帝爲皇嗣立武氏七廟于神都尊周文王爲文皇帝號始祖妣曰文定皇后武王爲康皇帝號睿祖妣姜曰康惠皇后太原靖王爲成皇帝號嚴祖妣曰成莊皇后趙肅恭王爲章敬皇帝號肅祖妣曰章敬皇后魏義康王爲昭安皇帝號烈祖妣曰昭安皇后周安成王爲文穆皇帝號顯祖妣曰文穆皇后考忠孝太皇爲孝明高皇帝號太祖妣曰孝明高皇后罷唐廟爲享德廟四時祠高祖以下三室餘廢不享至日祀上帝萬象神宮以始祖及考妣配以百神從祀盡王諸武詔并州文水縣爲武興比漢豐沛百姓世給復以始祖家爲德陵睿祖爲喬陵嚴祖爲節陵肅祖爲簡陵烈祖爲靖陵顯祖爲永陵章德陵爲吳陵明義陵爲順陵太后雖春秋高善自塗澤雖左右不悟其衰俄而二齒生下詔改元爲長壽明年享神宮自制大樂舞工用九百人以武承嗣爲亞獻三思爲終獻帝之爲皇嗣公卿往往見之會尙方監裴匪躬左衛大將軍阿史那元慶白澗府果毅薛大信監門衛大將軍范雲僊潛謁帝皆腰斬都市自是公卿不復上謁有上封事言嶺南流人謀反者太后遣攝右臺監察御史萬國俊就按得實卽論決國俊至廣州盡召流人矯詔賜自盡皆號哭不服國俊驅之水曲使不得逃一日戮三百餘人乃誣奏流人怨望請悉除之於是太后遣右衛翊府兵曹參軍劉光業司刑評事王德壽苑南面監丞鮑思恭尙輦直長王大貞右武衛兵曹參軍屈貞筠皆攝

監察御史分往劍南黔中安南等六道訊鞫而擢國俊左臺侍御史光業等亦希功于上惟恐殺人之少光業殺者九百人德壽殺七百人其餘亦不減五百人太后久乃知其寃詔六道使所殺者還其家國俊等亦相踵而死皆見有物爲厲云太后又自加號金輪聖神皇帝置七寶于廷曰金輪寶曰白象寶曰女寶曰馬寶曰珠寶曰主兵臣寶曰主藏臣寶率大朝會則陳之又尊其顯祖爲立極文穆皇帝太祖爲無上孝明皇帝延載二年武三思率蕃夷諸酋及耆老請作天樞紀太后功德以黜唐興周制可使納言姚瑤護作乃大哀銅錢合冶之署曰大周萬國頌德天樞置端門外其制若柱度高一百五尺八面面別五尺冶鐵象山爲之趾頁以銅龍石鑲怪獸環之柱顛爲雲蓋山大珠高丈圍三之作四蛟度丈二尺以承珠其趾山周百七十尺度二丈無慮用銅錢二百萬斤乃悉鑊羣臣蕃酋名氏其上薛懷義寵稍衰而御醫沈南璆進懷義失望因火明堂太后羞之掩不發懷義愈狠恣怏怏乃密詔太平公主擇健婦縛之殿中命建昌王武攸寧將作大匠宗晉卿率壯士擊殺之以畚車載尸還白馬寺懷義負幸昵氣蓋一時出百官上其徒多犯法御史馮思勗其姦懷義怒遇諸道左右毆之幾死弗敢言默啜犯塞拜新平伐逆朔方道大總管提十八將軍兵擊胡宰相李昭德蘇味道至爲之長史司馬後厭入禁中陰募力少年千人爲浮屠有逆謀侍御史周矩劾狀請治驗太后曰第出朕將使詣獄矩坐臺少選懷義怒馬造廷直往坐大榻上矩召吏受辭懷義卽乘馬去矩以聞太后曰是道人素狂不足治力少年聽窮劾矩悉投放醜裔懷義構矩俄免官太后祀天南郊以文王武王土護與唐高祖並配太后加號天冊金輪聖神皇帝遂封嵩山禪少室册山之神爲帝配爲后封壇南有大櫺蔽日置雞其杪賜號金雞樹自制升中述志刻石示後改明堂爲通天宮鑄九州鼎各位其方列廷中又歛天下黃金作大儀鍾不克久之以崇先廟爲崇尊廟禮視太廟旋復崇尊廟爲太廟自懷義死張易之昌宗得幸乃置控鶴府有監有丞及主簿錄事等監三品以易之爲之太后自見諸武王非天下意前此中宗自房州還復爲皇太子恐百歲後爲唐宗室驕藉無死所卽引諸武及相王太平公主誓明堂告天地爲鐵券使藏史館改吳陵署爲攀龍臺久視初以控鶴監爲天驥府又改奉宸府罷監爲令以左右控鶴爲奉宸大夫易之復爲令神龍元年太后有疾久不平居迎仙院宰相張柬之與崔玄暉等建策請中宗以兵入誅易之昌宗於是羽林將軍李多祚等帥兵自玄武門入斬二張于院左太后聞變而起桓彥範進請傳位太后返臥不復語中宗於是復卽位徙太后上陽宮帝率百官詣觀風殿問起居後率十日一詣宮俄朔朔望廢奉宸府宮遷東都武氏廟于崇尊廟更號崇恩復唐宗廟諸武王者咸降爵是歲后崩年八十一遺制稱則天大聖皇太后去帝號諡曰則天大聖后祔乾陵會武三思烝韋庶人復用事於是大旱祈陵輒雨三思誅帝詔崇恩廟祠如太

廟齋郎用五品子博士楊孚言太廟諸郎取七品子今崇恩取五品不可帝曰太廟如崇恩可乎孚曰崇恩太廟之私以臣準君則僭以君準臣則惑乃止及韋武黨誅詔則天大聖皇后復號太后廢崇恩廟及陵景雲元年號大聖太后太平公主奸政請復二陵官又尊后曰天后聖帝俄號聖后太平誅詔黜周孝明皇帝號復爲太原郡王后爲妃罷吳順等陵開元四年追號則天皇后太常卿姜皎建言則天皇后配高宗廟主題天后聖帝非是請易題爲則天皇后武氏制可

中宗和思順聖皇后趙氏京兆長安人祖綽武德中戰有功終右領軍將軍父環尙高祖常樂公主帝爲英王聘后爲妃高宗於公主恩尤隆武后不喜乃幽妃內侍省環自定州刺史駙馬都尉貶括州絕主朝謁隨環之官妃旣囚局鍵牢謹日給飼料衛者候其突煙數日不出披戶視之死腐矣環以壽州刺史與主預越王事死神龍元年追諡妃曰恭皇后贈環左衛大將軍中宗崩藏陵事韋庶人不臣不得祔有司加上尊諡以后祔定陵

中宗庶人韋氏京兆萬年人祖弘表貞觀中曹王府典軍帝在東宮后被選爲妃嗣聖初立爲皇后尋與帝處房陵每使至帝輒恐欲自殺后止曰禍福何常早晚等死耳無遽及帝復卽位后居中宮是時上官昭容與政事方敬暉等欲盡誅諸武武三思懼乃因昭容入請得幸於后卒謀暉等誅之初帝幽廢與后約一朝見天日不相制至是與三思共御床博戲帝從旁典籌不爲忤三思諷羣臣上后號爲順天皇后乃親謁宗廟贈父玄貞上洛郡王左拾遺賈虛己建言非李氏王者盟書共棄之今復國未幾遽私后家且先朝禍孽未遠甚可懼也如今皇后固辭使天下知後宮謙讓不亦善乎不聽神龍三年節愍太子舉兵敗宗楚客率羣臣請加號翊聖詔可禁中謬傳有五色雲起后作笥帝圖以示諸朝因大赦天下賜百官母妻封號太史迦葉志忠表上桑條歌十二篇言后當受命曰昔高祖時天下歌桃李太宗時歌秦王破陣高宗歌堂堂天后世歌武媚娘皇帝受命歌英王石州后今受命歌桑條蓋后妃之德專蠶桑共宗廟事也乃賜志忠第一區絹七百段太常少卿鄭愔因之被樂府楚客又諷補闕趙延禧離釋桑條爲一十八代帝大喜擢延禧諫議大夫於是昭容以武氏事動后卽表增出母服民以二十三爲丁限五十丸免五品而上母妻不繇夫子封者喪得用鼓吹數改制度陰儲人望稍寵樹親屬封拜之昭容與母及尙宮賀婁等多受金錢封巫趙隴西夫人出入禁中勢與上官埒繇是墨敕斜封出矣三年帝親郊引后亞獻明年正月望夜帝與后微服過市彷彿觀覽縱宮女出游皆淫奔不還國子祭酒葉靜能善禁架常侍馬秦客高醫光祿少卿楊均善烹調皆引入後廷均秦客蒸於后嘗喪免不歷旬輒起帝遇弒議者謹啓秦客及安樂公主后大懼引所親議計乃以刑部尙書裴談工部尙書張錫輔政留守東都詔將軍趙

承福薛崇簡以兵五百衛譙王重福與兄温定策立温王重茂爲皇太子列府兵五萬分二營屯京師然後發喪太子卽位是爲殤帝皇太后臨朝温總內外兵檢護宮省族弟濯播宗子捷璿璿甥高崇及武延秀分領左右屯營羽林飛騎萬騎京師大恐傳言且革命播璿入軍中鞭督萬騎欲立威士怨不爲用俄而臨淄王引兵夜披玄武門入羽林殺璿播崇於寢斧關叩太極殿后遁入飛騎營爲亂兵所殺斬延秀安樂公主分捕諸韋諸武與其支黨悉誅之皇后及安樂首東市翌日追貶爲庶人葬以一品禮

上官昭容者名婉兒西臺侍郎儀之孫父廷芝與儀死武后時母鄭太常少卿休遠之姊婉兒始生與母配掖廷天性韶警善文章年十四武后召見有所制作若素構自通天以來內掌詔命揆麗可觀嘗忤旨當誅后惜其才止黥而不殺也然羣臣奏議及天下事皆與之帝卽位大被信任進拜昭容封鄭沛國夫人婉兒通武三思故詔書推右武氏抑唐家節愍太子不平及舉兵叩肅章門索婉兒婉兒曰我死當次索皇后大家矣以激怒帝帝與后挾婉兒登玄武門避之會太子敗乃免婉兒勸帝修大書館增學士員引大臣名儒充選數賜宴賦詩君臣展和婉兒常代帝及后長安樂二主衆篇並作而采麗益新又差第羣臣所賦賜金爵故朝廷靡然成風當時屬辭者大抵雖浮靡然所得皆有可觀婉兒力也鄭卒諡節

婉夫人婉兒請降秩行服詔起爲婕妤俄遷昭容帝卽婉兒居穿沼築巖窮飾勝趣卽引侍臣宴所是時左右內職皆聽出外不呵止婉兒與近嬖至皆營外宅表人穢夫爭候門下肆狎昵因以求遷職要官與

崔滉亂遂引知政事湜開商山道未半因帝遺制虛列其功加甄賞皇后之敗斬闕下初鄭方姪夢巨人昇大稱曰持此稱量天下婉兒生踰月母戲曰稱量者豈爾邪輒啞然應後內秉機政符其夢云景雲中追復昭容諡惠文始從母子王昱爲拾遺昱戒曰上往囚房陵武氏得志矣卒而中興天命所在不可幸也三思雖乘釁天下知必敗今昭容上所信而附之且滅族鄭以責婉兒不從節愍誅三思果索之始憂懼及草遺制卽引相王輔政臨淄王兵起被收婉兒以詔草示劉幽求幽求言之王王不許遂誅開元初

哀次其文章詔張說題篇

睿宗肅明順聖皇后劉氏祖德威自有傳儀鳳中帝在藩納爲孺人俄爲妃生靈王壽昌代國二公主帝卽位爲皇后會帝降號皇嗣復爲妃長壽二年爲戶婢誣與寶德妃挾蠱道祝詛武后並殺之宮中葬祕莫知景雲元年追諡肅明皇后

睿宗昭成順聖皇后竇氏曾祖抗父孝謹自有傳后婉淑尤循禮則帝爲相王納爲孺人卽位進德妃生玄宗及金仙玉真二公主與肅明同追諡並招魂葬東都之南肅明日惠陵后曰靖陵立別廟曰儀坤以享云帝崩追稱皇太后與肅明祔橋陵后以子貴故先祔睿宗室肅明以開元二十年乃得祔廟初太常

加諡后曰大昭成或言法宜引聖貞冠諡而曰大昭成非也以單言配之應曰聖昭若睿成以復言配之應曰大聖昭成聖貞昭成又引太穆皇后始諡穆及高祖崩合帝諡曰太穆追增太穆神皇后文德皇后始諡文德及太宗崩合諡文德聖皇后又援范曄著漢光烈等爲比太常謂曄以帝號標后諡是史家記事體婦人非必與夫同也入廟稱后繫夫在朝稱太繫子文母生號也文王既沒諡也周公豈以夫從婦乎漢法不可以爲據制曰可天寶八載制詔自太穆而下六皇后並增上順聖二諡云

玄宗皇后王氏同州下邳人梁冀州刺史神念之裔孫帝爲臨淄王聘爲妃將清內難預大計先天元年立爲皇后久無子而武妃稍有寵后不平顯詆之然撫下素有恩終無肯譖短者帝密欲廢后以語姜皎皎漏言卽死后兄守一懼爲求馱勝浮屠明悟教祭北斗取霹靂木刻天地文及帝諱合佩之曰後有子與則天比開元十二年事覺帝自臨劾有狀乃制詔有司皇后天命不祐華而不實有無將之心不可以承宗廟母儀天下其廢爲庶人賜守一死始后以愛弛不自安承間泣曰陛下獨不念阿忠脫紫半臂易斗麪爲生日湯餅邪帝憫然動容阿忠后呼其父仁皎云繇是久乃廢當時王譚作翠羽帳賦諷帝未幾卒以一品禮葬後宮思慕之帝亦悔寶應元年追復后號

玄宗貞順皇后武氏恆安王攸止女幼入宮帝卽位寢得幸時王皇后廢故進冊惠妃其禮秩比皇后初帝在潞趙麗妃以倡幸有容止善歌舞開元初父兄皆美官及妃進麗妃恩亦弛以十四年卒諡曰和生太子瑛而皇甫德儀生鄂王劉才人生光王皆藩邸之舊後愛薄而妃乃專寵封所生母楊鄭國夫人弟忠國子祭酒信祕書監將遂立皇后御史潘好禮上疏曰禮父母讐不共天春秋子不復讐不子也陛下欲以武氏爲后何以見天下士妃再從叔三思也從父延秀也皆干紀亂常天下共疾夫惡木垂蔭惡士不息盜泉飛溢廉夫不飲匹夫匹婦尙相擇況天子乎願慎選華族稱神祇之心春秋宋人夏父之會無以妾爲夫人齊桓公誓葵已曰無以妾爲妻此聖人明嫡庶之分也分定則窺競之心息矣今人間咸言右丞相張說欲取立后功圖復相今太子非惠妃所生而妃有子若一儷宸極則儲位將不安古人所以諫其漸者有以也遂不果立妃生子必秀疑凡二王一主皆不育及生壽王帝命靈王養外邸又生盛王咸宜太華二公在後李林甫以壽王母愛希妃意陷太子鄂光二王皆廢死會妃薨年四十餘贈皇后及諡葬敬陵

玄宗元獻皇后楊氏華州華陰人曾祖士達爲隋納言天授中以武后母黨追封士達爲鄭王父知慶太尉帝在東宮后以景雲初入宮爲良媛時太平公主忌帝而宮中左右持兩端纖悉必聞媛方娠帝不自安密語侍讀張說曰用事者不欲吾多子柰何命說挾劑以入帝於曲室自煮之夢若有介而戈者環鼎

三而三煮盡覆以告說曰天命也乃止生男是爲肅宗帝卽位爲貴嬪其姊節愍太子妃也初肅宗生卜云不宜養乃命王皇后舉之后無子撫肅宗如所生後又生靈親公主乃薨說以舊恩故子埒得尙靈親肅宗卽位至德二載太上皇自蜀詔有司其議尊稱遂上册諡寶應未耐泰陵

玄宗貴妃楊氏隋梁郡通守汪四世孫徙籍蒲州遂爲永樂人幼養叔父家始爲壽王妃開元二十四年武惠妃薨後廷無當帝意者或言妃姿質天挺宜充掖廷遂召內禁中異之卽爲自出妃意者丐藉女官號太真更爲壽王聘韋昭訓女而太真得幸善歌舞窈窕音律且智算警穎迎意輒悟帝大悅遂專房宴宮中號娘子儀體與皇后等天寶初進冊貴妃追贈父玄琰太尉齊國公擢叔玄珪光祿卿宗兄鉅鴻臚卿倚侍御史尙太華公主主惠妃所生最見寵遇而釗亦懷顯釗國忠也三姊皆美幼帝呼爲姨封韓號秦三國爲夫人出入宮掖恩寵聲焰震天下每命婦入班持盈公主等讓皆不敢就位臺省州縣奉請託奔走期會過詔敕四方獻餉結納門若市然建平信成二公主以與妃家忤至追內封物駙馬都尉獨孤明失官它日妃以譴還銛第比中仄帝尙不御食管怒左右高力士欲驗帝意乃曰以殿中供帳司農酒餽百餘車送妃所帝卽以御膳分賜力士知帝旨是夕請召妃還下鑰安興坊門馳入妃見帝伏地謝帝釋然撫慰良渥明日諸嬪上食樂作驟賜左右不可貲由是愈見寵賜諸嬪錢歲百萬爲脂粉費銛以上柱國門列戟與諸嬪五家第舍聯耳擬憲宮禁率一堂費緡千萬見它第有勝者輒壞復進款以

壞侈相誇詡土木工食不息帝所得奇珍及貢獻分賜之使者相銜於道五家如一妃每從游幸乘馬則力士授轡策凡充錦繡官及治瑑金玉者大抵千人奉須索奇服祕玩變化若神四方爭爲怪珍入貢動駭耳目於是嶺南節度使張九章廣陵長史王翼以所獻最進九章銀青階擢翼戶部侍郎天下風靡妃嗜荔支必欲生致之乃置騎傳送走數千里味未變已至京師天寶九載妃復得譴還外第國忠謀於吉温温因見帝曰婦人過忤當死然何惜宮中一席廣爲鈇鑕地更使外辱乎帝感動輟食詔中人張韜光賜之妃因韜光謝帝曰妾有罪當萬誅盡膚髮外皆上所賜今且死無以報引刀斷一縷髮奏之曰以此留訣帝見駭惋遽召入禮遇如初因又幸秦國及國忠第賜兩家鉅萬國忠旣遙領劍南每十月帝幸華清宮五宅車騎皆從家別爲隊隊一色俄五家隊合爛若萬花川谷成錦繡國忠導以劍南旗節遺鈿墮烏瑟瑟環珮狼藉于道香聞數十里十載正月望夜妃家與廣靈主僮騎爭闥門鞭挺謹競主墮馬僅得去主見帝泣乃詔殺楊氏奴貶駙馬都尉程昌裔官國忠之輔政其息咄尙萬春公主暄尙延和郡主弟鑑尙承榮郡主又詔爲玄琰立家廟帝自書其碑銛秦國早死故韓號與國忠貴最久而號國素與國忠亂頗爲人知不恥也每入謁並驅道中從監侍姆百餘騎炬密如晝靚粧盈里不施幃障時人謂爲雄狐

諸王子孫凡婚聘必先因韓說以請輒皆遂至數百千金以謝初安祿山有邊功帝寵之詔與諸姨約爲兄弟而祿山母事妃來朝必宴餞結歡祿山反以誅國忠爲名且指言妃及諸姨罪帝欲以皇太子撫軍因禪位諸楊大懼哭于庭國忠入白妃妃銜塊請死帝意沮乃止及西幸至馬嵬陳玄禮等以天下計誅國忠已死軍不解帝遣力士問故曰禍本尚在帝不得已與妃訣引而去縊路祠下裹尸以紫茵瘞道側年三十八帝至自蜀道過其所使祭之且詔改葬禮部侍郎李揆曰龍武將士以國忠負上速亂爲天下殺之今葬妃恐反仄自疑帝乃止密遣中使者具棺槨它葬焉敢瘞故香囊猶在中人以獻帝視之悽感流涕命工貌妃於別殿朝夕往必爲楸欬馬嵬之難說國與國忠妻裴柔等奔陳倉縣令率吏追之意以爲賊棄馬走林說國先殺其二子柔曰句我死卽并其女刺殺之乃自剄不殊吏載置于獄問曰國家乎賊乎吏曰互有之乃死瘞陳倉東郭外

贊曰或稱武韋亂唐同一輒武持久韋亟滅何哉議者謂否武后自高宗時挾天子威福脅制四海雖逐嗣帝改國號然賞罰已出不假借羣臣僭於上而治於下故能終天年陷亂而不亡韋氏乘夫淫烝于朝斜封四出政放不一旣鳩殺帝引睿宗輔政權去手不自知戚地已疎人心相挺玄宗藉其事以撼豪英故取若撮遺不旋踵宗族夷丹勢奪而事淺也然二后遺後王戒顧不厚哉

唐書卷七十六

唐書卷七十六考證

太宗文德順聖皇后長孫氏傳河南洛陽人○舊書作長安人

父晟仕隋為左驍衛將軍○舊書右驍衛將軍晟之女

從幸九成宮方屬疾會柴紹等急變聞帝甲而起后與疾以從○臣德潛按后從幸九成宮屬疾此貞觀

八年事也本紀無急變事柴紹傳亦然此未詳何指應有誤

中宗庶人韋氏傳數改制度陰儲人望○臣德潛按上文乃神龍三年以後事也而綱目在神龍元年

唐書卷七十六考證

唐書卷七十七

宋 端 明 殿 學 士 宋 邢 撰

列傳第二

后妃下

肅宗廢后庶人張氏鄧州向城人家徙新豐祖母竇昭成皇后女弟也玄宗幼失昭成母視媿鞠愛篤備帝卽位封鄧國夫人親寵無比五息子曰去惑去疑去奢去逸去盈皆顯官去盈尙常芬公主去逸生后肅宗爲忠王時納韋元娃女爲孺人旣建太子以孺人爲妃后爲良娣妃兄堅爲李林甫構死太子懼請與妃絕毀服幽禁中安祿山反陷于賊至德中薨始妃旣絕良娣得專侍太子慧中而辯能迎意傅合玄宗西幸娣與太子從度渭民鄧道乞留復長安太子不聽中人李輔國密啟娣又贊其謀遂定計北趣靈武時軍衛單寡夕次娣必寢前太子曰暮夜可虞且捍賊非婦人事宜少戒對曰方多事若倉卒妾自當之殿下可徐爲計駐靈武產子三日起縫戰士衣太子敕止對曰今豈自養時邪乾元初冊拜淑妃贈其父尙書左僕射姊妹皆封號弟清潛尙大監延和二郡主遂立爲皇后詔內外命婦悉朝光順門后能牢寵稍稍豫政事與李輔國相倚多以私謁撓權親蠶苑中羣命婦相禮儀物甚盛二年羣臣上帝尊號后

乾隆四年校刊

唐書卷七十七后妃傳

亦諷羣臣尊己號翊聖帝問李揆揆爭不可會月蝕帝以咎在後宮乃止又與輔國謀徙上皇西內端午日帝召見山人李唐帝方擁幼女顧唐曰我念之無怪也唐曰太上皇今日亦當念陛下帝泣然涕下而內制於后卒不敢謁西宮帝不豫后自箴血寫佛書以示誠初建寧王倓數短后於帝上皇在蜀以七寶鞍賜后而李泌請分以賞戰士倓助泌請故后怨卒被譖死繇是太子深畏事后謹甚后猶欲危之然以子佖早世而侗幼故太子得無患寶應九年帝大漸后與內官朱輝光等謀立越王係而李輔國程元振以兵衛太子幽后別殿代宗已立羣臣白帝請廢為庶人殺之清潛與舅竇履信皆流放支黨伏誅

肅宗章敬皇后吳氏濮州濮陽人父令珪以郾丞坐事死故后幼入掖廷肅宗在東宮宰相李林甫陰構不測太子內憂鬢髮斑禿後入謁玄宗見不悅因幸其宮顧廷宇不汛埽樂器塵蠹左右無嬪侍帝愀然謂高力士曰兒居處乃爾將軍臣使我知乎詔選京兆良家子五人虞侍太子力士曰京兆料擇人得以藉口不如取掖廷衣冠子可乎詔可得三人而后在中因蒙幸忽寢厭不寤太子問之辭曰夢神降我介而劍決我脅以入殆不能堪燭至其文尚隱然生代宗為嫡皇孫生之三日帝臨澡之孫體孱弱負姆嫌陋更取它宮兒以進帝視之不樂姆叩頭言非是帝曰非爾所知趣取兒來於是見嫡孫帝大喜向日視之曰福過其父帝還盡留內樂宴具顧力士曰可與太子飲一日見三天子樂哉后性謙柔太子禮之甚渥年十八薨代宗即位羣臣請以后祔肅宗廟乃追尊為皇后上謚合葬建陵故號聖澤生衣皆赭色見者嘆異謂有聖子之符云

代宗貞懿皇后獨孤氏失其所人父穎左威衛錄事參軍天寶中帝為廣平王時貴妃楊氏外家貴冠戚里祕書少監崔岫妻韓國夫人以其女女皇孫為妃妃生子僖所謂召王者妃倚母家頗驕媚諸楊誅禮寢薄及薨后以姝豔進居常專夜王卽位冊貴妃生韓王迴華陽公主大厯十年薨追號為皇后上謚帝悼思不已故殯內殿累年不外葬後三年始詔於都左治陵欲朝夕望見之補闕姚南仲諫而止乃葬莊陵詔宰相常袞為哀冊帝於后厚故送終華廣務稱其情袞極道悽婉以中帝意又詔羣臣為挽辭帝擇其尤悲者令歌之初后愛遇第一官其宗叔卓少府監兄良佐太子中允

代宗睿真皇后沈氏吳興人開元末以良家子入東宮太子以賜廣平王實生德宗天寶亂賊囚后東都掖廷王入洛復留宮中時方北討未及歸長安而河南為史思明所沒遂失后所在代宗立以德宗為皇太子詔訪后在亡不能得德宗卽位乃先下詔贈后曾祖士衡太保祖介福太傅父易直太師弟易良司空易直子震太尉一日封拜百二十七人詔制皆錦翠地飾以廐馬負載賜其家易良妻崔入謁帝易服召王韋美人出拜詔崔勿替建中元年乃具冊前上皇太后尊號帝供張含元殿具袞冕出自左序立東

方羣臣在位帝再拜奉冊歎感咽左右皆泣於是中書舍人高叅上議漢文帝卽位遣薄昭迎太后于代今宜用漢故事令有司擇日分遣諸沈行州縣物色咨訪以述宣皇帝孝思冀上天降休靈命允蒼須審知皇太后行在然後遣大臣備法駕奉迎帝乃以睦王述爲奉迎使工部尙書喬琳副之昇平公主侍起居使者分行天下故中官高力士女頗能言禁中事與女官李真一嘗從后游李見高疑問之含糊不堅而年狀差似后又嘗削脯哺帝傷左指高亦嘗剖瓜傷指是時宮中無識后者於是迎還上陽宮馳以聞帝喜羣臣皆賀力士子知非是具言其情詔貸之帝謂左右吾寧受百罔冀一得真於是自謂太后者數矣及索驗左皆辭窮終帝世無聞焉貞元七年詔贈外高祖琳爲司徒封徐國公爲立五廟以琳爲始祖詔族子房爲金吾將軍奉其祀憲宗卽位有司建言皇太后沈氏厭代二十有七年大行皇帝至孝哀思罔極建中時發明詔遣使者奉迎凡舟車所至罔不逮歲推月遷叅訪理絕請因大行皇帝啟殯詔羣臣爲皇太后發哀肅章內殿中人奉厥衣置幄坐宮中朝夕上食告天地宗廟上太皇太后謚冊作神主祔代宗廟備法駕奉禕衣納于元陵祠室詔曰可

德宗昭德皇后王氏本仕家失其譜系帝爲魯王時納爲嬪生順宗尤見寵禮既卽位冊號淑妃贈其父遇揚州大都督子姓姻出悉得官貞元三年妃久疾帝念之遂立爲皇后冊禮方訖而后崩羣臣大臨三日帝七日釋服將葬后母鄭國鄭夫人請設奠有詔祭物無用寓欲祭聽之於是宗室王大臣李晟渾瑊等皆祭自發塗日日莫終發引乃止葬靖陵置令丞如它陵臺立廟奏坤元之舞敕宰相張延賞柳渾等製樂曲帝嫌文不工李紆上謚冊曰大行皇后帝又謂不典並詔翰林學士吳通玄改謚冊曰咨后王氏然議者謂岑文本所上文德皇后冊言皇后長孫氏爲得禮承貞元年改祔崇陵德宗賢妃韋氏戚里舊族也祖濯尙定安公主初爲良娣德宗貞元四年冊拜賢妃宮壺事無不聽而性敏淑言動有繩矩帝重之後宮莫不師其行帝崩自表留奉崇陵園元和四年薨

順宗莊憲皇后王氏琅琊人祖難得有功名於世代宗時后以良家選入宮爲才人順宗在藩帝以才人幼故賜之爲王孺人是生憲宗王在東宮冊爲良娣后性仁順宮中化其德莫不柔雍順宗卽位疾已解頓后侍醫藥不少怠將立后會病棘而止憲宗內禪尊爲太上皇后元和元年乃上尊號曰皇太后后謹畏深抑外家無豪絲假貸訓厲內職有古后妃風十年崩年五十四遺令曰皇太后敬問具位萬物之理必歸於有極未亡人嬰霜露疾日以衰頓幸終天年得奉陵寢志願獲矣其何所哀易月之典古今所共皇帝宜三日聽政服二十七日釋天下吏民令到臨三日止宮中非朝暮臨無輒哭無禁昏嫁祠祀飲食酒肉已釋服聽舉樂侍醫無加罪陪祔如舊制有司上謚葬豐陵

憲宗懿安皇后郭氏汾陽王子儀之孫父曖尙昇平公主實生后憲宗爲廣陵王聘以爲妃順宗以其家有大功烈而母素貴故禮之異諸婦是生穆宗元和元年進册貴妃八年羣臣三請立爲后帝以歲子午忌又是時後廷多嬖豔恐后得尊位鉗掣不得肆故章報聞罷穆宗嗣位上尊號皇太后贈曖太尉母齊國大長公主擢兄釗刑部尙書縱金吾大將軍后移御興慶宮凡朔望三朝帝率百官詣宮門爲壽或歲時慶問燕饗後宮戚里內外婦車騎駢壅環珮之聲滿宮帝亦豪矜朝夕供御務華侈大稱后意后嘗幸驪山登覽裴回詔景王督禁甲從帝自到昭應奉迎留帳飲數日還帝崩中人有爲后謀稱制者后怒曰吾效武氏邪今太子雖幼尙可選重德爲輔吾何與外事哉敬宗立號太皇太后寶厯倉卒后召江王嗣皇帝位是爲文宗文宗性謹孝事后有禮凡羞果鮮珍及四方奇奉必先獻宗廟三宮而後御之武宗喜畋游角武抃擇五方小兒得出入禁中它曰問后起居從容請曰如何可爲盛天子后曰諫臣章疏宜審覽度可用用之有不可以詢宰相毋拒直言勿納偏言以忠良爲腹心此盛天子也帝再拜還索諫章閱之往往道游獵事自是畋幸稀小兒武抃等不復橫賜矣宣宗立於后諸子也而母鄭故侍兒有囊怨帝奉養禮稍薄后鬱鬱不聊與一二侍人登勤政樓將自隕左右共持之帝聞不喜是夕后暴崩有司上尊諡葬景陵外國太常官王暉請后合葬景陵以主附憲宗室帝不悅令宰相白敏中讓之暉曰后乃憲

宗東宮元妃事順宗爲婦歷五朝母天下不容有異論敏中亦怒周墀又責謂暉終不撓墀曰暉信孤直俄貶暉旬容令懿宗咸通中暉還爲禮官申抗前論乃詔后主附于廟

憲宗孝明皇后鄭氏丹陽人或言本爾朱氏元和初李錡反有相者言后當生天子錡聞納爲侍人錡誅沒入掖廷侍懿安后憲宗幸之生宣宗宣宗爲光王后爲王太妃及卽位尊爲皇太后太后不肯別處故帝奉養大明宮朝夕躬省候焉懿宗立尊后爲太皇太后咸通三年帝奉后宴三殿命翰林學士侍立綺樓下六年崩移仗西內上諡册葬景陵旁園

穆宗恭僖皇后王氏越州人本仕家子幼得侍帝東宮生敬宗長慶時册爲妃敬宗立上尊號爲皇太后贈后父紹卿司空母張追封趙國夫人文宗時稱寶厯太后太和五年宰相建白以太皇太后與寶厯太后稱號未辨前代詔令不敢斥言皆以宮爲稱今寶厯太后居義安殿宜曰義安太后詔可會昌五年崩有司上諡葬光陵東園

穆宗貞獻皇后蕭氏閩人也穆宗爲建安王后得侍生文宗文宗立上尊號曰皇太后初后去家入長安不復知家存亡惟記有弟帝爲訪之俄有男子蕭洪因后娣婿呂璋白見之太后謂得真弟悲不自勝帝拜洪金吾將軍出爲河陽三城節度使稍徙鄜坊始節度自神策出者舉軍爲辨裝因三倍取償洪所代

未及償而死軍中併責償於洪洪不許左軍中尉仇士良憾之會聞有男子蕭本又稱太后弟士良以聞自鄜坊召洪下獄按治乃代人詔流驩州不半道賜死擢本贊善大夫寵贈三世帝以爲真不淹旬賜累鉅萬然太后真弟庸輒莫能自達本給得其家系士良主之遂聽不疑歷衛尉卿金吾將軍會福建觀察使唐扶上言泉州男子蕭弘自言太后弟御史臺叅治非是昭義劉從諫又爲言請與本辯有詔三司高元裕孫簡崔郇雜問乃皆妄本流愛州弘儋州而太后終不獲弟初太和中懿安太后居興慶宮寶祿太后居慶安殿后居大內號三宮太后帝每五日問安及歲時慶謁率繇複道至南內羣臣及命婦詣宮門候起居有司獻四時新物送三宮亦稱賜帝曰上三宮何可言賜遽索筆滅賜爲奉開成正月望夜帝御咸泰殿大然鐙作樂迎三宮太后奉觴進壽禮如家人諸王公主皆得侍武宗時徙積慶殿又號積慶太后大中元年崩上今諡

穆宗宣懿皇后韋氏失其先世穆宗爲太子后得侍生武宗長慶時冊爲妃武宗立妃已亡追冊爲皇太后上尊諡又封后二女弟爲夫人有司奏太后陵宜別制號帝乃名所葬園曰福陵既又問宰相葬從光陵與但耐廟孰安奏言神道安於靜光陵因山爲固且二十年不可更穿福陵崇築已有所當遂就臣等請奉主耐穆宗廟便帝乃下詔朕因誕日展禮于太皇太后謂朕曰天子之孝莫大於承續今穆宗皇帝虛合享之位而宣懿太后實生嗣君當以耐廟緣是奉后合食穆宗室

尙宮宋若昭貝州清陽人世以儒聞父廷芬能辭章生五女皆警慧善屬文長若莘次若昭若倫若憲若荀莘昭文尤高皆性素潔鄙薰澤靚妝不願歸人欲以學名家家亦不欲與寒鄉凡裔爲姻對聽其學若莘誨諸妹如嚴師著女論語十篇大抵準論語以章宣文君代孔子曹大家等爲顏冉推明婦道所宜若昭又爲傳申釋之貞元中昭義節度使李抱真表其才德宗召入禁中試文章并問經史大誼帝咨美悉留宮中帝能詩每與侍臣廣和五人者皆預凡進御未嘗不蒙賞又高其風操不以妾侍命之呼學士擢其父饒州司馬習藝館內教賜第一區加穀帛元和末若莘卒贈河內郡君貞元七年祕禁圖籍詔若莘總領穆宗以若昭尤通練拜尙宮嗣若莘所職歷憲穆敬三朝皆呼先生后妃與諸王主率以師禮見寶祿初卒贈梁國夫人以鹵簿葬若憲代司祕書文宗尙學以若憲善屬辭粹論議尤禮之太和中李訓鄭注用事惡宰相李宗閔譖言因駙馬都尉沈議厚賂若憲求執政帝怒幽若憲外第賜死家屬徙嶺南訓注敗帝悟其讒追恨之若倫若荀早卒廷芬男獨愚不可教爲民終身

敬宗貴妃郭氏右威衛將軍義之子失義何所人長慶時后以容選入太子宮太子卽位爲才人生晉王普帝以早得子又淑麗冠後廷故寵異之踰年爲貴妃贈義禮部尙書兄環少府少監賜大第文宗立愛

晉王若已子待妃禮不衰亡其薨年

武宗賢妃王氏邯鄲人失其世年十三善歌舞得入宮中穆宗以賜穎王性機悟開成末王嗣帝位妃陰爲助畫故進號才人遂有寵狀纖頰頰類帝每畋苑中才人必從袍而騎校服光侈略同至尊相與馳出入觀者莫知孰爲帝也帝欲立爲后宰相李德裕曰才人無子且家不素顯恐詒天下議乃止帝稍感方士說欲餌藥長年後寢不豫才人每請親近日陛下日煖丹言我取不死膚澤消槁吾獨憂之俄而疾侵才人侍左右帝熟視曰吾氣奄奄情慮耗盡顧與汝辭荅曰陛下大福未艾安語不祥帝曰脫如我言奈何對曰陛下萬歲後妾得以殉帝不復言及大漸才人悉取所常貯散遺宮中審帝已崩卽自經幄下當時殯媛雖常妬才人專上者返皆義才人爲之感慟宣宗卽位嘉其節贈賢妃葬端陵之柏城

宣宗元昭皇后量氏不詳其世少入邸最見寵荅及卽位以爲美人大中中薨贈昭容詔翰林學士蕭寶銘其窆具載生鄆王萬壽公主後夔昭等五王居內院而鄆獨出閣及卽位是爲懿宗外頗疑帝非長寶出銘辭以示外廷乃解帝追册昭容爲皇太后上尊諡詔后二等以上親悉官之配主宣宗廟自建陵曰慶陵置宮寢

懿宗惠安皇后王氏亦失所來咸通中册號貴妃生普王七年薨十四年王卽位是爲僖宗追尊皇太后册上諡號附主懿宗廟卽其園爲壽陵后屬繼以上帝悉官之

懿宗淑妃郭氏幼入鄆王邸宣宗在位春秋高惡人言立太子事王以嫡長居外宮心常憂懼妃護侍左右感安起居終得無恙生女未能言忽曰得活王驚異之及卽位以妃爲美人進拜淑妃女爲同昌公主下嫁韋保衡保衡處內宅妃以主故出入娛飲不禁是時譁言與保衡亂莫得其端僖宗立保衡緣七罪爲人所發且汙謗卒貶死妃猶處禁中黃巢之難天子出蜀倉卒妃不及從遂流落閭里不知所終

懿宗恭憲皇后王氏其出至微咸通中列后庭得幸生壽王而卒王立是爲昭宗追號皇太后上諡附主懿宗室卽故葬號安陵召后弟環官之景福初環位任寢重帝亦以外家倚之爲中尉楊復恭所媚表爲黔南節度使環之鎮道吉柏江復恭密喻楊守亮覆其家

昭宗皇后何氏梓州人系族不顯帝爲壽王后得侍婉麗多智恩荅厚甚旣卽位號淑妃從狩華州詔册爲皇后光化三年帝獵夜歸后遣德王還邸遇劉季述留王紫廷院明日季述等挾王陳兵召百官脅帝內禪后恐賊臣加害天子卽取璽授季述與帝同幽東宮賊平反正天復中從帝駐鳳翔李茂貞請帝勞軍不得已后從御南樓會朱全忠逼帝東遷后謂帝曰此後大家夫婦委身賊手矣涕數行下帝奔播旣屢威柄盡喪左右皆悍逆庸奴后侍膳服無須臾去側至洛帝憂忽與后相視無死所已而遇弑哀帝

卽位尊爲皇太后宮中不敢哭徙居積善宮號積善太后帝將禪天下后亦遇害初蔣玄暉爲全忠邀九錫入喻后度不免見玄暉垂泣祈哀以母子託命宣徽使趙殷衡譖於全忠曰玄暉等銘石像瘞積善宮將復唐全忠怒遂遣縊后以醜名加之廢爲庶人

唐書卷七十七

唐書卷七十七考證

肅宗章敬皇后吳氏傳生代宗爲嫡皇孫生之日帝臨澡之孫體孱弱負姆嫌陋更取他宮兒以進帝視之曰非爾所知趣取兒來于是見嫡孫帝大喜向日視之曰福過其父帝還盡留內樂宴具顧力士曰可與太子飲一日見三天子樂哉臣德潛按玄宗紀開元二十五年廢皇太子瑛二十六年立忠王瑒爲皇太子代宗紀開元十四年十二月十三日生于東都之上陽宮則代宗之生先于肅宗爲太子十有三年也烏得云一日見三天子預稱太子耶且其事亦不經其譌顯然

順宗莊憲皇后王氏傳十年崩年五十四○舊書元和十一年三月崩于南內之咸寧殿綱目亦同舊書憲宗懿安皇后郭氏傳宣宗立於后諸子也帝母鄭故侍兒有曩怨帝故奉養禮稍薄后鬱鬱不聊與一二侍人登勤政樓將自隕左右共持之帝聞不喜是夕暴崩○沈炳震曰舊書云宣宗繼統卽后之諸子也恩禮愈異于前朝兩書互異

穆宗恭僖皇后王氏傳太和五年宰相建白以太皇太后與寶祿太后稱號未辨云云○舊書在太和八年

宋 端 明 殿 學 士 宋 祁 撰

列傳第三

宗室

太祖八子長延伯次真次世祖皇帝次璋次繪次禕次亮

南陽公延伯蚤薨無嗣高祖武德中與六王同追封

謙王真從太祖戰歿無嗣

畢王璋仕周為梁州刺史與趙王祐謀殺隋文帝不克死生二子曰韶曰孝基韶死隋世武德時追封東

平王生子道宗

江夏郡王道宗字承範高祖即位授左千牛備身略陽郡公裴寂與劉武周戰度索原寂敗賊逼河東道

宗年十七從秦王討賊王登玉壁城以望謂道宗曰賊怙眾欲戰爾計謂何對曰武周席勝剡然鋒末可

當正宜以計摧之且烏合之眾憚持久若堅壁以頓其銳須食盡氣老可不戰禽也王曰而意與我合既

而賊糧匱夜引去追戰滅之出為靈州總管時梁師都弟洛仁連突厥兵數萬傳于曩道宗閉城守伺隙

出戰破之高祖謂裴寂曰昔魏任城王彰有郤敵功道宗似之因封任城王始突厥郁射設入居五原道宗逐出之震耀威武斥地贏千里貞觀元年召拜鴻臚卿遷大理太宗方經略突厥復授靈州都督三年爲大同道行軍總管助李靖破虜親執頡利可汗賜封六百戶還爲刑部尚書吐谷渾寇邊靖出崑崙道詔與侯君集爲靖副賊聞兵且至走嶂山數千里諸將欲止獨道宗請速追靖曰善君集未從道宗以軍師進去大軍十日及之吐谷渾拒險殊死鬪道宗陰引千騎超山乘其後賊驚遂大潰徙封江夏授鄂州刺史久之坐貪贓帝聞怒曰朕提四海之富士馬若林如使轍跡環天下游觀不度采絕域之玩海表之珍顧不得邪特以勞民自樂不爲也人心無藝當以誼制之今道宗已王稟賜多而貪不止顧不鄙哉乃免官削封戶以王就第明年召爲茂州都督未行拜晉州刺史遷禮部尚書侯君集破高昌還頗怨望道宗嘗從容奏言君集智小言大且爲戎首帝問所以知必反者對曰見其忌而矜功耻爲房李下官尚書常鬱鬱不平帝曰君集誠有功材無不堪朕寧惜爵位邪第未及耳不宜輕億度使自猜危既君集反帝笑曰如公素揣帝將討高麗先遣營州都督張儉輕騎度遼窺形勢儉畏不敢深入道宗請以百騎往帝許之約其還曰臣請二十日行留十日覽觀山川得還見天子因秣馬束兵旁南山入賊地相易險度營陣便處將還會高麗兵斷其路更走間道謁帝如期帝曰責育之勇何以過賜金五十斤絹千匹乃詔與

李勣爲前鋒濟遼拔蓋牟城會賊救至道宗與總管張君義領騎救四千虜十倍皆欲浚溝保險須帝至

道宗曰賊遠來其兵必疲我一鼓摧之固矣昔耿弇不以賊遺君父吾爲前軍當清道迎乘輿尙何待勳善之選壯騎數十突從賊營左右出入勳合擊大破之帝至咨美賜奴婢四十口乃築拒闕攻安市城闕毀傅城道宗失部分反爲賊據帝斬其果毅傅伏愛道宗跣行請罪帝曰漢武帝殺王恢不如秦穆公赦孟明遂置不問在陣傷足帝親加砭治賜御膳還以疾辭劇就閑改太常卿高宗永徽初房遺愛以反誅長孫無忌褚遂良與道宗有宿怨誣與遺愛善流象州道病薨年五十四無忌等得罪詔復爵邑道宗晚好學接士大夫不偃于貴國初宗室唯道宗孝恭爲最賢子景恆封盧國公相州刺史道宗弟道興武德初爵廣靈郡王以屬疏降封縣公貞觀九年爲交州都督以南方瘴癘恐不得年頗忽忽憂悵卒于官贈交州都督

永安壯王孝基武德初得王厯陝州總管鴻臚卿以罪奪官二年劉武周寇太原夏人呂崇茂以懸應賊詔孝基爲行軍總管攻之工部尚書獨孤懷恩內史侍郎唐儉陝州總管于筠隸焉筠請急攻城絕外援且當有變時懷恩挾異計給說孝基曰夏城堅攻之引日宋金剛在近內拒外疆一敗塗地不如頓兵待秦王破賊則夏自孤此謂不戰而屈人也孝基謂然會尉遲敬德至與崇茂夾彥官師遂大敗孝基及筠

等皆執於賊謀亡歸爲賊所害高祖爲發哀優賜其家晉陽平購尸不獲招魂以葬贈左衛大將軍及諡無子以兄子道立嗣封高平王後降封縣公終陳州刺史曾孫涵

涵簡素忠謹爲宗室備累授贊善大夫郭子儀表爲關內鹽池判官肅宗至平涼未知所從朔方留後杜鴻漸等條士馬倉廩使涵奉淺馳謁肅宗涵既見敷奏明辯肅宗悅除左司員外郎再遷宗正少卿寶應初河朔平涵方母喪哀持節宣慰所至州縣非公事未嘗言疏飯水飲席地以瞑使還固請終制代宗見其癯毀許之服除擢給事中遷兵部侍郎朱希彩殺李懷仙復宣慰河北還爲浙西觀察使居五歲入朝拜御史大夫京畿觀察使德宗嗣位以涵和易無所繩舉除太子少傅山陵副使以父諱徙光祿卿未幾遷左散騎常侍以尙書右僕射致仕累封襄武縣公卒贈太子太保子鯁貞元初爲饒州別駕妾高以善歌入宮緝因御醫許泳通書坐誅

雍王繪爲隋夏州總管子贊追爵河南王生道玄

淮陽壯王道玄性謹厚習技擊然進止都雅武德初例王年十五從秦王擊宋金剛於介州先登王壯之賞子良厚討王世充戰多寶建德屯虎牢王輕騎致賊遣道玄伏以待賊至走之轉戰汜水登南坂貫賊陣出其背復引還賊皆靡所發命中王喜以副騎給之每赴敵飛矢著身如蝟氣益厲東都平爲洛州總管府廳更授刺史俄爲山東道行軍總管討盜黑賊以多見襲黑賊再亂道玄率史萬寶戰下博越海馳約萬寶繼進萬寶素少之不肯前曰吾被詔以王兒子名大將而軍進退實在我今其輕鬪若大軍竭必陷淖莫如以王昭賊我結陣待之雖不利王而利國也道玄遂戰歿年十九萬寶至賊所乘舉軍潰身獨免太宗追悼曰自兵興兒常從我每見我深入輒克故慕之惜其少遠圖不究哀哉因流涕贈左驍衛大將軍及諡無子以弟道明嗣王遷左驍衛大將軍貞觀十四年與武衛將軍慕容寶節送弘化公主於吐谷渾坐漏言主非帝女奪王終鄆州刺史六世孫漢

漢字南紀少事韓愈通古學屬辭雄蔚爲人剛略類愈愈愛重以子妻之擢進士第累遷左拾遺敬宗侈宮室船賈獻沈香亭材帝受之漢諫曰以沈香爲亭何異瑤臺瓊室乎是時王政謬僻漢言切多所救補坐婢許出佐興元幕府文宗立召爲屯田員外郎史館修撰論次憲宗寶錄書宰相李吉甫事不假借子德裕惡之會李宗閔當國擢知制誥稍進御史中丞吏部侍郎初德裕貶袁州漢助爲排擠後德裕復輔政漢坐宗閔黨出爲汾州刺史宗閔再逐改州司馬詔有司不二十年不得用然不數歲徙絳州長史遂不復振大中時召拜宗正少卿卒始漢爲中丞表孔溫業爲御史及漢晚見召溫業已爲中丞每燕集人以爲榮

郇王禕為隋上儀同三司生子叔良德良幼良長平肅王叔良武德初例王鎮涇州捍薛仁果仁杲內史令翟長孫以衆降於是大饑米斗千錢叔良不恤士損糧以漁利下皆怨仁杲知之陽言食盡去遣高城人詭降叔良遣驃騎劉感受之未至城三烽發仁杲兵自南原諜而還大戰百里細川感為賊執叔良懼悉出金勞軍委事於長孫乃克安久之突厥入寇詔叔良率五將軍擊之中流矢道薨贈左翊衛大將軍靈州總管子孝協嗣

孝協始王范陽俄降為郇國公魏州刺史麟德中坐贓抵死司宗卿隴西王博父等為言於高宗求貸帝不許遂自殺弟孝斌為原州都督府長史生子思訓為江都令武后多殺宗室思訓棄官去中宗復位以書舊擢宗正卿封隴西郡公歷益州都督府長史開元初進彭國公加戶滿四百進右武衛大將軍卒贈秦州都督陪葬橋陵思訓善畫世所謂李將軍山水者弟思誨為揚州參軍事子林甫自有傳

新興郡王德良少以疾不任職薨贈涼州都督孫晉先天中為雍州長史治有名襲王坐豫太平公主謀被誅改氏厲晉就刑僚吏解唯司功參軍李撝從王如它日晉死哭其尸盡哀姚元崇歎曰樂向儔邪擢為尚書郎

長樂郡王幼良資暴急高祖數曉勸不悛有盜其馬者輒殺之帝怒曰盜信有罪王而專殺可乎詔禮部

侍郎李綱石宗室自朝堂杖之百乃釋去為涼州都督嘯不逞為左右市里苦之太宗立或告王陰養士交境外詔中書令宇文士及往代并接狀士及繩之急左右恐欲劫王由間道趨長安自明不即北奔突厥士及露劾帝復遣侍御史孫伏伽鞠視無異辭遂賜死六世孫回別傳

蔡烈王蔚為周朔州總管生子安哲
西平懷王安仕隋為右領軍大將軍封趙公武德時例王生子琛孝恭城瓌

襄武郡王琛字仲寶本訥少文隋義寧初封襄武郡公與太常卿鄭元璠持女伎聘突厥始畢可汗約和親始畢禮之贈遺蕃渥遣骨吐祿特勒隨琛入獻授刑部侍郎武德初始王歷利蒲絳三州總管宋金剛陷滄州稽胡多叛詔琛鎮隰州政寬簡為夷夏愛慕子儉襲王例降為公

河間元王孝恭少沈敏有識量高祖已定京師詔拜山南招慰大使徇巴蜀下三十餘州進擊朱粲破之俘其衆諸將曰粲徒食人摯賊也請阮之孝恭曰不然今列城皆吾寇若獲之則殺後渠有降者乎悉縱之繇是騰檄所至輒下明年拜信州總管承制得拜假當是時蕭銑據江陵孝恭數進策圖銑帝嘉納進

王趙郡以信州為夔州乃大治舟艦肄水戰會李靖使江南孝恭倚其謀遂圖江陵盡召巴蜀首領子弟收用之外示引擢而內實質也俄進荆湘道總管統水陸十二軍發夷陵破銑二鎮縱戰艦放江中諸將

曰得舟當濟吾用棄之反資賊奈何孝恭曰銑之境南際嶺左薄洞庭地險士衆若城未拔而援至我且有內外憂舟雖多何所用之今銑瀕江鎮戍見艦舫蔽江下必謂銑已敗不卽進兵覘候往返以引救期則吾旣拔江陵矣已而救兵到巴陵見船疑不進銑內外阻絕遂降帝悅遷荊州大總管詔圖破銑狀以進孝恭治荆爲置屯田立銅冶百姓利之遷襄州道行臺左僕射時嶺表未平乃分遣使者綏輯安慰其款附者四十有九州朝廷號令暢南海矣未幾輔公祏反寇壽陽詔孝恭爲行軍元帥討之引兵趨九江李靖李勣黃君漢張鎮州盧祖尚皆稟節度將發大饗士栝水變爲血坐皆失色孝恭自如徐曰禍福無基唯所召爾顧我不負於物無重諸君憂公祏禍惡貫盈今仗威靈以問罪栝中血乃賊臣授首之祥乎盡飲罷衆心爲安公祏將馮惠亮等拒險邀戰孝恭堅壁不出遣奇兵絕饑道賊饑夜薄營孝恭臥不動明日使羸兵扣賊壘挑之祖尚選精騎陣以待俄而兵卻賊追北且喜遇祖尚軍薄戰遂大敗惠亮退保梁山孝恭乘勝破其別鎮賊赴水死者數千計公祏窮棄丹陽走騎窮追生禽之江南平璽書褒美賜甲第一區女樂二部奴婢七百日寶玩不貲進授東南道行臺左僕射行臺廢更爲揚州大都督孝恭再破巨賊北自淮東包江度嶺而南盡統之欲以威重夸遠俗乃築第石頭城陳盧徵自衛或誣其反召還頗爲憲司鐫詰旣無狀赦爲宗正卿賜實封千二百戶歷涼州都督晉州刺史貞觀初爲禮部尚書改王河

間性奢豪後房歌舞伎百餘然寬恕退讓無利伐色太宗用是親重之宗室莫比也嘗謂人曰吾所居頗

壯麗非吾心也嘗別營一區令粗足充事而已吾歿後子也才易以守不才不爲它人所利十四年中歿
暴薨年五十帝哭之慟贈司空揚州都督及諡陪葬獻陵始隋亡盜賊徧天下皆太宗身自討定謀臣騎
帥並隸麾下無特將專勳者惟孝恭獨有方面功以自見云子崇義晦崇義嗣王降封譙國公歷蒲周二
州刺史益州都督府長史有威名終宗正卿晦乾封中爲營州都督以治狀聞璽書勞賜遷右金吾將軍
檢校雍州長史摧擢姦伏無留隱更下畏之高宗將幸洛詔晦居守謂曰關中事一以屬公然法令牽制
不可以成政法外苟可以利人者行之毋須以聞故晦治有異績武后時遷秋官尚書卒贈幽州都督
初晦第起觀閣下臨肆區其人候晦曰庶人不及以禮然室家之私不願外窺今將辭公晦驚遽毀徹之
子榮奉吳王恪祀

濟北郡王瑊武德中爲尚書左丞例王終始州刺史

漢陽郡王瓌始爲郡公進王高祖使持幣遺突厥頡利可汗言和親事頡利始見瓌僂甚瓌開說示以厚幣乃大喜改容加禮因遣使隨入獻名馬後復聘頡利謂其下曰前瓌來悔不少屈之當使拜我瓌何知之旣見頡利卽長揖頡利怒留不遣瓌意象自若不爲屈虜知不可劫卒以禮遣遷左武侯將軍代孝恭

爲荊州都督政務清靜嶺外酋豪數相攻環遣使諭威德皆如約不敢亂後例爲公長史馮長命者嘗爲御史大夫素貴事多專決環怒杖之坐免起爲宜州刺史散騎常侍薨

濟南郡王哲爲隋柱國備身將軍追王子瑗

廬江郡王瑗字德圭武德時例王累遷山南東道行臺右僕射與河間王孝恭合討蕭銑無功更爲幽州都督瑗素懦朝廷恐不任職乃以右領軍將軍王君廓輔行君廓故盜也其勇絕人瑗倚之許結婚寄心腹時隱太子有陰謀厚結瑗太子死太宗令通事舍人崔敦禮召瑗瑗懼有變君廓內險賊欲以計陷瑗而取己功卽謂瑗曰事變未可知大王國懿親受命守邊擁兵十萬而從一使者召乎且趙郡王前已屬吏今太子齊王又復爾大王勢能自保邪因泣瑗信之曰以命累公乃囚敦禮勒兵召北燕州刺史王銑與計事兵曹參軍王利涉說瑗曰王今無詔擅發兵則反矣當須權結衆心若諸刺史召之不至將何以全瑗曰奈何對曰山東豪傑嘗爲竇建德所用今失職與編戶夷此其思亂若旱之望雨王能發使使悉復舊職隨在所募兵有不從得輒誅之則河北之地可呼吸而有然後遣王銑外連突厥繇太原南趨蒲絳大王整駕西入關兩軍合勢不旬月天下定矣瑗從之以內外兵悉付君廓利涉以君廓多翻覆請以兵屬銑銑猶豫君廓密知之馳斬銑首詢于軍曰李瑗與王銑反銑敕使擅追兵今銑已斬獨瑗在無能爲也諸君從之且於瑗助我者官賞可得衆曰願言財刀出與子獨瑗之衆左右與百餘人出而呼曰瑗許亂諸君皆誑若何從之以取夷戮衆反走瑗罵君廓曰小人賣我行自及卽禽瑗縊之傳首

京師廢爲庶人絕屬籍

鄭孝王亮仕隋爲海州刺史追王生子神通神符

淮安靖王神通少輕俠隋大業末在長安會高祖兵興吏逮捕亡命入鄆南山與豪英史萬寶裴勣柳崇禮等舉兵應太原約司竹賊帥何潘仁連和進與平陽公主兵合徇鄆下之自署關中道行軍總管以萬寶爲副勣爲長史崇禮爲司馬令狐德棻爲記室從平京師爲宗正卿典兵宿衛王永康郡俄徙淮安武德初拜山東安撫大使黃門侍郎崔幹副之進擊字文化及于魏化及敗走聊城神通追北賊糧盡願降神通不肯受幹請納之神通曰師久暴露今賊食盡克不旦暮正當破之以玉帛酬戰力若降吾何所藉手幹曰竇建德危至而化及未平我轉側兩賊間勢必危王又貪其玉帛敗不日神通怒囚幹軍中會士及自濟北餽軍化及復振神通進兵薄其壘貝州刺史趙君德先登拔堞神通忌其功止軍不進君德然詣而還城復堅神通遣兵走魏州取攻具爲莘人所乘引却後二日建德拔聊城勢遂張山東州縣靡然歸之神通麾下多亡乃退保黎陽依李世勣俄爲建德所虜後與同安公主自賊歸及建德滅復授河北

行臺左僕射從平劉黑闥遷左武衛大將軍薨贈司空神通十一子得王者七人道彥孝譽孝同孝慈孝友孝節孝義皆降王孝逸爵公孝銳不得封有子齊物顯

膠東郡王道彥幼孝謹初神通避吏于鄆被疾山谷間累旬食盡道彥羸服丐人間或採野實以進神通未食不敢先卽有所分辭以飽乃藏弃以待高祖初封義興郡公例得王貞觀初爲相州都督徙岷州以父喪解荷土就墳躬時松柏偃廬柴毀雖親友不復識太宗嗟歎敕侍中王珪臨諭服除復拜岷州都督間遣入党項諭國威靈區落降從李靖擊吐谷渾詔道彥爲赤水道總管帝厚以利啖党項使爲鄉導其酋拓拔赤辭詣靖自言隋擊吐谷渾我資其軍而隋無信反見仇剽今將軍者無它我願資糧將復如隋乎諸將與歃血遺之道彥至關水見無備因掠其牛羊諸羌怨卽引兵障野狐峽道彥不得進爲赤辭所乘軍大敗死者數萬退保松州詔滅死謫戍邊久之召爲媯州都督卒贈禮部尙書初武德五年同封者孝譽爲高密王孝同淄川王孝慈廣平王孝友河間王孝節清河王孝義膠西王於是唐始興務廣支蕃鎮天下故從昆弟子凡勝衣以上皆爵郡王太宗卽位舉屬籍問大臣曰盡王宗子於天下可乎封德彝曰漢所封惟帝子若親昆弟其屬遠非大功不王如周郇滕漢賈澤尙不得節土所以別親疏也先朝一切封之爵命崇而力役多以天下爲私奉非所以示至公帝曰朕君天下以安百姓不容勞百姓以養己之親於是疏屬王者皆降爲公唯嘗有功者不降故道彥等並降封公

孝逸少好學頗屬文始封梁郡公高宗時四遷益州大都督府長史武后擅國入爲左衛將軍親遇之徐敬業稱兵以孝逸爲左玉鈐衛大將軍揚州行軍大總管帥師南討至淮而敬業已攻潤州遣弟敬猷壁淮陰僞將韋超據都梁山以拒孝逸超衆憑險完屯孝逸會諸將議曰賊今負山攻則士無所用力騎不得騎寇救死傷夷必衆不如偏旅綴之全軍趨揚州勢不數日可破支度使薛克構曰超雖據險然兵少若置小敵不擊無以示威拔衆以守則戰有關捨之則後憂不如擊之若克超淮陰自震淮陰破楚諸縣開門候官軍矣由是以趨江都逆首可取孝逸從之登山急擊超殺數百人薄暝解超夜走進擊敬猷淮陰破之敬業回軍下阿溪孝逸引兵直度敬業大敗遂拔揚州以功進鎮軍大將軍徙封吳國公威名稜然武承嗣等忌之以讒下遷施州刺史又使人騰惡語聞上武后信之以嘗有功貸死流儋州薨景雲初贈金州大都督孝同曾孫國貞

國貞父廣業爲劍州長史國貞剛鯁有利才乾元中由長安令遷河南尹史思明寇東都李光弼壁河陽國貞率官吏西走陝數月召爲京兆尹上元初拜劍南節度使召爲殿中監以戶部尙書持節朔方鎮西北庭興平陳鄭節度行營兵馬及河中節度都統處置使治于絳尋加晉絳慈隰沁等州觀察處置使既

至糧乏而所儲陳腐民貧不忍遽斂上書以聞而軍中譏謗突將王振乘衆怨給曰具畚鍤以待役事衆皆怒夜燒牙門左右奔告請避之國貞曰吾被命爲將其可棄城乎因請乃逃獄中振引衆劫取之置食其前曰食是而從其力可乎國貞曰與爾等方討賊何事役爲正緣儲食腐儉已請諸朝吾何所負衆服其言且引去振曰都統不死吾曹殆矣遂害之并殺其二子及三大將有詔以郭子儀代之國貞清白善用法世稱辨吏然峻於操下故其衆思得子儀而振因肆其惡及子儀至振自謂且見德子儀怒曰汝隲賊境而害主將賊若乘虛是無絳矣又欲爲功乎卽斬以徇詔贈國貞揚州大都督子錡自有傳

孝節曾孫鬻少孤事母孝始爲枝江丞荊州長史張柬之曰帝宗千里駒吾得其人累擢衛尉少卿母喪柴瘠訖除家人未嘗見言笑與兄昇弟暈相友開元初爲汝州刺史政嚴簡有治稱昆弟繇東都候之輒羸服往州人無知者其清慎舉如此四遷至黃門侍郎檢校太原以北諸軍節度使太原俗爲浮屠法者死不葬以尸棄郊飼鳥獸號其地曰黃阡有狗數百頭習食糞頗爲人患更不敢禁鬻至遣捕羣狗殺之申厲禁條約不再犯遂革其風二十一年以工部尙書持節使吐蕃既還金城公主請明疆場表石赤嶺上盟遂堅定還以奉使稱指再遷吏部尙書美風儀以莊重稱當時有宰相望累爲太子少傅武都縣伯卒贈益州大都督暈至太僕少卿暈子進亦知名好從當世賢士游關人之急累擢給事中至德初從廣

平王東征以工部侍郎署雍王元帥府行軍司馬爲回紇鞭之幾死遷兵部卒贈禮部尙書

孝節四世孫說字巖甫父遇及天寶時爲御史中丞東畿採訪使說以蔭補率府兵曹參軍馬燧節度太原辟署少尹遷汾州刺史李自良代燧復奏爲少尹大將張瑤得士心嘗請告未許而自良卒說與監軍王定遠祕其喪前給瑤告以毛朝陽代之然後告喪詔以通王爲節度大使授說行軍司馬節度留後定遠自以有勞於說頗橫恣請別賜印監軍有印自定遠始於是擅補吏易置諸將彭令齒者以久勞不服定遠怒殺之埋馬屎中其家請尸不許舉軍怨說上其事德宗以奉天扈從功恕死免官詔未至定遠謀刺說說走而免定遠召諸將出笥中詔書給曰詔以李景略知留後召說還公等皆有除諸將欲拜大將馬良輔呼曰妄言也不可受定遠懼走乾陽樓召麾下皆不至自投下死說盡斬同謀者乃安擢說檢校禮部尙書節度使累封隴西縣男說精于職築天成軍邊備積完晚被疾不能事軍幾亂卒贈尙書右僕射

齊物字道用天寶初擢累陝州刺史開砥柱通漕路發重石下得古鐵戟若鐔然銘曰平陸上之詔因以名縣遷河南尹坐與李適之善貶竟陵太守還遷京兆尹太子太傅兼宗正卿卒贈太子太師性苛察少恩嘗發人私然潔廉自喜吏無敢欺者急陝尉裴冕械而折愧之及冕當國除齊物太子賓客世善冕能

損怨云子復

復字初陽以蔭仕累爲江陵司錄參軍衛伯玉才之表江陵令遷少尹歷饒蘇二州刺史李希烈叛荆南節度使張伯儀數爲賊窘朝廷以復在江陵得士心卽母喪奪爲少尹充行軍司馬佐伯儀會伯儀罷改容州刺史兼本管招討使先是西原亂吏獲反者沒爲奴婢長役之復至使訪親戚一皆原縱在容三年人賴以安轉嶺南節度使時安南經略使高正平張應繼卒其佐李元度胡懷義等因阻兵脅州縣肆爲姦賊復至誘懷義杖死流元度南裔肅然教民作陶瓦鑄諭蠻獠收瓊州置都督府以綏定其人召拜宗正卿歷華州刺史貞元十年鄭滑節度使李融卒軍亂以復檢校兵部尚書代融節度復下令墾營田以稟其軍而賦不及民衆悅加檢校尚書右僕射卒年五十九贈司空諡曰昭復更方鎮所在稱治然頗嗜財爲世所譏從父若水爲左金吾大將軍兼通事舍人容貌瓌偉在朝三十年多識舊儀每宣勞揖贊進止閑華有可觀者

襄邑恭王神符字神符少孤事兄謹高祖興兵神符留長安爲衛文昇所囚京師平封安吉郡公帝受禪

例王遷并州總管頡利可汗盜邊神符與戰汾東斬級五百獲馬二千又戰沙河獲乙利達官得可汗所

乘馬及鐵召爲大府卿遷揚州大都督自丹陽度江始隋江都故郡揚人利之然少威嚴不爲下所畏累

遷開府儀同三司永徽二年薨年七十三贈司空荊州都督陪葬獻陵子七人並爵郡王例降公惟德懋

文疎知名德懋官少府監臨川郡公五世孫從晦文疎幽州都督魏國公垂拱中坐累貶藤州別駕誅子

挺捷捷襲封挺會孫程捷會孫石別傳從晦祖模仕至德中爲猗氏令史思明陷洛陽賊帥掠諸縣模率

衆拒平之稍遷黔中觀察使終太子賓客贈太子太保諡曰敬從晦寶祿初及進士第擢累太常博士甘

露之禍御史中丞李孝本被誅從晦以族昆弟貶朗州司戶參軍改澶王府諮議分司東都忌者重發前

坐下遷亳州司馬久乃轉吏部郎中兼侍御史知雜事出爲常州刺史鎮海軍節度使李琢表其政賜金

紫歷京兆尹工部侍郎山南西道節度使又以最就進銀青光祿大夫卒年六十三贈吏部尚書從晦姿

質偉岸所至以風力聞少與崔龜從李景讓裴休善獎目後進名知人楊收方布衣進謁從晦一見如雅

識卽待以公輔後果宰相

世祖四子長曰澄次湛次洪次高祖神堯皇帝

梁王澄蚤薨無嗣武德初與二王同追封

蜀王湛生子博父奉慈

乾隆四年校刊

唐書卷七十八列傳

九

隴西恭王博父武德初與奉慈例王高宗時擢累禮部尚書特進驕侈不循法度伎妾數百曳羅紉甘梁肉放於聲樂以自娛其弟奉慈亦荒縱皆爲帝所鄙嘗曰吾仇人有善且用之況親戚乎王等昵小人專爲不軌先王墳典不聞學何以爲善哉各賜市書絹二百疋以愧切之然不自克也薨贈開府儀同三司荊州都督

渤海敬王奉慈顯慶時爲原州都督薨七世孫戡

戡字定臣幼孤年十歲卽好學大寒掇薪自炙夜無然膏默念所記年二十明大經舉進士就禮部試更唱名乃入戡恥之明日徑返江東隱陽羨里陽羨民有鬪爭不決不之官而詣戡以辨凡論著數百篇常惡元和有元白詩多纖艷不逞而世競重之乃集詩人之類夫古者斷爲唐詩以譏正其失云平盧節度使王彥威表爲巡官府遷還洛陽卒

贊曰景元子孫當草昧之初乘運而奮方高祖攘除四方所以宣力皆顯顯爲世豪英至河間之功江夏之略可謂宗室標的者也始唐興疏屬畢王至太宗稍稍降封時天下已定帝與名臣蕭瑀等喟然講封建事欲與二代比隆而魏徵李百藥皆謂不然徵意以唐承大亂民人彫喪始復生業遽起而瓜分之故有五不可之說百藥稱帝王自有命祚之短長不緣封建又舉春秋二百四十二年之禍亟於哀平桓

靈而詆曹元首陸士衡之言以爲繆悠而顏師古獨議建諸侯當少其力與州縣雜治以相維持然天子由是罷不復議至名儒劉秩目武氏之禍則建論以爲設爵無土署官不職非古之道故權移外家家廟絕而更存存之之理在取順而難逆絕之之原在單弱而無所憚至謂郡縣可以小盜不可以久安大抵與曹陸相上下而杜佑柳宗元深探其本據古驗今而反復焉佑之言曰夫爲人置君欲其蕃息則在郡縣然而主祚常促爲君置人不病其寡則在建國然而主祚常永故曰建國利一宗列郡利百姓且立法未有不敝者聖人在度其患之長短而爲之建國之制初若磐石然敝則鼎峙力爭陵遲而後已故爲患也長列郡之制始天下一軌敝則世崩俱潰然而戡定者易爲功故其爲患也短又謂三王以來未見郡縣之利非不爲也後世諸儒因泥古疆爲之說非也宗元曰封建非聖人意然而歷堯舜三王莫能去之非不欲去之勢不可也秦破六國列都會置守宰據天下之圖攝制四海此其得也二世而亡有由矣暴威刑竭人力天下相合劫令殺守圜視而並起時則有叛民無叛吏漢矯秦枉剖海內立宗子功臣數十年間奔命扶傷不給時則有叛國無叛郡唐興制州縣而桀黠時起失不在州而在於兵時則有叛將無叛州以爲矯而革之垂二百年不在諸侯明矣又言湯之興諸侯歸者三千資以勝夏武王之興會者八百資以滅商徇之爲安故仍以爲俗是湯武之不得已也不得已非公之大也私其力於己也秦革之者

其爲制公之大者也其情私也然而公天下之端自秦始云觀諸儒之言誠然然建侯置守如質文遞救亦不可一槩責也救土崩之難莫如建諸侯削尾大之勢莫如置守宰唐有鎮帥古諸侯比也故王者視所救爲之勿及於敝則善矣若乃百藥推天命佑言郡縣利百姓而主胙促乃臆論也

唐書卷七十八

唐書卷七十八考證

長樂郡王幼良傳帝遣侍御史孫伏伽鞠視無異辭遂賜死○臣德潛按舊書帝令宇文士及代爲都督並按其事士及慮其爲變遂殺之

河間元王孝恭傳帝嘉納進王趙郡○沈炳震曰進王者由公爵而進王也今上文拜信州總管似闕中間公爵一層

孝逸傳以嘗有功貸死流儋州薨○臣德潛按則天紀天授元年五月殺梁郡公孝逸似紀傳互異襄邑恭王神符傳文陳幽州都督魏國公○舊書作郡公

宋 端 明 殿 學 士 宋 祁 撰

列傳第四

高祖諸子

高祖二十二子竇皇后生建成太宗皇帝玄霸元吉萬貴妃生智雲莫嬪生元景孫嬪生元昌尹德妃生元亨張氏生元方郭婕妤生元禮宇文昭儀生元嘉及第十九子靈夔王才人生元則張寶林生元懿張美人生元軌楊美人生鳳劉婕妤生元慶崔嬪生元裕小楊嬪生元名楊嬪生元祥魯才人生元曉柳寶林生元嬰

隱太子建成小字毗沙門資簡弛不治常檢覈色嗜酒耽獵無度所從皆博徒大俠隋末高祖被詔捕賊汾晉間留建成護家居河東高祖已起兵密召與元吉赴太原隋人購之急從間道至授左領軍大都督封隴西郡公引兵略定西河從平京師唐國建為世子開府置官屬又遷撫軍大將軍為東討元帥將萬人徇洛陽授尚書令高祖受禪立為皇太子詔率將軍桑顯和擊司竹羣盜平之涼州人安興貴殺李軌以衆降詔趣原州應接建成素驕不恤士雖甚暑晝夜馳獵衆不堪其勞亡者過半帝欲其習事乃敕非

軍國大務聽裁決之又以李綱鄭善果爲官官參謀議稽胡劉成寇邊詔建成進討破之鄜州斬虜千計引渠長悉官之使還招羣胡成與它大帥降建成畏其衆給欲城州縣者使降胡操築陰勒兵殺六千人成奔梁師都嘗循行北邊遇賊四百出降悉誅其耳縱之中允王珪洗馬魏徵以帝初興建成不知謀而秦王數平劇寇功冠天下英豪歸之陰許立爲皇太子勢危甚會劉黑闥亂河北珪等進說曰殿下特以嫡長居東宮非有功德爲人所稱道今黑闥叛殘孽衆不盈萬利兵鏖之唾手可決請往討因結山東英俊心自封殖建成遂請行黑闥敗洛水建成即徵曰山東其定乎對曰黑闥雖敗殺傷太甚其魁黨皆縣名處死妻子係虜欲降無繇雖有赦令獲者必戮不大蕩宥恐殘賊嘯結民未可安旣而黑闥復振廬江王瑗棄洛州山東亂命齊王元吉討之有詔降者赦罪衆不信建成至獲俘皆撫遣之百姓欣悅賊懼夜奔兵追戰黑闥衆猶盛乃縱囚使相告曰禡而甲追鄉里若妻子獲者旣已釋矣衆乃散或縛其渠長降遂禽黑闥帝晚多內寵張婕妤尹德妃最幸親戚分事宮府建成與元吉通謀內結妃御以自固當是時海內未定秦王數將兵在外諸妃希所見及洛陽平帝遣諸妃馳閤後宮見府庫服玩皆私有求索爲兄弟請官秦王已封帑簿及官爵非有功不得妃媛曹怨一會爲陝東道行臺有詔屬內得專處決王以美田給惟安王神通而張婕妤爲父丐之帝手詔賜田詔至神通已前得不肯與婕妤妾曰詔賜妾父田而王奪與人帝怒召秦王讓曰我詔命不如爾教邪悅曰謂裴寂曰兒久典兵爲儒生所誤非復我昔日秦府屬杜如晦騎過尹妃父門恚其傲率家童掉毆折一指父懼即使妃前訴秦王左右暴其父帝不察大怒詰王曰兒左右乃凌我妃家況百姓乎王自辨曉訖不置繇是見疏帝召諸王燕秦王感母之不及有天下也偶獨泣帝顧不樂妃媛因得中傷之爲建成游說曰海內無事陛下春秋高當自娛秦王輒悲泣正爲嗔息妾屬耳使陛下萬歲後王得志妾屬無遺類東宮慈愛必能全養乃皆悲不自勝帝惻然遂無易太子意突厥入寇帝議遷都秦王苦諫止建成見帝曰秦王欲外禦寇沮遷都議以久典兵而謀篡奪帝懷不悅初帝令秦王居西宮承乾殿元吉居武德殿與上臺東宮晝夜往來皆攜弓刀相遇如家人禮由是皇太子令秦齊二王教與詔敕雜行內外懼莫知所從建成等私募四方驍勇及長安惡少年二千人爲宮甲屯左右長林門號長林兵又令左虞候率可達志募幽州突厥兵三百內宮中將攻西宮或告於帝帝召建成責之乃流達志嵩州華陰楊文幹素凶詖建成昵之使爲慶州總管遣募兵送京師欲爲變時帝幸仁智宮秦王元吉從建成謂元吉曰秦王且徧見諸妃彼金寶多有以賂遺之也吾安得箕踞受禍安危之計決今日元吉曰善乃命郎將爾朱煥校尉橋公山齋甲遺文幹趣興兵煥等懼至幽鄉白反狀靈州人杜鳳亦上變帝遣司農卿宇文穎驛召文幹元吉陰結穎使告文幹文幹遽率

兵反帝以建成首謀未忍治卽詔捕王珪魏徵及左衛率韋挺舍人徐師謩左衛車騎馮世立欲殺之以薄太子罪乃手詔召建成建成懼不敢往師謩勸遂舉兵詹事主簿趙弘智諫建成損車服輕往謝罪乃詣行在所未至屏官屬徑入謁叩頭請死投身於地不能起帝怒夜囚幕中使兵衛守會文幹陷靈州帝驚以宮近賊夜率衛士南趣山行十餘里明乃還宮召秦王問計對曰文幹豎子耳官司當卽禽之就使假刻漏之久正須遣一將可辦帝曰事連建成恐應者衆爾自行還吾以爾爲太子使建成王蜀蜀地狹不足爲變若不能事汝取之易也秦王率衆趣靈州文幹爲其下所殺以其首降執宇文穎送京師秦王之行元吉及內嬖更爲建成請封德彝亦陰說帝由是意解復詔建成居守但責兄弟不相容而謫王珪韋挺天策兵曹參軍杜淹於遠方然怨猜日結建成等召秦王夜宴毒酒而進之王暴疾路血數升淮安王扶掖還宮帝問疾因敕建成秦王不能酒毋夜聚又謂秦王曰吾起晉陽平天下皆爾力將定東宮爾亟讓故成而美志又太子立多歷年吾重奪之觀而兄弟終不相下同在京師忿鬪且深爾還洛陽行臺自陝以東悉主之建天子旌旗如梁孝王故事王泣曰非所願也不可遠滕下帝曰陸賈漢臣也猶遞過諸子況我天下主東西兩宮思汝卽往何所悲邪王將行建成等謀曰秦王得土地甲兵必爲患留之京師一匹夫耳因密使人說帝言秦王左右皆山東人聞還洛皆恟然喜觀其意不復來矣事果寢俄而突厥寇邊太子薦元吉北討欲因其兵作亂長孫無忌房玄齡杜如晦屬還敬德侯君集等勸秦王先圖之王乃密奏建成等與後宮亂因曰臣無負兄弟今乃欲殺臣是爲世克建德復仇使臣死雖地下愧見諸賊帝大驚報曰旦日當窮治而必早參張婕妤馳語建成乃召元吉謀曰請勒宮甲詎疾不朝建成曰善然不共入朝事何繇知遲明乘馬至玄武門秦王先至以勇士九人自衛時帝已召裴寂蕭瑀陳叔達封德彝宇文士及竇誕顏師古等入建成元吉至臨湖殿覺變遽反走秦王隨呼之元吉引弓欲射不能發者三秦王射建成卽死元吉中矢走敬德追殺之俄而東宮齊府兵三千攻玄武門閉不得入接戰久之矢及殿屋王左右數百騎至合擊之衆遂潰帝謂裴寂等曰事今奈何蕭瑀陳叔達曰臣聞內外無限父子不親失而弗斷反蒙其亂建成元吉自草昧以來未始與謀旣立又無功德疑貳相濟爲蕭牆憂秦王功蓋天下內外歸心立爲太子付軍國大務陛下釋重負矣帝曰此吾志也乃召秦王至慰撫之曰朕幾有投杼之惑秦王號泣不能止建成死年三十八長子成宗爲太原王早卒承道安陸王承德河東王承訓武安王承明汝南王承義鉅鹿王皆坐誅詔除建成元吉屬籍其黨疑懼更相合廬江王瑗遂反乃下詔建成元吉瑗支黨不得相告許由是遂安太宗立追封建成爲息王諡曰隱以禮改葬詔東宮舊臣皆會帝於宜秋門哭之以子福爲後十六年追今贈宇文穎者代人自李密所來降爲農圃監封化政郡公

性貪昏與元吉厚善故豫文幹謀事敗帝責曰朕以文幹叛故遣卿乃同逆邪顧無以對斬之
衛懷王玄霸字大德幼辯慧隋太業十年薨年十六無子武德元年追王及諡又贈秦州總管司空以太
宗子泰爲宜都王奉其祀葬芷陽泰徙封越更以宗室西平王瓊子保定嗣薨無子國除

巢刺王元吉小字三胡高祖兵已西留守太原封姑臧郡公進齊國總十五郡諸軍事加鎮北將軍太原
道行軍元帥帝授禪進王齊爲并州總管初元吉生太穆皇后惡其貌不舉侍媼陳善意私乳之及長猜
鷲好兵居邊久益驕侈常令奴客諸妾數百人被甲習戰相擊刺死傷甚衆後元吉中創善意止之元吉
患命壯士拉死私諛慈訓夫人劉武周略汾晉詔遣右衛將軍宇文歆助守元吉喜鷹狗出常載置罔三
十車曰我寧三日不食不可一日不獵夜潛出淫民家府門不閉歆驟諫不納乃顯表於帝曰王數出與
竇誕縱獵蹂民田縱左右攘斂畜產爲盡每射於道觀人避矢以爲樂百姓怨毒不可與共守有詔召還
元吉密諷民詣闕請乃得歸武周以五千騎屯黃蛇嶺元吉使將軍張達以步卒百人嘗寇達辭兵少疆
之至則盡沒達怒導武周陷榆次元吉保祁賊急攻之遁還并州賊張甚元吉給司馬劉德威曰公以老
弱守吾率銳士拒賊因齎寶物攜妻妾夜出委軍奔京師并州陷帝怒自是嘗令從秦王征討不復顯軍
矣尋授侍中襄州道行臺尚書令穰州刺史秦王圍東都賈德來援王以精騎逆戰留元吉屈突通守
而世充易之輒出兵元吉設伏劫之斬首八百級禽其將東都平拜司空賜良冕服鼓吹二部班劍二十
人黃金二千斤與太子秦王得三鑪鑄錢累進司徒兼侍中并州大都督時秦王有功而太子不爲中外
所屬元吉喜亂欲并圖之乃構於太子曰秦王功業日隆爲上所愛殿下雖爲太子位不安不早計還踵
受禍矣請爲殿下殺之太子不忍元吉數諷不已許之於是邀結宮掖厚賂中書令封德彝使爲游說帝
遂疏秦王愛太子元吉乃多匿亡命壯士厚賜之使爲用元吉記室參軍榮九思爲詩刺之曰丹青飾成
慶玉帛禮專諸元吉見之弗悟也其典籤裴宣儼免官往事秦府元吉疑事泄鳩殺之自是人莫敢言秦
王嘗從帝幸元吉第伏護軍宇文寶寢內將以刺王太子固止之元吉愠曰爲兄計於我何害突厥郁射
設入圍烏城建成薦元吉北討乃多引秦王府驍將秦叔寶尉遲敬德程知節段志玄與行又籍秦府精
兵益麾下帝知之不能禁元吉承間密請害秦王帝曰是有定四海功殺之無名元吉曰王昔平東都顧
望不卽西散金帛樹私惠豈非反邪帝不應太子與元吉謀兵行吾與秦王至昆明池伏將士拉之以暴
卒聞上無不信然後說帝付吾國吾以爾爲皇太弟而盡擊殺叔寶等率更令王暉密以謀告秦王王召
僚屬謀皆曰元吉戾狠使得志且不能事其兄往者護軍薛寶以元吉字合之其文成唐元吉喜曰但除
秦王取東宮如反掌耳爲亂未克已復傾奪大王不蚤正之社稷非復唐有秦王由是定計死年二十四

子承業爲梁郡王承鸞漁陽王承獎曹安王承裕江夏王承度義陽王並伏誅貞觀初改葬追爵海陵郡王及諡後改封業以曹王明嗣

楚哀王智雲初名稚詮善射工書突隋大業末從建成高祖初建成走太原吏捕智雲送長安爲陰世師所害年十四武德元年追王及諡母萬貴妃性恭順爲帝所禮宮中事一一咨決三年以太宗子寬爲嗣又贈涼州總管司徒寬早薨國除貞觀二年復以濟南公世都子靈龜嗣歷魏州刺史爲政威嚴盜賊不發鑿永濟渠通新市百姓利之薨子福嗣降爲公卒子承況嗣神龍中爲右羽林將軍同節愍太子死于難

荆王元景武德三年始王趙與魯鄂二王同封貞觀初累遷雍州牧十年徙封荆明年詔荆州都督荆王元景梁州都督漢王元昌徐州都督徐王元禮潞州都督韓王元嘉遂州都督彭王元則鄭州刺史鄭王元懿絳州刺史霍王元軌虢州刺史虢王鳳豫州刺史道王元慶鄧州刺史鄧王元裕壽州刺史舒王元名幽州都督燕王靈夔蘇州刺史許王元祥安州都督吳王恪相州都督魏王泰齊州都督齊王祐益州都督蜀王愔襄州刺史蔣王暉揚州都督越王貞并州都督晉王治秦州都督紀王慎所任州刺史并功臣令世世襲會長孫無忌等固讓遂廢不行徙鄭州永徽初進位司徒賜實封至千五百戶房遺愛謀反

子與在遺愛時與王亦擢罪高宗謂大臣曰朕欲從公可赦及見死兵部侍郎崔敦禮曰陛下雖申恩不可誦天下法遂賜死久之追封沈黎王以渤海王奉慈子長沙嗣降爲侯神龍初復王爵以孫元述嗣薨無子國除

漢王元昌初王魯累遷梁州都督後徙封漢有勇力善騎射數觸軌憲太原手詔誨督乃怨望附太子承乾通饋謝來朝京師宿東宮嘗有醜語又見帝側有宮人善琵琶乃曰事成幸賜我承乾許之割臂血盟事敗帝弗忍誅欲免死高士廉李勣等固爭不奉詔乃賜死國除

鄭悼王元亨貞觀二年授金州刺史之藩太宗憐其幼思之數遣使爲勞問賜金醴以娛樂之六年薨無子國除

周王元方武德四年始王與鄭宋荆滕四王同封貞觀二年薨無子國除

徐康王元禮性恭畏善騎射始王鄭卽授鄭州刺史後徙王徐遷徐州都督爲絳州刺史有治名璽書勞勉實封至千戶永徽中加司徒兼潞州刺史薨贈太尉冀州大都督陪葬獻陵三子茂爲淮南王餘爵公茂險薄無行初元禮疾姬趙有美色茂逼蒸之元禮切責茂恚屏侍衛藥膳曰爲王五十年足矣何服藥爲以不食薨茂嗣上元中事洩流死振州神龍初以茂子瓘嗣開元中爲宗正員外卿薨子延年嗣拔汗

那王入朝廷年將以女嫁之爲右相李林甫劾奏貶文安郡別駕終餘杭司馬國除永泰初延年增黔中觀察使趙國珍言諸朝詔以其子諷嗣王

韓王元嘉字元嘉始王宋後改王徐爲潞州刺史母昭儀宇文述女也寵於高祖既卽位欲立爲后固辭元嘉以母寵故特爲帝愛後出諸子無及者在潞時年十五聞太妃病涕泣不食居喪毀甚太宗數慰勉少好學藏書至萬卷皆以古文字參定同異與弟靈夔友愛燕見終日如布衣禮閨門修整當世稱之貞觀九年更封韓遷滑州都督高宗末爲澤州刺史武后得政進授太尉徙定州刺史以霍王元軌爲司徒舒王元名爲司空滕王元嬰開府儀同三司魯王靈夔太子太師越王貞太子太傅紀王慎太子太保外示尊寵而內將圖之垂拱中元嘉徙絳州刺史與子讓及越王子沖糾合宗室同舉兵未發會武后詔宗室朝明堂元嘉遣使告諸王曰大享後太后必盡誅諸王不如先事起不然李氏無種矣乃爲中宗詔督諸王發兵沖卽以兵五千攻濟州而諸王倉卒兵不至遂敗元嘉至京師謀泄后逼令自殺年七十詔改氏元嘉魯王越王爲虺元嘉六子訓潁川王誼武陵王讓上黨公番卒讓黃公工爲辭章孟利貞嘗稱其文曰劉隣之周思茂不過也出爲通州刺史辭疾歸且謀應越王也讓通音律歷杭州別駕與讓俱死時籍沒者衆惟沖讓家書爲多皆文句詳正祕府所不及神龍初追復元嘉爵土以第五子訥嗣薨子叔瓌嗣

唐書元嘉子叔瓌中改王軍後薨宗以軍王自復改嗣韓王云

彭思王元則字彞初王荆出爲夔州刺史貞觀十年徙王爲遂州都督以冠服奢僭免久之爲澧州刺史更折節厲行薨贈司徒荆州大都督陪葬獻陵高宗登望春宮過其喪哭之慟無子以霍王子絢嗣龍朔中封南昌王薨子志陳嗣開元中爲宗正卿

鄭惠王元懿始王滕貞觀中出爲兗州刺史徙王歷鄭潞絳三州刺史實封千戶喜經術數斷大獄務寬平高宗嘉之靈詔襲錫薨贈司徒荆州大都督陪葬獻陵十子長子璫嗣王爲鄂州刺史薨子希言嗣開元中爲右金吾大將軍再爲太子詹事弟察言生二子曰自仙嗣自仙爲楚州別駕生夷簡嗣爲陳留公生宗閔璫弟琳安德郡公生擇言擇言生勉勉宗閔夷簡皆位宰相別有傳時稱小鄭王後亦曰惠鄭王後以別鄭王亮云

霍王元軌武德六年始王蜀與幽漢二王同封後徙吳多材藝高祖愛之太宗嘗問羣臣曰朕子弟孰賢魏徵曰臣愚不盡知其能唯吳王數與臣言未嘗不自失帝曰朕亦器之然卿以爲前代孰比對曰經學文雅漢河間東平也至孝行曾閔不能過帝由是遇益厚詔納徵女爲妃嘗從獵遇羣豕帝使射之管不虛數豕爲盡帝撫其背曰爾藝過人顧今無所施方天下未定得若豈不用乎貞觀七年爲壽州刺史高

祖崩去官毀瘠甚服除遂茶食布衣終身至忌日輒累晝不食十年徙王歷絳徐定三州刺史實封至千戶所至閉閣讀書以吏事委長史司馬謙慎未嘗與物忤數引見處士劉玄平爲布衣交或問王所長於玄平答曰無長問者不解玄平曰人有短所以見長若王無所不備吾何以稱之突厥寇定州元軌令開城門偃旗幟虜疑不敢入夜遁州人李嘉運潛結賊詔窮誅支黨元軌以寇近且強人心危但殺嘉運餘無所詰因自劾帝喜曰朕固悔之非王之明幾失定州矣王文操者與賊戰敗二子鳳賢更以身蔽父得全二子死縣抑不爲言元軌廉知之遣使弔祭上其事詔贈鳳賢朝散大夫旌禮其閔元軌每朝數上疏陳得失多所裨正帝尊重之有大事常密驛咨逮帝崩與侍中劉齊賢同知山陵事元軌淹練故事齊賢歎曰是非吾等及已嘗遣國令督封租令請貿易取贏答曰汝當正吾失反誅吾以利邪不納進司徒出爲襄青二州刺史越王敗坐嘗通謀徙黔州檻車載至陳倉薨六子緒爲江都王純安定王餘皆爵爲公緒有名譽爲金州刺史誅神龍初並復官爵以緒孫暉嗣王開元中爲左千牛員外將軍

號莊王鳳字秀成始王幽爲鄧州刺史俄徙王歷號豫青三州刺史實封千戶喜畋游遇官屬尤嬖使奴蒙虎皮怖其參軍陸英俊幾死因大笑爲樂薨贈司徒揚州大都督陪葬獻陵七子長子翼嗣爲平陽王翼子寓嗣寓無子爵不傳次子茂融以勇聞垂拱中爲申州刺史黃公譏與越王謀舉兵倚以爲助時詔諸王公赴東都茂融私問所親高子貢子貢報曰來必死乃稱疾不朝以俟兵期及得越王書

應僚屬勸白其書擢太子右贊善大夫俄爲黨屬所引誅中宗更以鳳孫嵩嗣王娶韋后妹累遷祕書監知隴右三使仗內諸廐徙王汴未幾韋氏敗豈殺其妻送首於朝議者鄙之削爵貶沁州刺史不事後復爵還戶二百累遷衛尉卿薨子巨嗣巨剛銳果決略通書史好屬辭天寶五載出爲西河太守坐資給柳勣支黨貶義陽司馬明年御史中丞楊慎矜得罪其附離史敬忠與巨善巨坐免官錮置南賓郡召拜夷陵太守安祿山陷東京玄宗方擇將帥張垪言巨有謀可屬大事召至京師楊國忠忌之謂人曰小兒詎可使對天子踰月不得見帝知之召入禁中對合旨帝大悅敕宰相與語久不得罷國忠急謂巨曰比來人多口打賊君不爾乎巨曰誰爲相公手打賊者乎乃授陳留譙郡太守攝御史大夫河南節度使明日謝帝驚曰何攝爲即詔兼御史大夫巨奏方艱難時賊多詐有如陛下召臣何以取信乃析契授之俄兼統嶺南何履光黔中趙國珍南陽魯兪三節度使事時兪戰數屈詔貶爲果毅以來瑱代之巨奏兪若能存孤孺是補過則何以處之帝曰卿隨所處置巨至內鄉賊將畢思琛解圍走遂趣南陽貶兪白衣從軍其暮稱詔復職京師平拜留守兼御史大夫明年拜太子少師兼河南尹東畿採訪使征乘牛之出入市者斥所得佐用度然稍自盜沒其妃即張皇后從女弟內不睦巨選府縣官備使令妃亦引蒲博少年

分黨招賈賄撓政事宗正卿李遵素私張發巨賊事貶遂州刺史會段子璋反道遂州巨倉卒不知所出
卽迎謁爲子璋所殺子則之嗜學年五十餘尙執經太學嗣曹王暉薦之貞元二年蘇睦王府長史遷左
金吾衛大將軍坐與從甥竇申善貶昭州司馬

道孝王元慶始王漢後徙陳出爲趙州刺史貞觀十年徙王授豫州刺史累寶封千戶時諸王奉給薄於
帝子王敏實之大臣莫敢言十八年黃門侍郎褚遂良爲太宗從容言之不能行高宗時歷滑州刺史以
治績聞數蒙賜遷徐沁衛三州刺史事母謹及喪請躬修墳墓詔不聽薨贈司徒益州都督陪葬獻陵
九子誘爲嗣王臨淮爲澧州刺史坐臧削爵更以次子詢之子微嗣終宗正卿子鍊嗣廣德中亦至宗正
卿

鄧康王元裕貞觀五年始三節十一年徙王始王及徙皆與譙魏許密四王同封累寶封至千二百戶好
學善談名理與典籤盧照隣爲布衣交五爲州刺史遷兗州都督薨贈司徒益州大都督陪葬獻陵無子
以江王子廣平公見嗣薨子孝先嗣開元中爲冠軍大將軍

舒王元名始王譙後徙王高祖之在大安宮太宗晨夕使尙宮問起居元名纔十歲保媪言尙宮有品當
拜元名曰此帝侍婢耳何拜爲太宗壯之曰真吾弟也及長矜嚴疏財未嘗問家人生業歷五州刺史實
封至千戶子豫章王實治江州有美政高宗以元名善訓子手詔襲美又欲授元名大州辭曰臣忝屬

豈以州郡爲仕進資邪治石州二十年數游山林有高蹈意垂拱中徙鄭州境接東畿諸王貴戚爲刺史
者縱家人暴百姓元名至一革之爲治廉威進加司空武后時實爲巨神勸所構繫詔獄死元名坐遷利
州尋被殺神龍初詔復官爵贈司徒時少子鄴國公昭已卒乃以實子津嗣開元中爲左威衛將軍薨子
萬嗣薨子藻嗣

魯王靈夔篤學善草隸通音律初王魏後王燕爲幽州都督已而徙王實封至千戶類歷五州刺史遷太
子太師垂拱元年徙相州坐與越王謀起兵流振州自殺子詵爲清河王早夭諱爲范陽王知越王必敗
白發其謀得不誅歷右散騎常侍爲酷吏所害神龍初悉追復王爵以藹子道堅嗣道堅方嚴有禮法聞
門肅如也七爲州刺史遷國子祭酒開元中遷授汴州刺史河南道採訪使州據水陸都會前後刺史多
黷利唯道堅以清毅稱入爲宗正卿薨贈禮部尙書子宇嗣從玄宗至蜀爲右金吾將軍寶應初皇太子
子封魯王更封宇爲嗣鄒王弟道邃封戴國公恭默自守以修山東婚姻故事數任清職終尙書右丞
江安王元祥始王許後徙王四爲州刺史實封至千戶性庸遜所至營財產無厭時滕蔣號三王皆貪暴
得其府官者惡之不願行故時語曰寧向儋崖振白不事江滕蔣號元祥魁大帶十圍食兼數人韓號魏

亦鴻偉然不逮也薨贈司徒并州大都督陪葬獻陵二子暉爲永嘉王有禽獸行誅死皎爲武陽王餘皆爵公武后時多及誅皎子叢以幼流死嶺表葬南安人號其冢爲天孫墓中宗立以從子欽嗣王又以皎封絕更取弟子繼宗嗣旣而以郡王不襲降豐國公

密貞王元曉貞觀中爲虢州刺史實封至千戶徙澤州薨贈司徒揚州都督陪葬獻陵子穎嗣爲南安王薨子勗嗣早薨神龍初以穎弟亮養子曇嗣開元五年更詔元曉再從孫東莞郡公徹嗣徙封濮陽郡王歷宗正卿金紫光祿大夫

滕王元嬰貞觀十三年始王實封千戶爲金州刺史驕縱失度在太宗喪集官屬燕飲歌舞狎昵廝養巡省部內從民借狗求置所過爲害以丸彈人觀其走避則樂城門夜開不復有節高宗以書切責曰朕以王至親不忍致于法今署下上考冀媿王心久之遷洪州都督官屬妻美者給爲妃召逼私之嘗爲典籤崔簡妻鄭嫚罵以履抵元嬰面血流乃免元嬰慙歷旬不視事後坐法削戶及親事帳內之半謫置滁州起授壽州刺史徙隆州復不循法錄事參軍事裴聿諫正其失元嬰掉辱之聿入計具奏帝遷聿六品上階帝嘗賜諸王綵五百以元嬰及蔣王貪黷但下書曰滕叔蔣弟不須賜給麻二車助爲錢緡二王大慙武后時進拜開府儀同三司梁州都督薨贈司徒冀州都督陪葬獻陵子十八人長子修琦嗣爲長樂王

餘簡公垂拱中六人死詔獄神龍初更以少子修信子涉嗣開元中授左饒衛將軍薨子湛然嗣從玄宗

至蜀擢左金吾將軍

唐書卷七十九

唐書卷七十九考證

霍王元軌傳檻車載至陳倉薨六子○舊書作有子七人

鄧康王元裕傳累實封至千二百戶○舊書通前一千五百戶

滕王元嬰傳神龍初更以修信子涉嗣○臣德潛按舊書以循琦弟循培子涉嗣而新書表亦作培

宋 端 明 殿 學 士 宋 祁 撰

列傳第五

太宗諸子

太宗十四子文德皇后生承乾又生第四子泰高宗皇帝後宮生寬楊妃生恪又生第六子愔陰妃生祐
王氏生憚燕妃生貞又生第十一子壽章妃生慎後宮生簡楊妃生福楊氏生明

常山愨王承乾字高明生承乾殿即以命子武德三年始王常山郡與長沙宜都二王同封俄徙中山太
宗即位立為皇太子甫八歲特敏惠帝愛之在諒闇使裁決庶政有大體後每行幸則令監國及長好聲
色慢游然懼帝祕其迹臨朝言諄諄必忠孝退乃與羣不逞狎慢左右或進諫危坐斂容痛自咎飾非辯
給諫者拜答不暇故人人以為賢而莫之察後過惡濫聞宮臣若孔穎達令狐德棻于志寧張玄素趙弘
智王仁表崔知機等皆天下選每規爭承乾帝必厚賜金帛欲以厲其心承乾傲不悛往往遣人陰圖害
之時魏王泰有美名帝愛重而承乾病足不良行且懼廢與泰交惡泰亦謀奪長各樹黨東宮有俳兒善
姿首承乾雙愛帝聞震怒收兒殺之坐死者數人承乾意為泰告望甚內念兒不已築室圖其像贈官樹

碑爲起家苑中朝夕祭承乾至其處裴回涕數行下愈怨懟稱疾不朝累數月又使戶奴數十百人習音聲學胡人椎髻剪綵爲舞衣尋擡跳劍鼓鞀聲通晝夜不絕造大銅鑪六熟鼎招亡奴盜取人牛馬親視烹燂召所幸斯養共食之又好突厥言及所服選貌類胡者被以羊裘辮髮五人建一落張氈舍造五狼頭纛分戟爲陣繫幡旗設穹廬自居使諸部斂羊以烹抽佩刀割肉相啗承乾身作可汗死使衆號哭蹙面奔馬環臨之忽復起曰使我有天下將數萬騎到金城然後解髮委身思摩當一設顧不快邪左右私相語以爲妖又裴氈爲鎧列丹幟勒部陣與漢王元昌分統大呼擊刺爲樂不用命者披樹扶之或至死輕者輒腐之嘗曰我作天子當肆吾欲有諫者我殺之殺五百人豈不定又召壯士左衛副率封師進刺客張師政紇干承基等謀殺魏王泰不克遂與元昌侯君集李安儼趙節杜荷鏡臂血啼之謀以兵入西宮貞觀十七年齊王祐反齊州承乾謂承基等我宮西牆去大內正可二十步棘耳豈與齊州等會承基連齊王專繫獄當死卽上變帝詔長孫無忌房玄齡蕭瑀李勣孫伏伽岑文本馬周褚遂良雜治廢爲庶人徙黔州十九年死帝爲廢朝葬以國公禮子象爲懷州別駕厥鄂州別駕開元中象子適之爲宰相贈還承乾始王象越州督都郇國公

楚王寬武德三年出後楚哀王蚤薨貞觀初追封

鬱林王恪始王長沙俄進封漢貞觀二年徙蜀與越燕二王同封不之國久乃爲齊州都督帝謂左右曰吾於恪豈不欲常見之但令早有定分使外作藩屏吾百歲後庶兄弟無危亡憂十年改王吳與魏齊蜀蔣越紀六王同徙封授安州都督帝賜書曰汝惟茂親勉思所以藩王室以義制事以禮制心外之爲君臣內之爲父子今當去膝下不遺汝珍而遺汝以言其念之哉坐與乳媪子博龔罷都督削封戶二百高宗卽位拜司空梁州都督恪善騎射有文武才其母隋煬帝女地親望高中外所向帝初以晉王爲太子又欲立恪長孫無忌固爭帝曰公豈以非己甥邪且兒英果類我若保護舅氏未可知無忌曰晉王仁厚守文之良主且舉棊不定則敗況儲位乎帝乃止故無忌常惡之永徽中房遺愛謀反因遂誅恪以絕天下望臨刑呼曰社稷有靈無忌且族滅四子仁璋琨瓊並流嶺表顯慶五年追王鬱林爲立廟以河間王孝恭孫榮爲鬱林縣侯以嗣神龍初贈司空備禮改葬光宅中仁遇赦還適會榮以罪斥故得襲鬱林縣男歷岳州別駕爵郡公嘗使江左州人遺以金拒不內武后遣使者勞曰兒吾家千里駒更名千里自天授後宗室賢者多株剪唯千里詭譎不情數進符瑞諸異物得免中宗反正改王成紀未幾進王成節愨太子誅武三思千里與其子天水王禧率數十人斬右延明門以入太子敗誅死籍其家改氏螻睿宗立詔還氏及官爵瑋番卒中宗追封朗陵王子祗出繼蜀王愔開元中以傍繼國改封廣漢郡王遷太僕卿

同正員薨

琨武后時歷六州刺史皆有名聖祿中爲嶺南招慰使安輯反獠甚得其宜卒贈司衛卿神龍初贈張掖郡王開元中以子禕貴追封吳王

禕少有志尙事繼母謹撫異母弟祇以友稱嘗襲封固讓祇中宗嘉其意特封嗣江王以繼繼後開元時亦以傍繼徙信安郡王累爲州刺史治嚴辨遷禮部尙書朔方節度使初吐蕃據石堡城數盜塞詔禕與河西隴右議攻取既到屯諏日進師或謂城險賊所愛必固守今兵深入有不如捷吾軍必犇不如持重伺賊勢禕曰人臣之節豈憚險不進乎必眾寡不敵者吾以死繼之於是分兵進賊路督諸將倍道進遂拔之自是河隴諸軍游奕拓地至千里玄宗喜更號其城曰振武軍契丹牙官可突干叛詔拜忠王爲河北道行軍元帥討之敕禕以副王不行故禕率裴耀卿諸將分道出范陽北擊二蕃破之禽酋長以遺餘部竄伏加開府儀同三司領關內支度營田採訪處置使授二子官禕功多執政害之賞不讐爲當時所恨久之擢兵部尙書爲朔方節度大使坐事下除衢州刺史歷滑懷二州天寶初以太子少師致仕明年遷太師未拜薨禕治家嚴教子有法度故峒嶧峴皆顯

隨性質厚歷官有美名以王孫封趙國公楊國忠亂政悉斥不附己者恒由考功郎中拜睢陽太守以清簡爲二千石最方入計而玄宗入蜀卽走行在除武部侍郎兼御史大夫俄拜置郡太守劍南節度採訪使郭千仞反與陳玄禮共討平之上皇還京遷戶部尙書改越國乾元元年持節都統江淮節度宣慰觀察使都統之號自恒始明年宋州刺史劉展有異志詔拜展爲淮南節度使密詔恒與揚州長史鄧景山圖之時展強屢旣受詔卽悉兵度淮恒景山拒之戰壽春敗績恒走丹陽詔貶袁州司馬卒于官贈揚州大都督弟峴別傳

祇封嗣吳王出爲東平太守安祿山反河南陳留滎陽靈昌相繼陷祇募兵拒賊玄宗壯之累遷陳留太守持節河南道節度採訪使歷太僕宗正卿代宗大厯時祇旣宗室老以太子賓客爲集賢院待制是時勳望大臣無職事者皆得待詔于院給殮錢署舍以厚其禮自左僕射裴冕等十三人爲之子獻以蔭補五品官祇薨兄峴得罪乃以獻嗣王累至宗正卿檢校刑部尙書薨贈太子少保性介直面刺人短歷官清白居室不能庇風雨收恤甥姪慈愛過人家無留儲公卿合贈乃克葬境神龍初封歸政郡王歷宗正卿坐千里事貶南州司馬

濮恭王泰字惠襲始王宜都徙封衛繼懷王後又徙封越爲揚州大都督再遷雍州牧左武侯大將軍改王魏帝以泰好士善屬文詔卽府置文學館得自引學士又以泰大腰腹聽乘小輿至朝司馬蘇勗勸泰

延賓客著書如古賢王泰乃奏撰括地志於是引著作郎蕭德言祕書郎顧胤記室參軍蔣亞卿功曹參軍謝偃等撰次衛尉供帳光祿給食士有文學者多與而貴游子弟更相因藉門若市然泰悟其過欲速成乃分道計州緝疏錄凡五百五十篇歷四基成詔藏祕閣所賜萬段後帝幸泰延康坊第曲赦長安死罪免坊人一年租府僚以差賜帛又泰月稟過皇太子遠甚諫議大夫褚遂良諫曰聖人尊嫡卑庶謂之儲君故用物不會與王共之庶子不得爲此所以塞嫌萌杜禍源先王法制本諸人情知有國家者必有嫡庶庶子雖愛不得過嫡子如當親者疏當尊者卑則私恩害公威志亂國今魏王稟料過東宮議者以爲非是昔漢竇太后愛梁王封四十餘城王築苑三百里治宮室爲複道費財鉅萬出警入蹕一不得意遂發病死宣帝亦驕淮陽王幾至於敗輔以退讓之臣乃克免今魏王新出閣且當示以節儉自可在後月加歲增又宜擇師傅教以謙儉勉以文學就成德器此所謂聖人之教不肅而成也帝又敕泰入居武德殿侍中魏徵亦言王爲陛下愛子欲安全之則不當使居嫌疑之地今武德殿在東宮之西昔海陵居之矣論者爲不可雖時與事異人之多言尙或可畏又王之心亦弗違舍願罷之成王以寵爲懼之美帝悟乃止時皇太子承乾病寔泰以計傾之乃引駙馬都尉柴令武房遺愛等布腹心而韋挺杜楚客相繼攝府事二人者爲泰要結中朝臣津介賂遺羣臣更附爲朋黨承乾懼陰遣人稱泰府典籤詣玄武門上封帝省之書言泰罪帝怒卽遣捕詰不獲既而太子敗帝陰許立泰岑文本劉洎請遂立泰爲太子長孫無忌固欲立晉王帝以太原石文有治萬吉復欲從無忌泰微知之因語晉王爾善元昌得無及乎王憂甚帝怪之以故對帝憮然悟會召承乾譴勒承乾曰臣貴爲太子尙何求但爲泰所圖與朝臣謀自安爾無狀之人遂教臣爲不軌事若泰爲太子正使其得計耳帝曰是也有如立泰則副君可詭求而得使泰也立承乾治俱死治也立泰承乾可無它卽幽泰將作監解雍州牧相州都督左武侯大將軍降王東萊因詔自今太子不道藩王窺望者兩棄之著爲令然帝猶謂無忌曰公勸我立雉奴雉奴仁懦得無爲宗社憂奈何雉奴高宗小字泰尋改王順陽居均州之鄖鄉帝常持泰表語左右曰泰文辭可喜豈非才士我心念泰無已時但爲社稷計遣居外使兩相完也二十一年進王濮高宗卽位詔泰開府置僚屬車服羞膳異等薨鄖鄉年三十五贈太尉雍州牧二子欣徽欣嗣王武后時爲酷吏所陷貶昭州別駕薨子嶠神龍初得嗣王開元中爲國子祭酒以罪貶鄧州別駕薨微封新安郡王庶人祐字贊武德八年王宜陽進王楚又王燕己乃封齊領齊州都督貞觀十一年始歸國以明年入朝以疾留京師其舅尙乘直長陰弘智儉人也說祐曰王兄弟多卽上萬歲後何以自全要須得士自助乃引客燕弘亮謁祐悅賜金帛使募劍客十五年還州初帝用王府長史司馬必取骨鯁敢言者有過失

輒聞而祐溺羣小好弋獵長史薛大鼎屢諫不聽帝以輔王無狀免之更用權萬紀萬紀性剛急以法繩祐有咎君羣梁猛虎者騎射得幸萬紀斥之祐私引與狎昵帝數以書讓祐萬紀恐并獲罪即說祐曰王上愛子上欲王改悔故數教責王誠能飭躬引咎萬紀請入朝言之上意宜解祐因上書謝罪萬紀見帝言祐且自新帝悅厚賜萬紀而仍譙戒祐祐聞萬紀見勞而已蒙責以爲責己益不平會萬紀又以疑貳繫君羣等制祐不出國門悉暴祐罪于朝祐不勝忿有詔刑部尚書劉德威臨訊頗實帝召祐萬紀還京師祐與燕弘亮等謀射殺萬紀支解之左右勸祐遂發兵乃募城中男子年十五以上悉發私署左右上柱國光祿大夫開府儀同三司托東托西等王斥庫賞行賞驅人築堞浚隄繕甲兵人惡之皆夜縋亡去詔兵部尚書李勣與劉德威發便道兵討之祐日夜引弘亮等五人對其妃宴樂語官軍則弘亮妄言王母憂右手持酒唱左手刀拂之祐信愛弘亮聞之喜帝手敕祐曰吾常戒汝勿近小人正爲此耳往吾子今國讐我上慙皇天下愧后土題畢涕而遣祐檄諸縣縣輒以聞祐窮感上表曰臣帝子也爲萬紀讒構上天降靈罪人斯得臣狂失心恟驚悸左右無兵即欲顛走所以頗仗械以自衛護時勣未至而青淄等州兵已集或勸祐虜子女走豆子航爲盜計未決兵曹杜行敏夜勒兵鑿垣入祐與弘亮等閉門拒至日中行敏呼曰吾爲國討賊不速降且焚士積薪祐乃出執送京師賜死內侍省貶爲庶人葬以國公禮

詔齊州給復一年擢行敏巴州刺史封南陽郡公祐喜養關隴方未反獨辭賜四十餘絕其頭去及敗牽

連誅死者凡四十餘人祐之亂州人羅石頭數祐罪以刀直前刺祐不克殺之詔贈亳州刺史祐嘗引騎徇邑聚野人高君狀曰上親平寇難土地甲兵不勝計今王以數千人爲亂猶一手搖泰山又如君父何祐擊禽之愧其言不能殺詔擢榆杜令

蜀悼王愔貞觀五年始王梁與鄴漢申江代五王同封徙王蜀實封八百戶出爲岐州刺史數敗游爲非法帝頻責教不悛怒曰禽獸可擾於人鐵石可爲器愔曾不如之乃削封戶及國官半徙魏州久之還戶增至千復出馳弋敗民稼典軍楊道整叩馬諫愔摔擊之御史大夫李乾祐劾愔罪高宗怒貶黃州刺史擢道整匡道府折衝都尉吳王恪得罪愔以母弟廢爲庶人徙巴州俄封涪陵王薨咸亨初復爵土贈益州大都督陪葬昭陵以子璠嗣王璠武后時謫死歸誠州神龍初以朗陵王禕子禴嗣

蔣王惲始王鄴又徙王蔣拜安州都督賜實封千戶永徽三年徙梁州惲造器物服玩多至四百車所經州縣駭然護送爲有司劾奏詔貸不問上元中遷箕州刺史錄事參軍張君徹誣告惲反詔使者按驗惲惶懼自殺高宗知其枉斬君徹贈惲司空荊州大都督陪葬昭陵三子煒煌休道煒初王汝南郡惲薨遂嗣王爲武后所害神龍初以嫡孫紹宗爲嗣蔣王薨子欽福嗣爲率更令煌封蔡國公孫之芳有令譽安

祿山奏爲范陽司馬祿山反自拔歸京師歷工部侍郎太子右庶子廣德初詔兼御史大夫使吐蕃被留二歲乃得歸拜禮部尚書改太子賓客休道子瑒神龍初封嗣趙王開元中改王中山

越王貞始王漢後徙原已乃封越貞善騎射涉文史有吏幹爲宗室材王武后初累遷太子太傅豫州刺史中宗廢居房陵貞乃與韓王元嘉及王子黃公譏魯王靈夔王子范陽王藹霍王元軌王子江都王緒及子琅邪王沖計議反正垂拱四年明堂成悉追宗室行享禮共疑后遂大誅戮不遺種事且急譏乃矯帝璽書賜沖曰朕幽繫諸王宜卽起兵於是命長史蕭德琮募兵告諸王師期八月沖先發諸王莫有應者獨貞將兵攻上蔡破之而沖已敗貞稍徇屬縣得士七千列五營貞爲中營以裴守德爲大將軍領中營趙成美爲中左將領左營閻弘道爲右中將領右營安摩訶爲將領後軍王孝志爲右將軍領前軍以韋慶禮爲司馬署官五百然脅誘無鬪志家童皆佩符以辟兵九月后遣左豹韜衛大將軍鞠崇裕夏官尚書岑長倩率兵十萬討之以鳳閣侍郎張光輔爲諸軍節度乃下詔削貞父子屬籍改氏虺崇裕等次豫州貞少子規及裴守德拒戰兵潰貞乃閉門守守德者驍勇士貞始起以女妻之委以腹心至是欲殺貞自贖會軍薄城家人白貞今事乃爾王豈受戮辱者邪卽仰藥死規自殺守德與主俱縊起凡二十日敗始貞臨水自鑿不見其首惡之未幾及禍沖貞長子也好學勇而才累遷博州刺史初發有土

五千度河越武水武水令告急魏州州遣華令馬玄素領兵先乘城沖攻之因風積薪焚其門火作風反

衆心沮解其屬董元寂誦言王與國家戰乃反爾沖斬以徇衆懼遂潰唯家僮數十從之乃走博州爲當關刺死后命已神勅討之兵未至沖已死起七日敗二弟禧溫禧常山公坐死溫以前告流嶺南初貞騰檄壽州刺史趙瓌諭以興兵且假道瓌得檄許爲應瓌妻常樂長公主亦趣諸王番立功故瓌與主皆死濟州刺史薛顥與其弟紹謀應沖率所部庸調治兵募士沖敗下獄死顥駙馬都尉瓘之子母城陽長公主封河東縣侯紹尙太平公主擢累右玉鈐衛員外將軍以主婿不加戮餓死河南獄神龍初敬暉等奏沖父子死社稷請復爵士爲武三思等沮罷開元四年乃復爵士有司諡死不忘君曰敬五年又詔王嗣絕國除朕甚悼焉其以貞從孫故許王子夔國公琳嗣王奉王祀琳薨爵不傳貞最幼息珍子謫嶺表數世不能歸開元中女孫持四世柩北還求祔王塋詔嘉憫敕宗正寺京兆府爲訪其兆非陪陵者聽葬女名元貞爲道士

紀王慎始王申後徙絕食戶八百貞觀中遷襄州刺史以治當最天子璽書勞勉人爲立石頌德二十三年進戶至于文明初累遷太子太師貝州刺史慎少好學善星步與越王齊名當世號紀越初貞連諸王起兵慎知時未可獨拒不與合將就誅而免改氏虺載以檻車謫巴州薨于道七子續琮觀秀獻欽證續

與秀最知名續王東平歷和州刺史薨

琮義陽王叡楚國公秀襄陽郡公獻廣化郡公欽建平郡公五人並爲武后所殺神龍初以證嗣王擢左驍衛將軍薨子行同嗣琮三子行遠行芳行休始琮與二弟同死桂林開元四年行休請身迎柩既至無封樹議者謂不可復得行休歸地布席以祈是夜夢王乘舟舟判爲二旣而適野見東洲中斷乃悟焉又靈堂鎖一夕羣自屈管上有指迹一奇二並使卜人筮之曰屈於文爲尸出指者示也一奇二並三殯也先王告之矣乃趣其所發之如言而一節獨闕行休號而寢夢琮告曰在洛南州明日直殯南得之於是三喪歸陪葬昭陵贈琮陳州刺史永昌時行遠行芳斥嵩州六道使至行遠先就戮行芳幼當赦抱持請代遂與俱死西南人稱冤悌云慎女東光縣主始八歲聞慎有疾不食父哀之給云已愈主察顏色未平終不肯御內外稱之長適太子司議郎裴仲將時妃主多恃貴以奢豫相矜主獨儉素姊弟謂曰人生富貴在得志獨勤苦欲何求答曰我幼好禮今行之不違非得志謂何且自古賢妃淑女以恭遜著名驕縱敗德況榮寵貴盛儻來物也可恃以凌人乎及王死號慟嘔血數升免喪絕膏沐者二十年始諸王妃主自垂拱後被害者皆蒙掩之神龍初詔州縣普加求訪祭以牲牢復官爵諸王皆陪葬昭獻二陵主聞感慟卒救其子曰爲我謝親戚酷憤已雪下見先王無恨矣中宗爲舉哀章善門下詔褒揚

江陽王薨封之明年薨無後

代王簡已封薨無後

趙王福貞觀十三年始王出後隱太子累遷梁州都督實封八百戶薨贈司空并州都督陪葬昭陵無子神龍初以蔣王憚孫思順嗣王

曹王明母本巢王妃帝寵之欲立爲后魏徵諫曰陛下不可以辰嬴自累乃止貞觀二十一年始王曹累爲都督刺史高宗詔出後巢王永隆中坐太子賢事降王零陵徙黔州都督謝祐逼殺之帝聞悼甚黔官吏皆坐免景雲中陪葬昭陵三子俊傑備俊嗣王南州別駕傑爲黎國公垂拱時並及誅神龍初以傑子胤爲嗣曹王是時諸王子孫自嶺外還入見中宗皆號慟帝爲泣下初武后時壯者誅死幼皆沒爲官奴或匿人間庸保至是相繼出帝隨屬遠近封拜云後備自南還詔停胤封而封備歷衛尉少卿同正員薨開元十二年復封胤薨子戡嗣位左衛率府中郎將子臯嗣

臯字子蘭少補左司禦兵曹參軍天寶十一載嗣王事母太妃鄭以孝聞安祿山反奉母逃民間走蜀謁玄宗由都水使者遷左領軍將軍上元初旱歉臯祿不足養請補外不許乃故抵輕法貶温州長史俄攝州事州大饑發官粟數十萬石賑餓者僚史叩庭請先以聞臯曰人日不再食且死何俟命後發哉苟

殺我而活衆其利大矣既貸乃自劾優詔開許就進少府監時殿中侍御史李鈞與其弟京兆法曹參軍
鐔宦既遂不肯還鄉母窮不自給皐行縣見之歎曰入則孝出則悌有餘力則學若二子者可與事君乎
哉舉劾之並錮死召還未得見卽上書言治道詔授衡州刺史爲觀察使謾劾貶潮州會楊炎起道州爲
宰相知皐直復用爲衡州刺史初御史覆訊皐懼憂其母出則囚服入乃衣冠貌言如平常及爲潮以遷
入告至是復位乃言其實建中元年進拜湖南觀察使前帥辛京杲貪虐使部將王國良戍武岡賴其富
卽劾以死國良恐據縣反斂荆黔洪桂兵討之再歲不能下皐至遺書曰觀將軍非敢大逆者特逃讒抗
死爾將軍遇我可以降我固爲京杲誣者幸蒙雪何忍以兵加將軍哉以爲不然我以陣術破將軍陣以
攻法屠將軍城非將軍所度也國良得書喜且畏因請降然內尙首鼠皐卽日單騎稱使者造國良壘賊
延使者入皐大呼其軍曰有識曹王者乎乃我也來受良降良今安在一軍愕眙不敢動國良迎拜叩頭
請罪皐執手約爲昆弟則盡焚攻守具散其兵有詔赦之賜名惟新明年持母喪至江陵會梁崇義反奪
爲左衛大將軍復觀察湖南李希烈反遷江西節度使受命日不宿家至豫章大令將吏曰有功未申與
懷器謀不發者皆自言得裨校伊慎李伯潛劉旻悉補大將擢王鐔爲中軍以馬彞許孟容爲幕府治戰
艦良兵二萬以士二千五百委慎等教之自將五百人教以秦兵團力法聯其賞罰池張如一乃約以五

百人擊慎卒二千五百莫能當其鋒卽盡以教之初慎嘗從希烈平襄州至是希烈懼爲皐用卽反間德

宗信之將誅慎皐請赦之使自效會與賊夾江陣皐勉慎立功以所乘馬及其鐵賜之使將先鋒斬賊數
百級乃免賊柵蔡山不可攻皐聲言西取斬引兵艦循厓沂江上賊聞以羸師保柵悉軍行江北與皐直
西去蔡山三百里皐遣步士悉登舟順流下攻蔡山拔之問一日賊救至遂大敗乃取斬州降其將李良
平黃州兵益振會舒王爲元帥授皐前軍兵馬使俄而天子狩奉天鹽鐵使包佶爲陳少游所窘以運糧
沂江次蘄口希烈使杜少誠將步騎三萬將絕江道皐遣伊慎兵七千禦于永安走之以功進工部尙書
帝駐梁州皐之貢助相望以天子處外乃不敢居城府出屯西塞山大洲徙郡縣爲軍市改戶部尙書又
遣伊慎王鐔攻安州未下希烈遣劉戒虛以步騎八千援之皐命李伯潛迎擊於應山俘之遂下安州斬
僞刺史王嘉祥希烈別遣兵援隋州皐破之厲鄉因下平靜白鴈關賊遂不敢南略遷荆南節度使賜賞
封三百戶凡戰大小三十二取州五縣二十斬首三萬三千禽生萬六千未嘗敗師所過不敢伐桑棗踐
禾稼朝廷仰食江淮而西道出九江至大別皆與賊接皐轉戰數千里餉路遂通江漢倚皐爲固淮西平
乃請護喪歸東都帝走中人贈帛訖葬來朝還就鎮初江陵東北傍漢有古鄣不治歲輒溢皐修塞之得
其下良田五千頃規江南廢洲爲廬舍構二橋跨江而流人自占者二千餘家繇荆抵樂鄉二百里其間

墟聚凡數十不井飲阜始命鑿井以便人貞元初吳少誠擅蔡故徙阜鎮山南東道割隋汝以益軍練兵時糧市回鶻馬以益戰騎歲時大畋以教士少誠畏之阜性勤儉能知人疾苦參聽微隱盡得吏下短長其賞罰必信所至常平物估豪舉不得擅其利教爲戰艦挾二輪蹈之鼓水疾進駛于陣馬有所造作皆用省而利長以物遣人必自視衡量庫帛皆印署以杜吏謾扶風馬彝未知名阜識之卒以正直稱張東之有園圃在襄陽阜嘗宴集將市取之彝曰漢陽有中興功今遺業當百世共保奈何使其子孫鬻乎阜謝曰主吏失詞以爲君羞微君安得聞此言卒年六十贈尚書右僕射諡曰成阜嘗自創爲欝器以聚木上出五觚下銳圓爲孟形所容二豆少則水弱多則彊中則水器力均雖動搖乃不覆云子象古道古象古元和中自衡州刺史擢安南都護貪縱不法驩州刺史楊清者蠻酋也象古忌其豪召爲牙門將常鬱鬱思亂會討黃賊象古發甲助之乃授清兵三千清與子志烈還襲安南殺象古并其家詔赦清爲瓊州刺史以桂仲武爲都護清拒命仲武分諭渠酋兵皆附破城斬清夷其族

道古舉進士獻書闕下擢校書郎集賢院學士累遷司門員外郎歷利隋唐睦四州刺史柳公綽鎮鄂岳爲飛譖上聞憲宗欲代之裴度言嗣曹王阜嘗能以江漢兵制李希烈威惠在人今以其子將必有功會道古自黔中觀察使入朝乃代公綽偕道入其軍公綽惶遽出財貨皆被奪元和十二年攻甲州破其鄂進圍中城守卒夜驅女子登而譟發懸門以出道古衆亂多死於賊李聽守安州未嘗敗道古誣逐之自將出穆陵關士卒驕不能制又度支錢道古悉以饋權倖故賜不給其下怨怒戰不甚力賊亦易之故再入甲不能下卒無功淮西平加校檢御史大夫召爲宗正卿左金吾將軍帝喜服餌道古欲自媚而所善柳泌自謂能化金爲不死藥乃因宰相皇甫鏘以聞俄會帝崩穆宗爲太子惡之既立誅泌貶鏘斥道古爲循州司馬終以服丹歐血死長慶初詔還其官道古巧于宦便佞傾下游公卿間常與奕博僞不勝厚進所償嗜利者多得其懽心故少盜美名及死賣宅以葬

曹王明子暉改戶部尚書○舊書加工部尚書

凡戰大小三十二取州五縣二十斬首三萬三千禽生萬六千○臣德潛按舊書凡下州四縣十七大小

十餘陣而韓愈曹成王碑叙討李希烈云大小之戰三十有二取五州十九縣與二書又不皆合也

徙臯鎮山南東道割隋汝以益軍○臣德潛按方鎮表增領唐鄧安與此異

宋 端 明 殿 學 士 宋 祁 撰

列傳第六

三宗諸子

高宗八子後宮劉生忠鄭生孝楊生上金蕭淑妃生素節武后生弘賢中宗皇帝睿宗皇帝

燕王忠字正本帝始為太子而忠生宴宮中俄而太宗臨幸詔宮臣曰朕始有孫欲共為樂酒酣帝起舞以屬羣臣在位皆舞齊賜有差貞觀二十年始王陳永徽初拜雍州牧王皇后無子后舅柳奭說后以忠母微立之必親己后然之請於帝又奭與褚遂良韓瑗長孫無忌于志寧等繼請遂立為皇太子后廢武后子弘甫三歲許敬宗希后旨建言國有正嫡太子宜同漢劉彊故事帝召見敬宗曰立嫡若何對曰正本則萬事治太子國本也且東宮所出微今知有正嫡不自安竊位而不自安非社稷計帝曰忠固自讓敬宗曰能為太伯不亦善乎於是降封梁王梁州都督賜甲第實封戶二千物二萬段俄徙房州刺史忠竄懼不聊生至衣婦人衣備刺客數有妖夢嘗自占事露廢為庶人囚黔州承乾故宅麟德初宦者王伏勝得罪於武后敬宗乃誣忠及上官儀與伏勝謀反賜死年二十二無子明年太子弘表請收葬許之神

龍初追封又贈太尉揚州大都督

原悼王孝永徽元年始王許與杞雍二王同封早薨神龍初追封及諡

澤王上金始王杞永徽三年遙領益州大都督歷郵壽二州刺史武后疾其母故有司誣奏削封邑徙置澧州久之後陽若可喜者表杞王上金鄱陽王素節聽朝集義陽宣城二公主各增夫秩由是上金為沔州刺史素節岳州刺史然卒不朝高宗崩詔上金素節二公主赴哀文明元年徙王畢又徙王澤歷五州刺史載初中武承嗣諷周興誣上金素節謀反召繫御史獄上金聞素節已被殺即雉經七子並流死顯州神龍初追還官爵以子義珣嗣王義珣始被謫匿身為傭保而嗣許王權利其爵邑告義珣假冒復流嶺外開元初以素節子瑒為後而玉真公主表義珣實上金子乃奪瑒爵復使義珣嗣王拜率更令薨子惠嗣

許王素節始王雍授雍州牧方羈州即誦書日千言師事徐齊聘粹勉自彊帝愛之轉岐州刺史更王郁母被譖死出素節為申州刺史乾封初詔素節病無入朝而實不病乃著忠孝論自明倉曹參軍張柬之以聞欲帝省其誣武后滋不悅坐受賊降王鄆陽削封戶什七徙置袁州錮終身儀鳳三年為岳州刺史更王葛又徙王歷三州刺史與上金同追逮赴都道聞遭喪哭者謂左右曰病死何可得而須哭哉至龍

門驛被絀年四十三葬以庶人禮子瑛等九人並誅惟琳瑒瑒古尚幼長囚雷州中宗復位追故封又贈開府儀同三司許州刺史陪葬乾陵詔瑒嗣王實封戶四百開元初封琳為嗣越王瑒嗣澤王琳至右監門衛將軍子隨封夔國公瑒為衛尉卿以抑上金子不得封貶鄂州別駕因詔外繼嗣王者皆歸宗乃以嗣江王禕為信安王嗣蜀王禕為廣漢王嗣密王徹為濮陽王嗣曹王臻為濟國公嗣趙王瑒為中山王武陽王繼宗為澧國公瑒累遷太子詹事薨贈蜀郡大都督二子解需皆幼以瑒子益嗣天寶十四載解始襲封王

瑒初封嗣澤王降為郢國公官宗正光祿卿進封襄信王初張九齡撰龍池頌刊石興慶宮宗子以為不稱盛德更命瑒為頌建花萼樓北天寶初復拜宗正卿性友弟聽敏宗子有一善無不薦延故宗室在省闈者多瑒所啟薨贈江陵郡大都督三子謙為郢國公梓州刺史異汝南郡公欽古封巴國公子賁嗣孝敬皇帝弘永徽六年始王代與潞王同封顯慶元年立為皇太子受春秋左氏於率更令郭瑜至楚世子商臣弒其君喟而廢卷曰聖人垂訓何書此邪瑜曰孔子作春秋善惡必書褒善以勸貶惡以誠故商臣之罪雖千載猶不得滅弘曰然所不忍聞願讀它書瑜拜曰里名勝母曾子不入殿下嘗孝天資黜凶悖之迹不存視聽臣聞安上治民莫善於禮故孔子稱不學禮無以立請改受禮太子曰善四年加元服

又命賓客許敬宗右庶子許國師中書侍郎上官儀中舍人楊思儉卽文思殿適采古今文章號瑤山玉彩凡五百篇書奏帝賜物三萬段餘臣賜有差又詔五日一赴光順門決事總章元年釋菜國學請贈顏回爲太子少師曾參太子少保制可會有司以征遼士亡命及亡命不卽首者身殊死家屬沒官弘諫以爲士遇病不及期或被略若溺壓死而軍法不因戰亡則同隊悉坐法家曰亡命而家屬與真亡者同沒傳曰與殺不辜寧失不經臣請條別其科無使淪胥詔可帝幸東都詔監國時關中饑弘視廡下兵食有榆皮蓬實者悄然命家令寺給米義陽宣城二公主以母故幽掖廷四十不嫁弘聞貽惻建請下降武后怒卽以當上衛士配之由是失愛又請以同州沙苑分假貧民會納妃裴而有司奏費用白鴈適苑中獲之帝喜曰漢獲朱鴈爲樂府歌今得白鴈爲婚費婚乃人倫首我則無慙禮畢曲赦岐州帝嘗語侍臣弘仁孝賓禮大臣未嘗有過而后將聘志弘奏請數拂旨上元二年從幸合璧宮遇酖薨年二十四天下莫不痛之詔曰太子嬰沈瘵朕須其痊復將遜于位弘性仁厚既承命因感結疾日以加宜申往命諡爲孝敬皇帝葬緱氏墓號恭陵制度盡用天子禮百官從權制二十六日釋服帝自製睿德紀刻石陵側營陵費鉅億人馱苦之投石傷所部官司至相率亡去妃薨諡哀皇后無子永昌初以楚王隆基嗣中宗立詔以主附太廟號義宗開元中有司奏孝敬皇帝宜建廟東都以諡名廟詔可於是罷義宗號妃卽裴氏也女有婦德而居道以如故拜內史納言歷太子少保娶國公爲醜吏所陷下獄死

章懷太子賢字明允容止端重少爲帝愛甫數歲讀書一覽輒不忘至論語賢易色一再誦之帝問故對曰性實愛此帝語李世勣稱其夙敏始王潞歷幽州都督雍州牧徙王沛累進揚州大都督右衛大將軍更名德徙王雍仍領雍州牧涼州大都督實封千戶上元年復名賢是時皇太子薨其六月立賢爲皇太子俄詔監國賢於處決尤明審朝廷稱焉帝手勅褒賜賢又詔集諸儒左庶子張大安洗馬劉訥言洛州司戶參軍格希玄學士許叔牙成玄一史藏諸周寶室等共注范曄後漢書書奏帝優賜段物數萬時正諫大夫明崇儼以左道爲武后所信崇儼言英王類太宗而相王貴賢聞惡之宮人或傳賢乃后姊韓國夫人所生賢益疑而后撰少陽政範孝子傳賜賢數以書讓勸愈不安調露中天子在東都崇儼爲盜所殺后疑出賢謀遣人發太子陰事詔薛元超裴炎高智周雜治之獲甲數百首於東宮帝素愛賢薄其罪后曰賢懷逆大義滅親不可赦乃廢爲庶人焚甲天津橋貶大安普州刺史流訥言於振州坐徙者十餘人開耀元年徙賢巴州武后得政詔左金吾將軍巨神勣檢衛賢第迫令自殺年三十四后舉哀顯福門貶神勣疊州刺史追復舊王神龍初贈司徒遣使迎喪陪葬乾陵睿宗立追贈皇太子及諡三子光順守禮守義光順爲樂安王徙義豐被誅守義爲隗爲王徙封桂陽薨先天中追封光順萬王守義畢王

守禮嗣王始名光仁授太子洗馬武后革命畏疾宗室而守禮以父得罪與睿宗諸子閉處宮中十餘年睿宗封相王許出外邸於是守禮等始居外改司議郎中宗即位復故封拜光祿卿實封戶五百唐隆元年進封邠王睿宗立兼檢校左金吾衛大將軍出爲幽州刺史遙兼單于大都護遷司空開元初累爲州刺史時寧申岐薛王同爲刺史皆擇僚首持綱紀守禮惟弋獵酣樂不領事故源乾曜袁嘉祚潘好禮皆爲邠府長史州佐督檢之後還諸王京師守禮以外支爲王不甚才而多寵嬖子六十餘人無可稱者常負息錢數百萬或勸少治居產守禮曰豈天子兄無葬者邪諸王每自上以爲歡岐王嘗奏守禮知雨暘帝問故答曰臣無它當天后時太子被罪臣幽宮中歲被勅杖凡四三累創痕膚前雨則沈瀟霽則佳以此知之因泣下帝爲惻然薨年七十贈太尉子承宏承寧承采可記者

承宏爵廣武王坐交非其人貶房州別駕還爲宗正卿廣德元年吐蕃入京師天子如陝虜宰相馬重英立承宏爲帝以翰林學士于可封霍瓌爲宰相賊退詔放承宏于華州死承寧封嗣邠王

承采燉煌王拜宗正卿與僕固懷恩使回紇和親卽納其女爲妃封毗伽公主薨贈司空唐制嗣郡王加四品階親王子服緋開元中張九齡奏寧薛及邠王三子爲王者賜紫餘皆服緋官不越六局郎王府掾屬仍員外置後從帝至蜀者皆服紫

中宗四子韋庶人生重潤後宮生重福重俊殤帝

懿德太子重潤本名重照避武后諱改爲帝爲皇太子時生東宮高宗喜甚乳月滿爲大赦天下改元永淳是歲立爲皇太孫開府置官屬帝問吏部侍郎裴敬彝郎中王方慶對曰禮有嫡子無嫡孫漢魏太子在子但封王晉立愍懷子爲皇太孫齊立文惠子爲皇太孫皆居東宮今有太子又立太孫於古無有帝曰自我作古若何對曰禮君子抱孫不抱子孫可以爲王父尸者昭穆同也陛下肇建皇孫本支千億之慶帝說詔議官屬敬彝等奏置師傅友文學祭酒左右長史東西曹掾主簿管記司錄六曹等官加王府一級然卒不補將封嵩山召太子赴東都以太孫留守京師中宗失位太孫府廢貶庶人別囚之帝復位封邵王大足中張易之兄弟得幸武后或譖重潤與其女弟永泰郡主及主壻竊議后怒杖殺之年十九重潤秀容儀以孝愛稱誅不緣罪人皆流涕神龍初追贈皇太子及謚陪葬乾陵號墓爲陵贈主爲公主譙王重福高宗時王唐昌郡徙封平恩長安末乃進王神龍初韋庶人譖與張易之兄弟陷重潤貶濮州員外刺史徙合均二州不領事景龍三年中宗親郊赦天下十惡者咸宥流人得還重福不得歸自陳蒼生皆自新而一子擯棄皇天平分固若此乎不報韋后得政詔左屯衛大將軍趙承恩薛思簡以兵護守睿宗立徙集州未行洛陽男子張靈均說重福曰大王居嫡長當爲天子相王雖平大難安可越居大位

昔漢誅諸呂乃東迎代王今百官士庶皆願王來王若陰幸東都殺留守擁兵西據陝徇河南河北天下可圖也重福又遣靈均與其黨鄭情計情亦密招重福為天子預尊睿宗為皇季叔重茂皇太弟制稱中元克復元年情自署左丞相知內外文武事以靈均為右丞相天性大將軍知出征事其餘以次除署重福自均州與靈均乘驛趨東都會駙馬裴巽家洛陽令候巽重福驚遽出欲劫左右屯營兵至天津橋願從者數百人侍御史李邕遇之先馳至右屯營呼曰譙王得罪先帝擅入都為亂公等勉立功取富貴稍閉皇城諸門以拒重福徇右營不能動趨左掖門已闔怒縱火燒之左營兵寢寢遂潰重福走山谷留守裴談總兵大索投漕渠死年三十一磔其屍帝詔以三品禮葬

節愍太子重俊聖曆三年王義興神龍初王衛拜洛州牧實封千戶俄領揚州大都督明年為皇太子以太后喪殺冊禮詔在藩食封歲納東宮給事中盧粲上言太子與列國同入封不可為法詔罷之重俊性明果然少法度既楊璈武崇訓為賓客二人馮貴寵無學術惟狗馬蹴踘相戲昵左庶子姚珽數上疏諍導右庶子平貞慎又獻孝經議養德等傳太子納而不克用武三思挾韋后勢將圖逆內忌太子而崇訓又三思子尚安樂公主常教主尊重俊以非韋出言為奴數請廢自為皇太女三年七月重俊恚忿遂率李多祚洎左羽林將軍李思冲李承況獨孤禕之沙吒忠義矯發左羽林及千騎兵殺三思崇訓并其黨十餘人使左金吾大將軍成王千里守宮城自率兵趨蕭章門斬關入索韋后安樂公主昭容上官所在

后挾帝升立武門宰相楊再思蘇瓌李嶠及宗楚客紀處訥統兵二千餘人守太極殿帝召右羽林將軍劉仁景等率留軍飛騎百人拒之多祚兵不得進帝據檻語千騎曰爾乃我爪牙忽為亂能斬賊者有賞於是士倒戈斬多祚餘黨潰重俊亡入終南山欲奔突厥楚客遣果毅趙思慎追之重俊憩于野為左右所殺詔殊首朝堂獻太廟并告三思崇訓樞睿宗立加贈諡陪葬定陵初重俊被害官屬莫敢視惟永和丞蓋嘉勗號哭解衣裹其首時人義之楚客怒收付獄貶平興丞卒至是亦贈永和令重俊子宗暉景雲三年封湖陽郡王天寶中至太常員外卿薨

睿宗六子肅明皇后生憲宮人柳生搆昭成皇后生玄宗皇帝崔孺人生範王德妃生業後宮生隆悌讓皇帝憲始王永平文明元年后以睿宗為皇帝故憲立為皇太子睿宗降為皇嗣更冊為皇孫與諸王皆出閣開府置官屬長壽二年降王壽春與衡陽巴陵彭城三王同封復詔入閣中宗立改王蔡固辭不敢當唐隆元年進封宋睿宗將建東宮以憲嫡長又嘗為太子而楚王有大功故久不定憲辭曰儲副天下公器時平則先嫡國難則先功重社稷也使付授非宜海內失望臣以死請囚涕泣固讓時大臣亦言楚王有定社稷功且聖庶抗嫡不宜更議帝嘉憲讓遂許之立楚王為皇太子以憲為雍州牧揚州大

都督太子太師實封至二千戶賜甲第物段五千良馬二十奴婢十房上田三十頃進尚書右僕射又兼司徒讓司徒更爲太子賓客時太平公主有醜圖姚元崇宋璟白帝請出憲及申王成義爲刺史以銷釋陰計乃以司徒兼蒲州刺史進司空玄宗既討定蕭岑之難進憲位太尉增千戶固辭更授開府儀同三司解太尉揚州大都督徙王靈又兼太常卿開元十四年表解卿久之復爲太尉歷澤岐涇三州刺史累封至五千五百戶二十九年薨初帝五子列第東都積善坊號五王子宅及賜第上都隆慶坊亦號五王宅玄宗爲太子嘗製大衾長枕將與諸王共之睿宗知喜甚及先天後盡以隆慶舊邸爲興慶宮而賜憲及薛王第於勝業坊申岐二王居安興坊環列宮側天子於宮西南置樓其西署曰花萼相輝之樓南曰勤政務本之樓帝時時登之聞諸王作樂必亟召升樓與同榻坐或就幸第賦詩燕嬉賜金帛侑歡諸王日朝側門既歸卽具樂縱飲擊毬鬪雞馳鷹犬爲樂如是歲月不絕所至輒中使勞賜相踵世謂天子友悌古無有者帝於敦睦蓋天性然雖讒邪亂其間而卒無以播時以鶴鴿千數集麟德殿廷樹翔棲浹日左清道率府長史魏光乘作頌以爲天子友悌之祥帝喜亦爲作頌憲尤謹畏未嘗干政而與人交帝益信重嘗以書賜憲等曰魏文帝詩西山一何高高高殊無極上有兩仙童不飲亦不食賜我一丸藥光耀有五色服之四五日身體生羽翼朕每言服藥而求羽翼靈如兄弟天生之羽翼乎陳思王之才足以經

國絕其朝請卒使憂死魏祚未終司馬氏奪之豈神丸效耶虞舜至聖捨象傲以親九族九族既睦平章百姓今數千載天下歸善焉此朕廢寢忘食所慕歎也頃因餘暇選仙錄得神方云餌之必壽今持此藥願與兄弟共之偕至長齡永永無極也後申王等相繼薨唯憲在帝親待愈益厚每生日必幸其第爲壽往往留宿居常無日不賜遺尚食總監及四方所獻酒酪異饌皆分餉之憲嘗請歲盡錄賜日付史官必數百紙後有疾護醫將騰騎相望也僧崇一者療之少損帝喜甚賜緋袍銀魚已而疾瘳劇薨年六十三帝失聲號慟左右皆泣下帝以憲實推天下有高世之行非大號不稱乃追謚讓皇帝遣尚書左丞相裴耀卿太常卿韋縉持節奉冊其子璉表陳憲宿素退讓不敢當大號制不許及歛出天子服一稱詔右監門大將軍高力士以手書寶靈坐贈妃元爲恭皇后葬橋陵旁及葬勅中使諭璉等送終之具使衆見之示以儉薄所司請如諸陵設干味食內壙中監護使耀卿建言尚食料水陸千餘種及馬牛驢犢鹿鵝鴨魚鴈體節之味并藥酒三十名盛夏胎養不可多殺考求禮據無所憑依陛下每申讓帝之志務存約素請蠲省折衷詔可既發引大雨有詔慶王潭等涉途泥步送十里號其墓曰惠陵憲常從帝按舞萬歲樓從複道上見衛士已食棄其餘寶中帝怒詔高力士杖殺之憲從容曰從複道上窺人之私恐士不自安且失大體豈以性命輕於餘殮乎帝遽止謂力士曰王於我可謂有急難也不然且誤殺士又涼州獻

新曲帝御便坐召諸王觀之憲曰曲雖佳然宮離而不屬商亂而暴君卑逼下臣僭犯上發於忽微形於音聲播之詠歌見於人事臣恐一日有播遷之禍帝默然及安史亂世乃思憲審音云憲本名成器避昭成太后諡與甲王成義俱改今名憲子十九人其聞者璉嗣莊璉瑪

璉眉宇秀整性謹潔善射帝愛之封汝陽王歷太僕卿與賀知章褚庭誨梁涉等善薨贈太子太師嗣莊幼有令名爲太子左諭德封濟陰王薨贈幽州大都督璉以祕書監爲嗣靈王從天子幸蜀薨

瑪早有材望偉儀觀始封隴西郡公從帝幸蜀至河池封漢中王山南西道防禦使乾元初靈國公主降回紇詔瑪以特進太常卿持節冊拜回紇爲威遠可汗瑪亦知音嘗早朝過永興里聞笛音顧左右曰是太常工乎曰然它日識之曰何故臥吹笛工驚謝又聞康崑崙奏琵琶曰琵琶聲多琵琶聲少是未可彈五十四絃大絃也樂家以自下逆鼓曰琵琶云肅宗詔收羣臣馬助戰瑪與魏少游等持不可帝怒貶蓬州長史薨贈太子太師諡曰宣孫景儉

景儉字寬中及進士第彊記多聞善言古成敗王霸大略高自負於士大夫無所屈王叔文等更譽之以爲管仲諸葛亮比叔文敗景儉以母喪得不坐羣夏卿守東都辟幕府寶羣在中丞引爲監察御史羣貶景儉亦爲江陵戶曹參軍累擢忠州刺史元和末入朝不見用復爲澧州刺史素與元稹李紳善二人方在翰林言其才及延英奉辭景儉自陳見抑遠穆宗憐之追詔爲倉部員外郎不遺閏月拜諫議大夫性

矜誕使酒縱氣語侵宰相蕭俛段文昌訴于帝貶建州刺史穆得君爲之助故還爲諫議大夫與馮宿楊嗣復溫造李肇等集史官獨孤朗所景儉醉至中書慢罵宰相王播崔植杜元穎更爲遜言厚謝乃去坐貶漳州刺史宿等皆逐矣未及漳檟輔政改楚州刺史議者謂景儉辱丞相貶未至卽遷非是積懼改少府監悉還宿等景儉旣湮阨不得志卒然其爲人輕財篤於義旣沒士悵悼之

莊惠太子撫本名成義初生武后以母賤欲不齒以示浮屠萬回回詭曰此西土樹神宜兄弟后喜乃畜之垂拱三年始王恆與衛趙二王同封俄改王衡陽睿宗立進王申與岐薛二王同封累遷右衛金吾二大將軍實封至千戶進司徒兼益州大都督四爲州刺史開元八年停刺史復爲司徒薨冊書贈太子及諡陪葬橋陵搗性寬裕儀貌瓌重無嗣詔以讓帝子珣嗣爲懷靈王徙封同安薨天寶中復以讓帝子璿

嗣

惠文太子範始名隆範玄宗立與薛王隆業避帝諱去二名初王鄭改封衛俄降封巴陵進王岐爲太常卿并州大都督左羽林大將軍從玄宗誅太平公主以功賜封與薛王業並滿五千戶歷爲州刺史遷太子太傅開元十四年薨冊書贈太子及諡陪葬橋陵帝哭之慟徹常膳至累旬羣臣勉請乃復範好學工

書愛儒士無貴賤爲盡禮與閭閻隱劉延琦張諤鄭繇等善常飲酒賦詩相娛樂又聚書畫皆世所珍者初隋亡禁內圖書湮放唐興募訪稍稍復出藏祕府長安初張易之奏天下善工潢治乃密使摹肖殆不可辨竊其真藏于家既誅悉爲薛稷取去稷又敗範得之後卒爲火所焚駙馬都尉裴虛己善識緯坐私與範游徙嶺南延琦貶雅州司戶謬爲山莊丞然帝於範無少間也謂左右曰兄弟情天至於我豈有異哉趨競者疆相附我終不以爲織介時王毛仲等起賤微暴貴諸王見必加禮獨範接之自如子瑾嗣落魄不飭名檢沈酒色歷太僕卿封河東王暴薨贈太子少師天寶中復以薛王子略陽公珍爲嗣

岐王珍儀觀豐偉爲宗正員外卿與蔚州鎮將朱融善融嘗言珍似上皇因有陰謀往語金吾將軍邢濟曰關外寇近京師草草奈何濟曰我金吾天子押衙以死生從安自脫融曰見嗣岐王無慮矣濟以聞肅宗詔廢珍爲庶人賜死融黨皆誅擢濟爲桂管防禦使

惠宣太子業始王趙降封中山授都水使者徙彭城兼陳州別駕進王薛爲羽林大將軍荊州大都督以好學授祕書監開元初進太子少保卽拜太保累歷州刺史初母早終從母賢妃鞠之八年迎賢妃外邸事之甚謹其女弟淮陽涼國二公主亦早卒撫甥與己子均帝益愛之嘗被疾帝自祝禱旣瘳幸其第置酒賦詩爲初生歡帝嘗不豫業妃弟內直郎韋賓與殿中監皇甫恂妄言休咎事賓坐死恂貶錦州刺史

妃恐降服待罪業亦不敢入講帝聞過召之業伏殿下請罪帝趨就執其手曰吾所猜于兄弟者天地共

咎之遂復燕歡仍諭妃復位俄進司徒二十二年業有疾帝憂之一昔容髮爲變因假寢夢獲方寤而業少間邪王守禮等請以事付史官及薨帝悲不能食冊書加贈及諡陪葬橋陵十一子其聞者瑗瑒瑒帝後追思業引見瑗等傷之乃下詔共賜實封于戶瑗爲樂安王瑒瑒陽王宗正卿瑒爲嗣薛王厯鴻臚卿天寶中瑒舅韋堅爲李林甫所搆坐貶夷陵別駕徙置夜郎南浦及安祿山亂乃還京師

會孫知柔嗣王再爲宗正卿久之擢京兆尹始鄭白渠梗壅民不得歲知柔調三輔治復舊道灌浸如約遂無旱虞民詣闕請立石紀功知柔固讓得止加累檢校司徒同中書門下平章事又詔營緝太廟判度支充諸道鹽鐵轉運使昭宗出莎城獨知柔從乘輿器用庖頓皆主之大細畢給性儉約雖位通顯無居第未幾出拜清海軍節度使在鎮廉潔貢獻時入進檢校太傅兼侍中仕凡四紀常爲宗室冠卒于鎮隋王隆悌始封汝南王早薨睿宗追王贈荊州大都督爵不傳

贊曰中宗失道身爲母所廢妻所弑而四子皆不得其死嗣亦不傳殆天穢其德而絕之何耶彼固自絕于天云爾睿宗有聖子一受命一追帝三贈太子天與之報福流無窮盛歟

章懷太子孫承宏賊退詔放承宏于華州死承靈封嗣邪王○沈炳震曰舊書止放虢州尋死承靈天寶

初授率更令同正員

譙王重福傳貶濮州員外刺史徙合均二州○沈炳震曰舊書貶濮州後轉均州無合州文

讓皇帝憲傳進尚書右僕射○舊書作拜尚書左僕射

憲子十九人○舊書作憲凡十子

宋 端 明 殿 學 士 宋 祁 撰

列傳第七

十一宗諸子

玄宗三十子劉華妃生琮第六子琬第十二子璵趙麗妃生瑛元獻皇后生肅宗皇帝錢妃生琰皇甫德儀生瑤劉才人生瑒武惠妃生一第十五子敏第十八子瑁第二十一子琦高婕妤生璵郭順儀生璵柳婕妤生玢鍾美人生環盧美人生瑄閻才人生玼王美人生珪陳才人生珙鄭才人生瑱武賢儀生璿第三十子璿餘七子天母氏失傳

奉天皇帝琮景雲元年王許昌郡與真定王同封先天元年進王鄴與鄧王同封開元四年領安西大都護安撫河東關內隴右諸蕃大使十三年徙王慶與忠棟榮光儀潁永壽延盛濟十一王同封十五年與十王並領節度不出閩琮以涼州都督兼河西諸軍節度大使天寶元年改節河東十載薨贈太子諡靖德肅宗立詔曰靖德太子琮親則朕兄睿慈聰明朕昔踐儲極顧誠非次君父有命不敢違承言懇讓不克如素宜進諡奉天皇帝妃寶為恭應皇后詔尚書右僕射裴冕持節改葬羣臣素服臨送達禮門帝御

門哭以過喪墓號齊陵無子以太子瑛子休嗣王琮始名嗣直太子嗣謙棟王嗣真鄂王嗣初熾恭太子嗣玄開元十三年更名曰潭曰鴻曰洽曰涓曰湜後十年改今名

太子瑛始王真定進王郢開元三年立爲皇太子七年詔太子諸王入國學行齒胄禮太常擇日謁孔子太子獻詔右散騎常侍褚無量執經羣臣學官諸生以差賜帛明年瑛加元服見太廟十六年詔九品官息女可配太子者有司採闈待進止以太常少卿薛綰女爲妃帝種麥苑中瑛諸王侍登帝曰是將薦宗廟故親之亦欲若等知稼穡之難因分賜侍臣曰春秋書無麥禾古所甚重比詔使者闈田畝所對不實故朕自時以觀其成云初瑛母以倡進善歌舞帝在潞得幸及卽位擢妃父元禮兄常奴皆至大官鄂光二王母亦帝爲臨淄王時以色選及武惠妃寵幸傾後宮生壽王愛與諸子絕等而太子二王以母失職頗怏怏惠妃女咸宜公主壻揚洄揣妃旨伺太子短譁爲醜語惠妃訴于帝且泣帝大怒召宰相議廢之中書令張九齡諫曰太子諸王日受聖訓天下共慶陛下享國久子孫蕃衍奈何一日棄三子昔晉獻公感嬖姬之讒甲生憂死國乃大亂漢武帝信江充巫蠱禍及太子京師喋血晉惠帝有賢子賈后譖之乃至喪亡隋文帝聽后言廢太子勇遂失天下今太子無過二王賢父子之道天性也雖有失尙當掩之惟陛下裁赦帝默然太子得不廢俄而九齡罷李林甫專國數稱壽王美以摠妃意妃果德之二十五年

洄復搆瑛瑛與妃之兄薛鏞異謀惠妃使人詭召太子二王曰宮中有賊請介以入太子從之妃白帝

曰太子二王謀反甲而來帝使中人視之如言遽召宰相林甫議答曰陛下家事非臣所宜豫帝意決乃詔太子瑛鄂王瑤光王琚同惡均罪並廢爲庶人鏞賜死瑛瑤琚尋遇害天下冤之號三庶人歲中惠妃數見庶人爲祟因大病夜召巫祈之請改葬且射行刑者瘞之訖不解妃死祟亡寶應元年詔贈瑛皇太子瑤等復王瑛子五人儼伸倩佻備瑛之廢帝使慶王畜儼等爲子儼封新平郡王伸平原郡王佻嗣慶王備太僕卿倩失傳

棟王琚開元二年始王郢與鄂鄂二王同封後徙王棟領太原牧太原以北諸軍節度大使天寶初爲武威郡都督經略節度河西隴右會妃章以過置別室而二孺人爭寵不平求巫者密置符瑛履中以求媚嘗人告瑛厭魅上帝伺其朝使人取履視之信帝怒責瑛頓首謝曰臣罪宜死然臣與婦不相見二年有二孺人爭長臣恐此三人爲之及推果驗然帝猶疑瑛怒未置太子以下皆爲請乃囚於鷹狗坊以憂薨妃嬖之女無子還本宗琚凡五十五子得王者四人僕王汝南郡僑宜都俊濟南俊順化僚太僕卿俠國子祭酒仁殿中監優祕書監寶應元年詔復琚王爵

鄂王瑤旣封遙領幽州都督河北節度大使開元二十三年與榮光儀穎永壽延盛濟信義十一王並授

開府儀同三司實封二千戶詔詣東宮尙書省上日百官集送有司供張設樂是日悉拜王府官屬然未有府也而選任冒濫時不以爲榮

靖恭太子琬始王鄆徙王榮爲京兆牧領隴右節度大使又詔親巡按隴右選關內河東飛騎五萬防盛秋累兼單于安北大都督安祿山反詔琬爲征討元帥募河隴兵屯陝以高仙芝副之會薨琬風格秀整有素望中外倚之及薨莫不爲國悵恨詔加贈諡琬男女五十八人得王者三人俯王濟陰郡偕北平倩陳留偃衛尉卿儋祕書監佩鴻臚卿

光王瑒開元十三年始王與儀穎永壽延盛濟七王同封俄領廣州都督勇力善騎射帝愛之與鄂王同居友睦甚皆篤學旣廢無嗣初瑒名滄儀王滄穎王滄永王滄壽王滄延王滄盛王滄濟王滄信王滄義王滄陳王滄豐王滄恆王滄涼王滄汴王滄至二十三年詔悉改今名

夏悼王一生韶秀以母寵故鍾愛命之曰一未免懷薨追爵及諡時帝在東都故葬龍門東岑欲宮中望見云

儀王璿旣封授河南牧薨贈太傅子侁王鍾陵郡健廣陵

穎王璿喜讀書好文辭開元十五年遙領安東都護安祿山反詔領劍南節度大使以楊國忠爲之副帝西出令御史大夫魏方進爲置頓使移書劍南屬郡詔璿之藩大設備備璿先帥鎮更以蜀郡長史崔圓爲副璿濟江舟中以綵席藉步命徹之曰此可寢奈何踐之璿之出遽不及受節司馬史責請建大槩蒙油囊先驅以威道路璿笑曰旣爲眞王矣安用假節爲將至成都崔圓迎拜馬前璿不爲禮圓銜之璿視事再踰月人便其寬圓奏罷居內宅乃詔宣慰肅宗於彭原從還京師建中四年薨年六十六子伸爲滎陽王偃高邑王倪楚國公僖夔國公

懷思王敏貌豐秀若圖畫帝愛之甫晬薨追爵及諡祔葬敬陵

承王璘少失母肅宗自養視之長聰敏好學貌陋甚不能正視旣封領荊州大都督安祿山反帝至扶風詔璘卽日起鎮俄又領山南江西嶺南黔中四道節度使以少府監賈昭爲副璘至江陵募士得數萬補署郎官御史時江淮租賦鉅億萬在所山委璘生宮中於事不通曉見富且強遂有闕江左意以薛鏐李臺卿韋子春劉巨鱗蔡嗣爲謀主肅宗聞之詔璘還覲上皇于蜀璘不從其子襄成王傷剛驚乏謀亦樂亂勸璘取金陵卽引舟師東下甲士五千趨廣陵以渾惟明季廣琛高仙琦爲將然未敢顯言取江左也會吳郡採訪使李希言平牒璘因發怒曰寡人上皇子皇帝弟地尊禮絕今希言乃平牒抗威落筆署字何邪乃使惟明襲希言而令廣琛趨廣陵攻採訪使李成式璘至當塗希言已屯丹陽遣將元景曜等

拒戰不勝降於璘江淮震動明年肅宗遣宦者啖廷瑤等與成式謀招諭之時河南招討判官李銑在廣陵有兵千餘廷瑤邀銑屯揚子成式又遣裴戎以廣陵卒三千戍伊婁張旗幟大閱士璘與傷登陴望之有懼色廣琛知事不集謂諸將曰與公等從王豈欲反邪上皇播遷道路不通而諸子無賢於王者如總江淮銳兵長驅雍洛大功可成今乃不然使吾等名結叛逆如後世何衆許諾遂割臂盟於是惟明奔江寧馮季康奔白沙廣琛以兵六千奔廣陵璘使琦追躡之廣琛曰我德王故不忍決戰逃命歸國耳若逼我且決死追者止乃免是夜銑陣江北夜然束韋人執二炬景亂水中覘者以倍告璘軍亦舉火應之璘疑王師已濟攜兒女及麾下遁去遲明覺其給復入城具舟楫使傷驅衆趨晉陵諜者告曰王走矣成式以兵進先鋒至新豐璘使傷仙琦逆擊之銑合勢張左右翼射傷中肩軍遂敗仙琦與璘奔鄱陽司馬閉城拒璘怒焚城門入之收庫兵掠餘千將南走嶺外皇甫仇兵追及之戰大庾嶺璘中矢被執仇殺之傷爲亂兵所害仙琦逃去璘未敗時上皇下誥降爲庶人徙置房陵及死仇送妻子至蜀上皇傷悼久之肅宗以少所自鞠不宣其罪謂左右曰皇甫仇執吾弟不送之蜀而擅殺之何邪由是不復用薛鏐等皆伏誅子儻爲餘姚王偵莒國公儼郟國公伶儀並國子祭酒

壽王瑁母惠妃賴姪不育及瑁生靈王請養邸中元妃自乳之名爲己子故封比諸王最後開元十五年

進領益州大都督初帝以承王等尚幼詔不入講禮七歲請與諸兄衆謝拜舞有儀知帝異之靈王薨請

制服以報私恩詔可大曆十年薨贈太傅子王者三人儂王德陽郡休濟陽郡偃廣陽郡仇薛國公傑國

子祭酒

延王玢母尚書左丞範之孫帝重其名家而玢亦仁愛有學既封遙領安西大都護帝入蜀玢凡三十六子不忍棄故徐進數日見行在所帝怒漢中王瑀申救得解聽歸靈武興元元年薨子倬王彭城郡偃平陽儼魯國公偃荆國公仇太僕卿

盛宣王琦既封領揚州大都督帝之西詔爲廣陵大都督淮南江東河南節度大使以劉彙爲副李成式爲副大使琦不行廣德二年薨贈太傅子儻封真定王佩武都王俗徐國公係許國公

濟王環逸其薨年子儂王永嘉郡旃平樂郡

信王瓊開元二十一年始王與義陳豐恆涼汴六王同封子倬封新安王儻晉陵王

義王玘與信王並失薨年子儀爲舞陽王儻高密王

陳王珪二十一子得王者三人倫王安南郡佗臨淮佗安陽

豐王珙已封爲左衛大將軍帝至普安授珙武威都督河西隴右安西北庭節度大使以隴西太守鄧景

乾隆四年校刊

唐書卷八十一列傳

山爲副琪不行廣德初吐蕃入京師代宗幸陝將軍王懷忠閉苑門以五百騎劫諸王西迎虜過郭子儀懷忠曰上東遷宗社無主今僕奉諸王西奔以係天下望公爲元帥惟所廢置子儀未對琪輒曰公何如司馬王延昌質責琪曰上雖蒙塵未有失德王爲藩翰安得狂悖之言子儀亦讓之卽護送行在所帝赦不責琪語不遜羣臣恐其亂請除之乃賜死子儀爲齊安王

恆王瑱好方士常服道士服從帝幸蜀還代宗時薨

涼王璿母高平王重規之女宮中號小武妃者璿薨代宗時子仇爲瀘陽郡王

汴哀王璿於諸子爲最少初封纔數歲容貌秀澈有成人風帝愛之開元二十三年授右千牛衛大將軍明年薨唐制親王封戶八百增至千公主三百長公主止六百高宗時沛英豫三王太平公主武后所生戶始踰制垂拱中太平至千二百戶聖祿初相王太平皆二千壽春等五王各三百神龍初相王太平至五千衛王三千溫王二千壽春等王皆七百嗣雍衡陽臨淄巴陵中山王五百安樂公主二千長寧千五百宣城宣安各千相王女爲縣主各三百相王增至七千安樂三千長寧二千五百宣城以下二千相王太平長寧安樂以七丁爲限雖水旱不蠲以國租庸滿之中宗遺詔雍壽春王進爲親王戶千開元後天子數陸兄弟故寧王戶至五千五百岐薛五千申王以外家微戶四千邠王千八百帝妹戶千中宗

諸女如之通以三丁爲限及皇子封王戶二千公主五百咸宜公主以母惠妃故封至千自是諸公主例

千戶止初文德皇后崩晉王最幼太宗憐之不使出閤豫王亦以武后少子不出閤嗣聖初卽帝位及降封相王乃出閤中宗時譙王失愛遷外藩溫王年十七猶居宮中遂立爲帝開元後皇子幼多居禁內既長詔附苑城爲大宮分院而處號十王宅所謂慶忠棣鄂榮光儀穎永延盛濟等王以十舉全數也中人押之就夾城參天子起居家令每進膳引詞學士入授書謂之侍讀壽信義陳豐恆涼七王就封亦居十宅鄂光廢死忠王立爲太子慶棣繼薨唯榮儀十四王居院而府幕列於外坊歲時通名起居既又諸孫多則於宅外更置百孫院天子歲幸華清宮又置十王百孫院于宮側宮人每院四百餘百孫院亦三四十人禁中置維城庫以給諸王月奉諸孫納妃嫁女就十王宅太子不居東宮處乘輿所幸別院太子親王公主婚嫁並供帳於崇仁之禮院此承平制云

肅宗十四子章敬皇后生代宗皇帝宮人孫生係張生俊王生必陳婕妤生僅韋妃生間張美人生倂後宮生榮裴昭儀生僂段婕妤生樞崔妃生偲張皇后生佖偲後宮生僖

越王係生開元時玄宗末王太子子故係王南陽郡帝卽位至德二載十二月進王趙與彭亮涇鄆襄杞召興定九王同封乾元二年九節度兵潰河北朝廷震駭乃以李光弼代郭子儀總兵關東而光弼

請賢王爲帥於是詔係充天下兵馬元帥而光弼以司空兼侍中薊國公副知節度行營事係留京師史思明陷洛陽係請行不聽明年徙王越帝寢疾皇太子監國張皇后與中人李輔國有隙因召太子入謂曰輔國典禁軍用事久四方詔令皆出其口矯天子制逼徙聖皇天下側目今上疾彌留輔國常怏怏忌吾與汝又程元振陰結黃門圖不軌若釋不誅禍不移頃太子泣曰此二人者陛下勳舊而上體不豫重以此事得無震驚乎願出外徐計之后曰是難與共事者乃召係曰汝能行此乎係許諾即遣內謁者監段恆俊選材勇宦者二百人授甲長生殿以帝命召太子元振以告輔國乃相與勒兵凌霄門迎太子以難告太子曰上疾亟吾可懼死不赴乎元振曰赴則及禍乃以兵護太子止飛龍廡勒兵夜入三殿收係及恆俊等百餘人擊之幽后別殿后及係皆爲輔國所害係三子建王武威郡道與道逾齊國公

承天皇帝倓始王建寧英毅有才略善騎射祿山亂典親兵扈車駕度渭百姓遮道留太子太子使喻曰至尊播遷吾可以違左右乎倓進說曰逆胡亂常四海崩分不因人情圖興復雖欲從上入蜀而散關以東非國家有夫大孝莫若安社稷殿下當募豪傑趣河西收牧馬今防邊屯士不下十萬而光弼子儀全軍在河朔與謀興復策之上者廣平王亦贊之於是議定太子北過渭兵仗鹽惡士氣崩沮日數十戰倓以驍騎數百從每接戰常身先血股袂不告也太子或過時未食倓輒涕泗不自勝三軍皆屬目至靈武

太子卽帝位議以倓爲天下兵馬元帥左右固請廣平王帝曰廣平既家福安用元帥答曰太子從曰攝

軍守曰監國元帥撫軍也莫宜於廣平王帝從之更詔倓典親軍以李輔國爲府司馬時張良娣有寵與輔國交構欲以動皇嗣者倓忠蹇數爲帝言之由是爲良娣輔國所譖妄曰倓恨不總兵鬱鬱有異志帝或偏語賜倓死俄悔悟明年廣平王收二京使李泌獻捷泌與帝雅素從容語倓事帝改容曰倓於艱難時實自有力爲細人間圖欲害其兄我計社稷割愛而爲之所泌曰爾時臣在河西知其詳廣平於兄弟篤睦至今言建寧則嗚咽不自已陛下此言得之讒口耳帝泣下曰事已爾未耐何泌曰陛下嘗聞黃臺瓜乎高宗有八子天后所生者四人自爲行而睿宗最幼長曰弘爲太子仁明孝友后方圖臨朝鳩殺之而立次子賢賢日憂惕每侍上不敢有言乃作樂章使工歌之欲以感悟上及后其曰種瓜黃臺下瓜熟子離離一摘使瓜好再摘令瓜稀三摘尙云可四摘抱蔓歸而賢終爲后所斥死黔中陛下今一摘矣慎無再帝愕然曰公安得是言是時廣平有大功亦爲后所構故泌因對及之廣平遂安及卽位追贈倓齊王大厯三年有詔以倓當艱難時首定大謀排衆議於中興有功乃進諡承天皇帝以興信公主季女張爲恭順皇后冥配焉葬順陵祔主奉天皇帝廟同殿異室云初李泌請加贈倓代宗曰倓性忠孝而困於讒追帝之若何答曰開元中上皇兄弟皆贈太子帝曰是特祖宗友愛耳豈若倓有功乎於是追帝號遺

使迎喪彭原既至城門喪輜不動帝謂泌曰豈有恨邪卿往祭之以白朕意且卿及知倓難艱定策者泌為挽詞二解追述倓志命挽士唱泌因進爵輜乃行觀者皆為垂泣

衛王佖始王西平番薨寶應元年五月與鄆王同追封

彭王僅始王新城進封彭史思明陷河洛人心震駭羣臣請以諸王臨統方鎮兵遙相維歷於是詔僅充河西節度竟王北庭涇王隴右杞王陝西興王鳳翔並為大使是歲僅薨子鎮為常山郡王

竟王侗始王潁川進王竟寶應元年薨

涇王倓始王東陽進王涇興元元年薨

鄆王榮始王靈昌番薨追封

襄王僎至德二載始王與杞召興定四王同封貞元七年薨子宣為伊吾郡王柔樂安王宣裔孫煜

煜性謹柔材無過人者光啟二年田令孜逼僖宗幸興元邪靈節度使朱玫以五千騎追乘輿不及煜以疾不能從玫劫之駐鳳翔得臺省官百餘乃脅宰相蕭遘等率羣臣盟石鼻驛奉煜為嗣襄王監軍國事因還京師即封拜官屬初遘執不可於是罷遘而玫自為侍中號令已出以裴澈為門下侍郎鄭昌圖中

書侍郎皆平章事遣柳陟等十餘人分諭天下嗣襄王所以監國意皆得進官玫又脅太子太師裴瓌等奉煜進煜五讓乃即位改元建貞傳僖宗為太上元皇聖帝河中節度使王重榮率諸藩貢奉歸者十

八九而蔡州秦宗權自僭號惟太原李克用不從時帝遣使喻重榮克用故二人聽命樞密使楊復恭等傳檄三輔募能斬政者以邪靈節度界之其僞將王行瑜自鳳州入京師殺政而煜與澈昌圖并官屬奔東渭橋重榮給使迎之煜與官屬別且泣曰朕見重榮當令備所服迓公等至蒲執殺之因械澈等于獄誅殺僞官函煜首至行在所煜即僞位凡九月敗始煜首至羣臣白帝御興元南門受之百官稱賀太常博士殷盈孫奏言禮公族有罪有司曰某之罪在大辟君曰赦之如是者三走出致刑焉君為素服不舉者三日今煜皇族以不能固節迫脅至此宜廢為庶人絕屬籍葬以庶人禮大捷之慶須朱玫首至乃賀詔可

杞王倓貞元十四年薨

召王僖元和元年薨

恭懿太子佖始封興王上元元年薨佖生后方專愛帝最憐之后數撼儲嫡欲以佖嗣會薨計塞是夕帝及后夢佖辭決流涕去帝顛悵故冊贈皇太子

定王侗寶應初薨

代宗二十子睿真皇后生德宗皇帝崔妃生懿真懿皇后生迴十七王史亡其母之氏位

昭靖太子邈好學以賢聞上元二年始王益昌帝卽位寶應元年進王鄭與韓王同封淄青牙將李懷玉逐其帥侯希逸詔邈爲平盧淄青節度大使以懷玉知留後大厯初代皇太子爲天下兵馬元帥八年薨遂罷元帥府

均王邈早薨貞元八年追封

睦王述大厯十年田承嗣不臣而昭靖天無疆王帝乃悉王諸子領諸鎮軍威天下於是以述爲睦王領嶺南節度邈邠王渭北鄜坊節度過韓王汴宋節度造忻王昭義節度皆爲大使連爲恩王邈鄜王邈韶王邈端王邈循王通恭王達原王逸雅王並開府儀同三司然不出閭德宗建中初周天下訪太后所在述於諸王最長故拜奉迎太后使以工部尙書喬琳副之貞元七年薨

丹王逾始王邠建中四年與簡王同徙封元和十五年薨

恩王連元和十二年薨

韓王迴始王延慶郡以母寵故與鄭王先徙封貞元十二年薨

簡王邈始王鄜徙封簡元和四年薨

益王邈大厯十四年始王亡薨年

隋王迅興元元年薨

荆王選番薨建中二年追王

蜀王邈本名遂大厯十四年始王建中二年改今名

忻王造元和六年薨

韶王暹貞元十二年薨

嘉王運貞元十七年薨

端王遇貞元七年薨

循王遙亡薨年

恭王通亡薨年

原王達太和六年薨

雅王逸貞元十五年薨

德宗十一子昭德皇后生順宗皇帝帝取昭靖太子子誼爲第二子又取順宗子颯爲第六子餘八王史

乾隆四年校刊

唐書卷八十一列傳

亡其母之氏位

舒王誼初名謨帝愛其幼取爲子大厯十四年始王舒與通虔肅資四王同封拜開府儀同三司詔有司給奉稍俄以軍興罷謨於諸王最長帝欲試以事故拜涇原節度大使時尙父郭子儀病篤帝臨軒遣謨持詔往視謨冠遠遊冠御絳袍乘象輅四馬飛龍士三百國府官皆袴褶以從子儀手叩頭謝恩謨宣詔已乃易服勞問還於是李希烈反招討使李勉戰不勝奔宋州朝廷大震乃拜謨揚州大都督荆襄江西沔鄂節度使諸軍行營兵馬都元帥改名誼軍中以哥舒翰由元帥敗而王所封同之帝乃使徙王晉以兵部侍郎蕭復爲統軍長史湖南觀察使孔巢父爲行軍左司馬山南東道節度行軍司馬樊澤爲右刑部員外郎劉從一侍御史韋儼爲判官兵部員外郎高參掌書記右金吾大將軍渾瑊爲中軍虞候江西節度使嗣曹王臯爲前軍兵馬使鄂岳團練使李兼副之山南東道節度使賈耽爲中軍兵馬使荆南節度使張伯儀爲後軍兵馬使左神武軍使王价左衛將軍高承謙檢校太子詹事郭曙檢校右庶子常愿爲押衙未及行涇原兵士反誼從帝出奉天朱泚攻城誼晝夜傳勞諸軍不解帶帝還京師復故封揚州大都督如故永貞元年薨

通王誼始王拜開府儀同三司貞元九年領宣武節度大使以李萬榮爲留後二年徙河東以李說爲留後皆不出閤

虔王諒以王拜開府儀同三司貞元二年領蔡州節度大使以吳少誠爲留後十年徙節朔方靈鹽以李樂爲留後明年領橫海又徙徐州以程懷信張愔爲留後不出閤

肅王詳資秀異帝愛之建中二年薨甫四歲帝欲用浮屠說塔而不墳禮儀判官李崱諫非禮乃止詔贈揚州大都督

文敬太子諫見愛於帝命爲子貞元初先諸王王邕歷義武昭義二軍節度大使以張茂昭王虔休爲留後不出閤十五年薨年十八追贈及諡葬日羣臣以位而哭通化門外陵及廟置令丞云

資王謙亡薨年

代王誼始王縉雲郡番薨建中二年追王

昭王誠貞元二十一年始王亡薨年

欽王諤順宗卽位與珍王同封亡薨年

珍王誠太和六年薨

順宗二十七子莊憲皇后生憲宗皇帝及綰張昭訓生經趙昭儀生結王昭儀生總約緄餘二十王史亡

乾隆四年校刊

唐書卷八十一列傳

九

母之氏位四王蚤薨亡官諡

鄭王經本名渙貞元四年始王建康郡與廣陵洋州臨淮弘農漢東晉陵高平雲安宣城德陽河東洛交
十二王同封二十一年又與均淑莒密郃邵宋集冀和衡欽會珍福撫岳袁桂翼二十王皆進王王二十
九年太和八年薨

均王緯初名沔王洋川後進王王三十三年開成二年薨

淑王縱初名洵王臨淮後進王王三十二年開成元年薨

莒王紆初名浼為祕書監王弘農後進王王二十九年太和八年薨

密王綢初名泳王漢東後進王王三年元和二年薨

郃王總初名湜授少府監王晉陵後進王王四年元和三年薨

邵王約初名淑為國子祭酒王高平進王王二年元和元年薨

宋王結初名滋王雲安進王王十八年長慶二年薨

集王緄初名淮王宣城進王王十八年長慶二年薨

冀王球初名潛為太常卿王德陽進王王三十年太和九年薨

和王綸初名沔王河東進王王二十八年太和七年薨

衡王絢王二十二年寶曆二年薨

會王繡王六年元和五年薨

福王綰歷魏博節度大使咸通元年進拜司空王五十七年咸通二年薨

珍王繕初名況王洛交後進王亡薨年

撫王紘咸通初歷司空又進司徒太尉王七十二年乾符三年薨

岳王緝王二十三年太和二年薨

袁王紳王五十六年咸通元年薨

桂王綸王十年元和九年薨

翼王綽王五十八年咸通三年薨

靳王緝王六年咸通八年薨

欽王績亡薨年

憲宗二十子紀美人生靈懿安皇后生穆宗皇帝孝明皇后生宣宗皇帝餘十七王皆後宮所生史逸其

母之號氏

惠昭太子靈貞元二十一年始王平原與同安彭城高密文安四王同封帝即位進王鄧與灃深洋絳四王同封於是國嗣未立李絳等建言聖人以天下為大器知一人不可獨化四海不可無本故建太子以自副然後人心定宗祏安有國不易之常道陛下受命四年而冢子未建是開窺覲之端乖慎重之義非所以承列聖示萬世帝曰善以靈為皇太子更名宙前以制示絳等未幾復初名用禮用孟夏雨不克改用孟秋亦雨冬十月克行禮明年薨年十九

灃王暉始王同安後進王惠昭之喪吐突承瓘議復立儲副意屬暉帝自以穆宗為太子帝崩之夕承瓘死王被殺祕不喪發久之以告廢朝三日三子曰漢王東陽郡曰源安陸曰演臨安初暉名寬深王察洋王寶絳王寮建王審元和七年並改今名

深王惊始王彭城郡進王深子潭王河內淑吳興洋王忻始王高密進王洋太和二年薨子沛王潁川郡絳王悟始王文安進王敬宗崩蘇佐明等矯詔以王領軍國事王守澄等立文宗王見殺二子洙王新安

潁高平

建王恪元和元年始封時淄青節度使李師古死其弟師道句符節故詔恪為鄆州大都督平盧軍淄青等州節度大使以師道為留後然不出閭長慶元年薨無嗣

鄆王憬長慶元年始王與瓊沔葵茂淄衛澶七王同封開成四年薨子溥平陽王郡

瓊王悅子津河間郡王

沔王恂子瀛晉陵郡王

葵王懌子清新平郡王

茂王愔子灃武功郡王

淄王協開成元年薨子滸許昌郡王渙馮翊郡王

衛王懌子涉晉平郡王

澶王忱子濬鴈門郡王

棣王惲大中六年始王與彭信二王同封咸通三年薨無嗣

彭王惕乾寧中韓建殺之石隄谷無嗣

信王愔咸通八年薨無嗣

榮王慎咸通三始王廣明初拜司空子令平嗣王凡八王史失其薨年

乾隆四年校刊

唐書卷八十一列傳

穆宗五子恭僖皇后生敬宗皇帝貞獻皇后生文宗皇帝宣懿皇后生武宗皇帝餘二王亡其母之氏位
懷懿太子湊少雅裕有尋矩長慶元年始王漳與安王同封文宗卽位疾王守澄顯復引支黨撓國謀盡
誅之密引宰相宋申錫使爲計守澄客鄭注何知之以告乃謀先事殺申錫又以王賢有中外望因欲株
聯大臣族夷之乃令神策虞候豆盧著上飛變且言宮史晏敬則朱訓與申錫昵吏王師文圖不軌訓嘗
言上多疾太子幼若兄終弟及必漳王立申錫陰以金幣進王而王亦以珍服厚答卽捕訓等繫神策獄
榜掠定其辭諫官羣伏閣極言出獄牒付外雜治注等懼事洩乃請下詔貶王帝未之悟因黜湊爲棗縣
公時大和五年也命中人持詔卽賜且慰曰國法當爾無它憂八年薨贈齊王注後以罪誅帝哀湊被讒
死不自明開成三年追贈

安王溶初楊賢妃得寵於文宗晚稍多疾妃陰請以王爲嗣密爲自安地帝與宰相李珣謀珣謂不可乃
止及帝崩仇士良立武宗欲重已功卽適溶嘗欲以爲太子事殺之

敬宗五子妃郭氏生普餘四王亡母之氏位

悼懷太子普姿性韶悟寶曆元年始王晉文宗愛之若己子嘗欲爲嗣大和二年薨帝惻念不能已故贈

卹加焉敬宗第一子休復文宗開成二年封梁王第三子執中爲襄王第四子晉揚爲紀王第五子成美
爲陳王執中子案爲樂平郡王

陳王成美初文宗以莊恪薨大臣數請建東宮開成四年帝乃立成美爲皇太典子冊未具而帝崩仇士
良立武宗殺之於邸子儼王宣城郡

文宗二子王德妃生永後宮生宗儉

莊恪太子永大和四年始王魯帝以王幼宜得賢輔因召見傅和元亮元亮以卒史進有所問不能答帝
責謂宰相王可教官屬應任士大夫賢者寧元亮比邪於是劇選戶部侍郎庾敬休兼王傅太常卿鄭肅
兼長史戶部郎中李踐方兼司馬六年遂立爲皇太子帝承寶曆荒怠身勤儉率天下謂晉王生謹敏欲
引爲嗣會蚤夭故久不議東宮事及太子立天下屬心焉開成三年詔宮臣詣崇明門謁朔望侍讀偶日
入對太子稍事燕豫不能壹循法保傅戒告愆不納又母愛弛楊賢妃方幸數譖之帝它日震怒御延英
引見羣臣詔曰太子多過失不可屬天下其議廢之羣臣頓首言太子春秋盛雖有過尙可改且天下本
不可輕動惟陛下幸赦御史中丞狄兼蒼流涕固爭帝未決罷羣臣又連章論救意稍釋詔太子還少陽
院以中人護視誅倖昵數十人勅侍讀寶宗直周敬復詣院授經然太子終不能自白其讒而行己亦不
加修也是年暴薨帝悔之明年下詔以陳王爲太子置酒殿中有俳兒緣橦父畏其顛環走橦下帝感動

謂左右曰朕有天下返不能全一兒乎因泣下卽取坊工劉楚才等數人付京兆榜殺之及禁中女倡十人斃永巷皆短毀太子者宰相楊嗣復等不及知因言楚才等罪當誅京兆殺之不覆奏敢以請翌日詔京兆後有決死勅不覆者亦許如故事以聞

蔣王宗儉開成二年始王亡薨年

武宗五子其母氏位皆不傳

杞王峻開成五年始王

益王峴會昌二年始王與兗德昌三王同封

兗王岐

德王嶧

昌王嵯並逸其薨年

宣宗十一子元昭太后生懿宗皇帝餘皆亡其母之氏位

靖懷太子漢會馬六年始王雍與夔慶二王同封大中六年薨有詔追冊

權王經大中元年始王亡薨年

通王滋會昌六年始王夔與慶王沂同封帝初詔鄆王居十六宅餘五王處大明宮內院以諫議大夫鄴

漳兵部郎中李鄴爲侍讀五日一謁乾符門爲王授經鄆王立爲懿宗乃罷滋徙王昭宗乾寧三年領侍衛諸軍是時誅王行瑜而李茂貞怨以兵入觀詔滋與諸王分統安聖奉宸保靈安化軍衛京師天子將狩太原韓建道迎之留次華州建畏王等有兵遣人上急變告諸王欲殺建脅帝幸河中帝驚召建論之稱疾不肯入勅滋與睦王濟王韶王彭王韓王沂王陳王謁建自解建留軍中奏言中外異體臣不可以私見又言晉八王擅權卒敗天下請歸十六宅悉罷所領兵帝不許建以兵環行在請誅大將李筠帝懼斬筠以謝建盡逐衛兵自是天子孤弱矣初帝使嗣延王戒丕嗣丹王允往見李克用二王還建惡之又嗣覃王嘗督軍伐茂貞於是劾奏比歲兵纏近輔諸王階其禍使乘輿越在下藩不得安臣已請解其兵今延覃丹三王尚陰計以危國請誅之帝曰渠至是邪後三日與劉季述矯詔以兵攻十六宅諸王被髮乘垣走或升屋極號曰帝救我建乃將十一王并其屬至石堤谷殺之徐以謀反聞天下冤之濟韶彭韓沂陳延覃丹九王史逸其系胄云

慶王沂大中十四年薨

濮王澤大中二年始王亡薨年

乾隆四年校刊 唐書卷八十一列傳

鄂王潤大中五年始王乾符三年薨

懷王洽大中八年與昭康二王同封亡薨年

昭王泂乾符三年薨

康王汶乾符四年薨

廣王灑大中十一年始王與衛王同封乾符四年薨

衛王濯大中十四年薨

懿宗八子惠安皇后生僖宗皇帝恭憲皇后生昭宗皇帝餘六王亡其母氏位

魏王侑咸通三年始與涼蜀二王同封

涼王侔乾符六年薨

蜀王信

威王侃咸通六年始王郢十年徙王

吉王保咸通十三年始王與睦王同封王於兄弟為最賢始僖宗崩王最長將立之楊復恭獨議以昭宗

嗣乾寧元年李茂貞等以兵入京師謀廢帝立王會李克用以兵逐行瑜乃止

恭哀太子倚初封睦王為劉季述所殺天復初追贈

僖宗二子史失其母氏位

建王震中和元年始王

益王暉光啟三年始王並亡薨年

昭宗十七子積善皇后生裕及哀皇帝餘皆失母之氏位

德王裕大順二年始王帝幸華州韓建已奪諸王兵不自安乃請王皇子之末王者既又殺諸王因請立

裕為皇太子釋言於四方時乾寧四年也劉季述等幽帝東內奉裕即皇帝位季述誅裕匿右軍或請殺

之帝曰太子冲孺賊疆立之且何罪詔還少陽院復為王朱全忠自鳳翔還見王春秋盛標字軒秀忌之

密語崔胤曰王既竊帝矣大義滅親渠可留公任宰相盍啟之胤從容言如全忠意帝不許它日以語全

忠全忠曰此國大事臣安敢與此必胤賣臣也乃免帝遷洛它日謂蔣玄暉曰德王朕愛子全忠奈何欲

殺之言已泣下自齧指流血玄暉即隨語全忠全忠恚帝被弑玄暉置酒邀諸王九曲池飲酣皆殺之投

尸水中

棟王祐乾寧元年始王與虔沂遂三王同封

乾隆四年校刊唐書卷八十一列傳

虔王禊

沂王禋

遂王禕

景王祕乾寧四年始王與祁王同封

祁王祺

雅王禛光化元年始王與瓊王同封

瓊王祥

端王禎天祐元年始王與豐和登嘉四王同封

豐王祚

和王福

登王禧

嘉王祐

順王禎天祐二年始王與蔡王祐同封

蔡王祐

贊曰唐自中葉宗室子孫多在京師幼者或不出閣雖以國王之實與匹夫不異故無赫赫過惡亦不能為王室軒輊運極不遺與唐俱殫然則歷數短長自有底止彼漢七國晉八王不得其效愈速禍云

靖恭太子琬傳男女五十八人得王者三人○舊書封為郡王者二

永王璘傳以薛鏐李臺卿韋子春劉巨鱗蔡嗣為謀主○蔡嗣舊書作蔡瑀

成式又遣裴戎以廣陵卒三千戍伊婁城○裴戎舊書作裴茂

舒王誼傳鄂岳團練使李兼副之○李兼舊書作李謙

荆南節度使張伯儀為後軍兵馬使○張伯儀舊書作張伯謙

肅王詳傳建中二年薨○舊書作三年十月薨

順宗二十七子○舊書作二十三子

張昭訓生經○舊書作王昭儀生鄭王經

郇王總傳○舊書作郇王綜

翼王綽傳○綽本紀作縹

肅王緝傳王六年咸通八年薨○舊書作咸通八年封

懷懿太子湊傳八年薨贈齊王○文宗紀薨在九年

陳王成美傳子儼王宣城郡○沈炳震曰新書宗室表宣城王儼為元宗子陳王珪子此作陳王成美子因同為陳王而誤也蓋元宗至敬宗凡七帝無元宗之孫至是始封郡王之理則儼為成美之子非珪之子可知表應附會

昭宗十七子○舊書作十子

舊書卷八十二考證
唐書卷八十三

宋 端 明 殿 學 士 宋 祁 撰

列傳第八

諸公主

世祖一女

同安公主高祖同母媼也下嫁隋州刺史王裕貞觀時以屬尊進大長公主嘗有疾太宗躬省視賜繡五百姆侍皆有資予永徽初賜實戶三百薨年八十六裕隋司徒東之子終開府儀同三司

高祖十九女

長沙公主下嫁馮少師

襄陽公主下嫁竇誕

平陽昭公主太穆皇后所生下嫁柴紹初高祖兵興主居長安紹曰尊公將以兵清京師我欲往恐不能借奈何主曰公行矣我自為計紹詭道走并州主奔鄆發家貲招南山亡命得數百人以應帝於是名賊何潘仁壁司竹園殺行人稱總管主遣家奴馬三寶喻降之共攻鄆別部賊李仲文向善志巨師利等各

乾隆四年校刊 唐書卷八十三列傳

持所領會戲下因略地盤屋武功始平下之乃申法誓眾禁剽奪遠近咸附勒兵七萬威振關中帝度河
紹以數百騎並南山來迎主引精兵萬人與秦王會渭北紹及主對置幕府分定京師號娘子軍帝即位
以功給資不涯武德六年薨葬加前後部羽葆鼓吹大路麾幢虎賁甲卒班劍太常議婦人葬古無鼓吹
帝不從曰鼓吹軍樂也往者主身執金鼓參佐命于古有邪宜用之

高密公主下嫁長孫孝政又嫁段綸綸隋兵部尚書文振子為工部尚書杞國公永徽六年主薨遺命吾
葬必令墓東向以望獻陵冀不忘孝也

長廣公主始封桂陽下嫁趙慈景慈景隴西人帝美其姿制故妻之帝起兵或勸亡去對曰母以我為命
且安往吏捕繫于獄帝平京師引拜開化郡公為相國府文學進兵部侍郎為華州刺史討堯君素戰死

贈秦州刺史諡曰忠公主更嫁楊師道聽悟有思工為詩豪侈自肆晚稍折節以壽薨
長沙公主始封萬春下嫁豆盧覽子懷讓

房陵公主始封永嘉下嫁竇奉節又嫁賀蘭僧伽
九江公主下嫁執失思力

唐江公主下嫁番師望為同州刺史

南昌公主下嫁蘇鼎

安平公主下嫁楊思敬

淮南公主下嫁封道言

真定公主下嫁崔恭禮

衡陽公主下嫁阿史那社爾

丹陽公主下嫁薛萬徹萬徹甚公主羞不與同席者數月太宗聞笑為為置酒悉召它婿與萬徹從容
語揮槩賭所佩刀陽不勝遂解賜之主喜命同載以歸

臨海公主下嫁裴律師

館陶公主下嫁崔宣慶

安定公主始封千金下嫁温挺挺死又嫁鄭敬玄

常樂公主下嫁趙瓌生女為周王妃武后殺之逐瓌括州刺史徙壽州越王貞將舉兵遺瓌書假道瓌將
應之主進使者曰為我謝王與其進不與其退若諸王皆丈夫不應掩久至是我聞楊氏寡周尉遲迴乃
周出猶能連突厥使天下響震況諸王國懿親宗社所託不捨生取義尚何須邪人臣同國患為忠不同

爲逆王等勉之王敗周興劾環與主連謀皆被殺

太宗二十一女

襄城公主下嫁蕭銳性孝睦動循矩法帝勅諸公主視爲師式有司告營別第辭曰婦事舅姑如父母異宮則定省闕止葺故第門列雙戟而已銳卒更嫁姜簡永徽二年薨高宗舉哀於命婦朝堂遣工部侍郎巨行淹馳驛弔祭陪葬昭陵喪次故城帝登樓望哭送柩

汝南公主薨

南平公主下嫁王敬直以累斥嶺南更嫁劉玄意

遂安公主下嫁竇達達死又嫁王大禮

長樂公主下嫁長孫冲帝以長孫皇后所生故勅有司裝齋視長公主而倍之魏徵曰昔漢明帝封諸王曰朕子安得同先帝子乎然則長公主者尊公主矣制有等差渠可越也帝以語后后曰嘗聞陛下厚禮禮而未知也今聞其言乃納主於義社稷臣也妾於陛下夫婦之重有所言猶候顏色況臣下情隔禮殊而敢犯嚴顏陳忠言哉願許之與天下爲公帝大悅因請齋帛四匹錢四十萬卽徵家賜之

章公主下嫁唐義誠

北景公主始封巴陵下嫁柴令武坐與房遺愛謀反同主賜死顯慶中追贈立廟於墓四時祭以少牢

晉安公主下嫁史仁表

東陽公主下嫁高履行高宗卽位進爲大長公主章正矩之誅主坐婚家斥徙集州又坐章懷太子累奪邑封以長孫無忌舅族也故武后惡之垂拱中并二子徙置巫州

臨川公主章貴妃所生下嫁周道務主工繕隸能屬文高宗立上孝德頌帝下詔褒答永徽初進長公主恩賞卓異永淳初薨道務殿中大監譙郡公範之子初道務孺祿時以功臣子養宮中範卒還第毀瘠如成人復內之年十四乃得出歷營州都督檢校右驍衛將軍諡曰襄

清河公主名敬字德賢下嫁程懷亮薨麟德時陪葬昭陵懷亮知節子也終靈遠將軍

蘭陵公主名淑字麗貞下嫁竇懷哲薨顯慶時懷哲官兗州都督太穆皇后之族子

晉安公主下嫁韋思安又嫁楊仁輅

安康公主下嫁獨孤謀

新興公主下嫁長孫暉

城陽公主下嫁杜荷坐太子承乾事誅又嫁薛瓘初主之婚帝使卜之繇曰二火皆食始同榮末同戚請

晝昏則吉馬周諫曰朝謁以朝思相戒也講習以晝思相成也燕飲以晷思相歡也婚合以夜思相親也故上下有成內外有親動息有時吉凶有儀今先亂其始不可爲也夫卜所以決疑若黷禮慢先聖人不用帝乃止麟德初權厯左奉宸衛將軍主坐巫蠱斥權房州刺史主從之官咸亨中主薨而權卒雙柩還京師子顯封河東縣侯濟州刺史琅邪王冲起兵顯與弟紹以所部庸調作兵募士且應之冲敗殺都吏以滅口事泄下獄俱死

合浦公主始封高陽下嫁房玄齡子遺愛主帝所愛故禮異它壻主負所愛而驕房遺直以嫡當拜銀青光祿大夫讓弟遺愛帝不許玄齡卒主導遺愛異貲既而反譖之遺直自言帝痛讓主乃免自是稍疏外主怏怏會御史劾盜得浮屠辯機金寶神枕自言主所賜初浮屠廬主之封地會主與遺愛獵見而悅之具帳其廬與之亂更以二女子從遺愛私餉億計至是浮屠殊死殺奴婢十餘主益望帝崩無哀容又浮屠智勗迎占禍福惠弘能視鬼道士李晃高醫皆私侍主使掖廷令陳玄運伺宮省機祥步星次永徽中與遺愛謀反賜死顯慶時追贈

金山公主薨

晉陽公主字明達幼字兜子文德皇后所生未嘗見喜愠色帝有所怒責必伺顏徐辯解故省中多蒙其惠不覺愛后崩時主始孩不之識及五歲經后所游地哀不自勝帝諸子唯晉王及主最少故親畜之王每出閣主送至虔化門泣而別王勝衣班于朝主泣曰兄今與羣臣同列不得在內乎帝亦爲流涕主臨帝飛白書下不能辯薨年十二帝閱三旬不常膳日數十哀因以瘴羸羣臣進勉帝曰朕渠不知悲愛無益而不能已我亦不知其所以然因詔有司簿主湯沐餘貲營佛祠墓側

常山公主未及下嫁薨顯慶時

新城公主晉陽母弟也下嫁長孫詮詮以罪徙嶺州更嫁韋正矩爲奉冕大夫遇主不以禮俄而主暴薨高宗詔三司雜治正矩不能辯伏誅以皇后禮葬昭陵旁

高宗三女

義陽公主蕭淑妃所生下嫁權毅

高安公主義陽母弟也始封宣城下嫁潁州刺史王勗天授中勗爲武后所誅神龍初進冊長公主實封千戶開府置官屬睿宗立增戶千薨開元時玄宗哭於暉政門遣大鴻臚持節赴弔京兆尹攝鴻臚護喪事

太平公主則天皇后所生后愛之傾諸女榮國夫人死后丐主爲道士以幸冥福儀鳳中吐蕃請主下嫁

后不欲棄之夷乃真築宮如方士薰戒以拒和親事久之主衣紫袞玉帶折上巾具紛囂歌舞帝前帝及后大笑曰兒不爲武官何遽爾主曰以賜駙馬可乎帝識其意擇薛紹尙之假萬年縣爲婚館門隘不能容翟車有司毀垣以入自興安門設燎相屬道樾爲枯紹死更嫁武承嗣會承嗣小疾罷婚而殺武攸暨妻以配主主方額廣頤多陰謀后常謂類我而主內與謀外檢畏終后世無它訾永淳之前親王食實戶八百增至千輒止公主不過三百而主獨加戶五千及聖曆時進及三千戶預誅二張功增號鎮國與相王均封五千而薛武二家女皆食實封主與相王衛王成王長寧安樂二公主皆開府置官屬視親王安樂戶至三千長寧二千五百府不置長史宜城定安非韋后所生戶止二千主三子崇簡崇敏崇行皆拜三品韋后上官昭容用事自以謀出主下遠甚憚之主亦自以輒而可勝故益橫於是推進天下士謂儒者多寡狹厚持金帛謝之以動大議遠近翕然嚮之玄宗將誅韋氏主與祕計遣子崇簡從事定將立相王未有以發其端者主顧温王乃兒子可劫以爲功乃入見王曰天下事歸相王此非兒所坐乃掖王下取乘輿服進容宗容宗卽位主權由此震天下加實封至萬戶三子封王餘皆祭酒九卿主每奏事漏數徙乃得退所言皆從有所論薦或自寒穴躡進至侍從旋踵將相朝廷大政事非關決不下聞不朝則宰相就第

善先天子雅量可而已主侍武后久善策人主微指先事逢合無不中田園徧近旬皆上腴吳蜀嶺嶠市作器用州縣護送道相望也天下珍滋譎怪充于家供帳聲伎與天子等侍兒曳紈縠者數百奴伯嫗監千人隴右牧馬至萬匹長安浮屠慧範畜貲千萬諧結權近本善張易之及易之誅或言其豫謀者於是封上庸郡公月給奉稍主乳媪與通奏擢三品御史大夫御史魏傳弓劾其姦賊四十萬請論死中宗欲赦之進曰刑賞國大事陛下賞已妄加矣又欲廢刑天下其謂何帝不得已削銀青階大夫薛謙光劾慧範不法不可貸主爲申理故謙光等反得罪玄宗以太子監國使宋王岐王總禁兵主恚權分乘輦至光範門召宰相白廢太子於是宋璟姚元之不悅請出主東都帝不許詔主居蒲州主失望太子懼奏斥環元之以銷戢怨嫌監察御史慕容珣復劾慧範事帝疑珣離間骨肉貶密州司馬主居外四月太子表追還京師時宰相七人五出主門下又左羽林大將軍常元楷知羽林軍李慈皆私謁主主內忌太子明又宰相皆其黨乃有逆謀先天二年與尙書左僕射竇懷貞侍中岑羲中書令蕭至忠崔湜太子少保薛稷雍州長史李晉右散騎常侍昭文館學士賈膺福鴻臚卿唐駿及元楷慈慧範等謀廢太子使元楷慈舉關林兵入武德殿殺太子懷貞義至忠舉兵南衙爲應既有日矣太子得其姦召岐王薛王兵部尙書郭元振將軍王毛仲殿中少監姜皎中書侍郎王瓌吏部侍郎崔日用定策前一日因毛仲取內閑馬三百

率大僕少卿李令問王守一內侍高力士果殺李守德叩虔化門梟元楷懸於北闕下縛膺福內客省執
轡至忠至朝堂斬之因大赦天下主聞變亡入南山三日不出賜死于第諸子及黨與死者數十人薄其
田賞環珞若山督子貸凡三年不能盡崇簡素知主謀苦諫主怒榜掠尤楚至是復官爵賜氏李始主作
觀池樂游原以爲盛集既敗賜監申岐薛四王都人歲被禳其地

中宗八女

齊都公主下嫁武延暉

宣城公主始封義安郡主下嫁裴巽巽有嬖妹主恚別耳劇鼻且斷髮帝怒斥爲縣主巽左遷久之復
故封神龍元年與長寧新寧義安樂新平五郡主皆進封

定安公主始封新寧郡下嫁王同皎同皎得罪神龍時又嫁韋濯濯卽韋皇后從祖弟以衛尉少卿誅更
嫁大府卿崔銑主薨王同皎子請與父合葬給事中夏侯銛曰主義絕王廟恩成崔室逝者有知同皎將
拒諸泉銑或訴於帝乃止銛坐是貶瀘州都督

長寧公主韋庶人所生下嫁楊慎交造第東都使楊務廉營總第成府財幾竭乃擢務廉將作大匠又取
西京高士廉第左金吾衛故營合爲宅右屬都城左順大道作三重樓以馮觀樂山浚池帝及后數臨幸

置酒臨幸及并坊西墮地廣輿城東都屬永昌縣主宅其治爲府以地湖洛樂朝之崇臺觀相聯屬無
慮費二十萬魏王泰故第東西盡一坊瀦沼三百畝泰薨以與民至是主勾得之亭閣華詭埒西京內倚
母愛寵傾一朝與安樂宣城二主后媚鄰國崇國夫人爭任事賦謁紛紜東都第成不及居韋氏敗斥慎
交絳州別駕主偕往乃請以東都第爲景雲祠而西京第評木石直爲錢二十億萬開元十六年慎交
死主更嫁蘇彥伯務廉卒坐贓數十萬廢終身

承壽公主下嫁韋鐵番薨長安初追贈

承泰公主以郡主下嫁武延基大足中忤張易之爲武后所殺帝追贈以禮改葬號墓爲陵

安樂公主最幼女帝遷房陵而主生解衣以裸之名曰褻兒妹秀辯敏后尤愛之下嫁武崇訓帝復位光
艷動天下侯王柄臣多出其門嘗作詔籍其前請帝署可帝笑從之又請爲皇太女左僕射魏元忠諫不
可主曰元忠山東木強烏足論國事阿武子尙爲天子天子女有不可乎與太平等七公主皆開府而主
府官屬尤濫皆出屠販納訾售官降墨勅斜封授之故號斜封官主營第及安樂佛廬皆憲寫宮省而工
緻過之嘗請昆明池爲私沼帝曰先帝未有以與人者主不悅自鑿定昆池延袤數里定言可抗訂之也
司農卿趙履溫爲繕治累石肖華山墜竹橫邪回淵九折以石澆水又爲寶鑪鑿怪獸神禽間以璪貝珊

瑚不可涯計崇訓死主素與武延秀亂卽嫁之是日假后車輅自宮送至第帝與后爲御安福門臨觀詔雍州長史竇懷貞爲禮會使弘文學士爲賓相王障車捐賜金帛不貲翌日大會羣臣太極殿主被翠服出嚮天子再拜南面拜公卿公卿皆伏地稽首武攸暨與太平公主偁舞爲帝壽賜羣臣帛數十萬帝御承天門大赦因賜民酺三日內外官賜勳緣禮官屬兼階爵奪臨川長公主宅以爲第旁徹民廬怨聲轟然第成禁藏空殫假萬騎仗內音樂送主還第天子親幸宴近臣崇訓子方數歲拜太常卿封鎬國公實封戶五百公主滿孺月帝后復幸第大赦天下時主與長安定安三家廝臺掠民子女爲奴婢左臺侍御史袁從一縛送獄主入訴帝爲手詔喻免從一曰陛下納主訴縱奴騷掠平民何以治天下臣知放奴則免禍劾奴則得罪於主然不忍屈陛下法自偷生也不納臨淄王誅庶人主方覽鏡作眉聞亂走至右延明門兵及斬其首追貶爲悖逆庶人睿宗卽位詔以二品禮葬之趙履溫諂事主嘗褫朝服以頂挽車庶人死蹈舞承天門呼萬歲臨淄王斬之父子同刑百姓疾其興役割取肉去

睿宗十一女

壽昌公主下嫁崔真

安興昭懷公主崔真

荆山公主下嫁薛伯陽

淮陽公主下嫁王承慶

代國公主名華字華婉劉皇后所生下嫁鄭萬鈞

涼國公主字華莊始封仙源下嫁薛伯陽

薛國公主始封清陽下嫁王守一守一誅更嫁裴異

鄆國公主崔貴妃所生三歲而妃薨哭泣不食三日如成人始封荆山下嫁薛儼又嫁鄭孝義開元初封邑至千四百戶

金仙公主始封西城縣主景雲初進封太極元年與玉真公主皆爲道士築觀京師以方士史崇玄爲師崇玄本寒人事太平公主得出入禁中拜鴻臚卿聲勢光重觀始興詔崇玄護作日萬人羣浮屠疾之以錢數十萬賂狂人段謙冒入承天門升太極殿自稱天子有司執之辭曰崇玄使我來詔流嶺南且勅浮屠方士無兩競太平敗崇玄伏誅

玉真公主字持盈始封崇昌縣主俄進號上清玄都大洞三景師天寶三載上言曰先帝許妾捨家今仍

乾隆四年校刊

唐書卷八十二列傳

七

明主策食租賦誠願去公主號罷邑司歸之王府玄宗不許又言妾高宗之孫睿宗之女陛下之女弟於天下不為賤何必名繫主號資湯沐然後為貴請入數百家之產延十年之命帝知主意乃許之薨寶應時

霍國公主下嫁裴虛己

玄宗二十九女

永穆公主下嫁王絳

常芬公主下嫁張去奢

孝昌公主薨

唐昌公主下嫁薛鏞

靈昌公主薨

常山公主下嫁薛譚又嫁賈澤

萬安公主天寶時為道士開元新制長公主封戶二千帝妹戶千率以三丁為限皇子王戶二千主半之左右以為薄帝曰百姓租賦非我有士出萬死賞不過東帛女何功而享多戶邪使知儉嗇不亦可乎於是公主所乘始不給車服後咸宜以母愛益封至千戶諸主皆增自是著于令主不下嫁亦封千戶有司給奴婢如令

上仙公主薨

懷思公主薨葬築臺號登真

晉國公主始封高都下嫁崔惠童貞元元年與衛楚宋齊宿蕭鄧紀郃國九公主同徙封

新昌公主下嫁蕭衡

臨晉公主皇甫淑妃所生下嫁郭潛曜薨大曆時

衛國公主始封建平下嫁豆盧建又嫁楊說薨貞元時

真陽公主下嫁源清又嫁蘇震

信成公主下嫁獨孤明

楚國公主始封壽春下嫁吳澄江上皇居西宮獨主得入侍興元元年請為道士詔可賜名上善

普康公主薨咸通九年追封

昌樂公主高才人所生下嫁寶鏗薨大曆時

乾隆四年校刊 唐書卷八十三列傳

永寧公主下嫁裴齊巳

宋國公主始封平昌下嫁溫西華又嫁楊徽薨元和時

齊國公主始封興信徙封寧親下嫁張垧又嫁裴頴末嫁楊敷薨貞元時

咸宜公主貞順皇后所生下嫁楊洄又嫁崔嵩薨興元時

宜春公主蚤薨

廣寧公主蓋芳儀所生下嫁程昌胤又嫁蘇克貞薨大曆時

萬春公主杜美人所生下嫁楊朮又嫁楊錡薨大曆時

太華公主貞順皇后所生下嫁楊錡薨天寶時

壽光公主下嫁郭液

樂城公主下嫁薛履謙坐嗣岐王珍事誅

新平公主常才人所生幼智敏習知圖訓帝賢之下嫁裴玲又嫁姜慶初慶初得罪主幽禁中薨大曆時

壽安公主曹野那姬所生孕九月而育帝惡之詔衣羽人服代宗以廣平王入謁帝呼主曰蟲娘汝後

可與名王在靈州請封下嫁蘇發

肅宗七女

宿國公主始封長樂下嫁豆盧湛

蕭國公主始封寧國下嫁鄭異又嫁薛康衡乾元元年降回紇英武威遠可汗乃置府二年還朝貞元中

讓府屬更置邑司

和政公主章敬太后所生生三歲后崩養于韋妃性敏惠事妃有孝稱下嫁柳潭安祿山陷京師寧國公

主方整居主棄三子奪潭馬以載寧國身與潭步日百里潭躬水薪主躬爨以奉寧國初潭兄澄之妻楊

貴妃姊也勢幸傾朝公主未嘗干以私及死撫其子如所生從玄宗至蜀始封遷潭駙馬都尉郭干仍反

玄宗御立英樓諭降之不聽潭率折衝張義童等殊死鬪主毅弓授潭潭手斬賊五十級平之肅宗有疾

主侍左右勤勞詔賜田以女弟寶章主未有賜固讓不敢當阿布思之妻隸掖廷帝宴使衣綠衣爲倡主

諫曰布思誠逆人妻不容近至尊無罪不可與羣倡處帝爲免出之自兵興財用耗主以貿易取奇贏千

萬濟軍及帝山陵又進邑入千萬代宗初立屢陳人間利病國家盛衰事天子鄉納吐蕃犯京師主避地

南奔次商於遇羣盜主諭以禍福皆稽顙願爲奴代宗以主貧詔諸節度餉億主一不取親紉綻裳衣諸

子不服執絺廣德時吐蕃再入寇主方姪入語備邊計譚固止主曰君獨無兄乎入見內殿翌日免乳而

薨

鄴國公主始封大寧下嫁張清薨貞元時

紀國公主始封宜寧下嫁鄭沛薨元和時

永和公主韋妃所生始封寶章下嫁王詮薨大曆時

郾國公主始封延光下嫁裴徽又嫁蕭升升卒主與彭州司馬李萬亂而蜀州別駕蕭鼎濠陽令韋憚太子詹事李昇皆私侍主家久之姦聞德宗怒幽主宅第杖殺萬斤鼎憚昇領表貞元四年又以厭蠱廢六年薨子位坐以蠱祝囚端州佩儒僊囚房州前生子駙馬都尉裴液囚錦州主女為皇太子妃帝畏妃怨望將殺之未發會主薨太子屬疾乃殺妃以厭災諡曰惠

代宗十八女

靈仙公主蚤薨追封

真定公主蚤薨追封

永清公主下嫁裴倣

齊國昭懿公主崔貴妃所生始封升平下嫁郭曖大曆末寘內民訴涇水為磴壅不得溉田京兆尹黎幹以請詔撤壅以水與民時主及驪家皆有磴名留帝曰吾為蒼生若可為諸戚借即日毀由是廢者八十

所憲宗即位獻女伎帝曰太上皇不受獻朕何敢違還之薨元和時贈號國賜諡穆宗立復贈封

華陽公主貞懿皇后所生韶悟過人帝愛之視帝所喜必善遇所惡曲全之大曆七年以病勺為道士號瓊華真人病甚嚙帝指傷薨追封

玉清公主蚤薨追封

嘉豐公主下嫁高怡與普寧公主同降有司具冊禮光順門以雨不克罷薨建中時

長林公主下嫁衛尉少卿沈明貞元二年具冊禮德宗不御正殿不設樂遂為故事薨元和時

太和公主蚤薨追封

趙國莊懿公主始封武清貞元元年徙封嘉誠下嫁魏博節度使田緒德宗幸望春亭臨餞厭翟不可乘以金銀代之公主出降乘金根車自主始薨元和時贈封及諡

玉虛公主蚤薨

普寧公主下嫁吳士廣

晉陽公主下嫁太常少卿裴液薨太和時

乾隆四年校刊

唐書卷八十三列傳

義清公主下嫁祕書少監柳昇

壽昌公主下嫁光祿少卿竇克良薨貞元時

新都公主貞元十二年下嫁田華具禮光順門五禮由是廢

西平公主蚤薨

章靈公主蚤薨

德宗十一女

韓國貞穆公主昭德皇后所生幼謹孝帝愛之始封唐安將下嫁祕書少監韋宥未克而朱泚亂從至城

固薨加封諡

魏國憲穆公主始封義陽下嫁王士平主恣橫不法帝幽之禁中錮士平于第久之拜安州刺史坐交中
人貶賀州司戶參軍門下客蔡南史獨孤申叔爲主作團雪散雪辭狀離曠意帝聞怒捕南史等逐之幾
廢進士科薨追封及諡

鄭國莊穆公主始封義章下嫁張孝忠子茂宗薨加贈及諡

臨真公主下嫁祕書少監薛釗薨元和時

永陽公主下嫁殿中少監崔謹

普寧公主蚤薨

文安公主句爲道士薨太和時

燕國襄穆公主始封咸安下降回紇武義成功可汗置府薨元和時追封及諡

義川公主蚤薨

宜都公主下嫁殿中少監柳昱薨貞元時

晉平公主蚤薨

順宗十一女

漢陽公主名暢莊憲皇后所生始封德陽郡主下嫁郭縱辭歸第涕泣不自勝德宗曰兒有不足邪對曰
思相離無它恨也帝亦泣顧太子曰真而子也永貞元年與諸公主皆進封時戚近爭爲奢詭事主獨以
儉常用鐵簪畫壁記田租所入文宗尤惡世流侈因主入問曰姑所服何年法也今之弊何代而然對曰
妾自貞元時辭宮所服皆當時賜未嘗敢變元和後數用兵悉出禁藏織麗物賞戰士由是散於人間內
外相矜狃以成風若陛下示所好于下誰敢不變帝悅詔宮人視主衣製廣狹徧諭諸主且勅京兆尹禁

切浮靡主嘗誨諸女曰先姑有言吾與若皆帝子驕盈貴侈可戒不可恃開成五年薨

梁國恭靖公主與漢陽同生始封咸寧郡主徙普安下嫁鄭何薨追封及諡

東陽公主始封信安郡主下嫁崔杞

西河公主始封武陵郡主下嫁沈暉薨咸通時

雲安公主亦漢陽同生下嫁劉士涇

襄陽公主始封晉康縣主下嫁張孝忠子克禮主縱恣常微行市里有薛樞薛渾李元本皆得私侍而渾尤愛至謁渾母如姑有司欲致詰多與金使不得發克禮以聞穆宗幽主禁中元本乃功臣惟簡子故貸死流象州樞渾崖州

潯陽公主崔昭儀所生太和三年與平恩邵陽二公主並為道士歲賜封物七百疋

臨汝公主崔昭訓所生番薨

虢國公主始封清源郡主徙陽安下嫁王承系薨追封

平恩公主番薨

邵陽公主番薨

憲宗十八女

梁國惠康公主始封普寧帝特愛之下嫁于季友元和中徙永昌薨詔追封及諡將葬度支奏義陽義章公主葬用錢四十萬有詔減千萬

永嘉公主為道士

衡陽公主番薨

宣城公主下嫁沈熾

鄭國溫儀公主始封汾陽下嫁韋讓薨追封及諡

岐陽莊淑公主懿安皇后所生下嫁杜悰帝為御正殿臨遣繇西朝堂出復御延喜門止主車大賜賓從金錢開第昌化里疏龍首池為沼后家上尚父大通里亭為主別館賞震當世然主事舅姑以禮聞所賜奴婢偃蹇皆上還匄直自市悰為澧州刺史主與偕從者不二十婢乘驢不肉食州縣供具拒不受姑寢疾主不解衣藥糜不嘗不進開成中悰自忠武入朝主寢疾曰願朝興慶宮雖死於道不恨道薨

陳留公主下嫁裴損損為太子諭德

真寧公主下嫁薛翊

乾隆四年校刊

唐書卷八十三列傳

十二

南康公主下嫁沈汾薨咸通時

臨真公主始封襄城下嫁衛洙薨咸通時

普康公主蚤薨

真源公主始封安陵下嫁杜中立

承順公主下嫁劉弘景

安平公主下嫁劉異宣宗卽位宰相以異爲平盧節度使帝曰朕唯一妹欲時見之乃止後隨異居外歲時輒乘驛入朝薨乾符時

永安公主長慶初許下嫁回鶻保義可汗會可汗死止不行太和中句爲道士詔賜邑卽如尋陽公主故事且歸婚贊

義寧公主未及下嫁薨

定安公主始封太和下嫁回鶻崇德可汗會昌三年來歸詔宗正卿李仍叔祕書監李踐方等告景陵主次太原詔使勞問係塗以黯憂斯所獻白貂皮玉指環往賜至京師詔百官迎謁再拜故事邑司官承命答拜有司議邑司官卑不可當羣臣請以主左右上膝戴鬢帛承拜兩禮持命又詔神策軍四百具鹵簿

羣臣班班主乘輅謁憲穆二室歔歔流涕退詣光順門易服褫冠鑲符罪自言和親無狀帝使中人勞慰復冠鑲乃入羣臣賀天子又詣興慶宮明日主謁太皇太后進封長公主遂廢太和府主始至宣城以下七主不出迎武宗怒差奪封絹贖罪宰相建言禮始中壺行天下王化之美也請載于史示後世詔可貴鄉公主蚤薨

穆宗八女

義豐公主武貴妃所生下嫁韋處仁薨咸通時

淮陽公主張昭儀所生下嫁柳正元

延安公主下嫁竇滌

金堂公主始封晉陵下嫁郭仲恭薨乾符時

清源公主薨太和時

饒陽公主下嫁郭仲詞

義昌公主爲道士薨咸通時

安康公主爲道士乾符四年以主在外頗擾人詔與承興天長靈國興唐四主還南內

乾隆四年校刊

唐書卷八十三列傳

敬宗三女

永興公主

天長公主

靈國公主薨廣明時

文宗四女

興唐公主

百平公主

朗靈公主薨咸通時

光化公主薨廣明時

武宗七女

昌樂公主

壽春公主

長靈公主薨大中時

延慶公主

靜樂公主薨咸通時

樂溫公主

永清公主薨咸通時

宣宗十一女

萬壽公主下嫁鄭顯主帝所愛前此下詔先王制禮貴賤共之萬壽公主奉舅姑宜從士人法舊制車輿以鏤金鈿飾帝曰我以儉率天下宜自近始易以銅主每進見帝必諄勉篤誨曰無鄙夫家無干時事又曰太平安樂之禍不可不戒故諸主祇畏爭為可喜事帝遂詔夫婦教化之端其公主縣主有子而寡不得復嫁

永福公主

齊國恭懷公主始封西華下嫁嚴祁祁為刑部侍郎主薨大中時追贈及諡

廣德公主下嫁于琮初琮尚永福公主主與帝食怒折七筯帝曰此可為士人妻乎更許琮尚主琮為黃巢所害主泣曰今日誰不獨存賊宜殺我巢不許乃縊室中主治家有禮法嘗從琮貶韶州侍者纒數人

鄒州縣饋遺凡內外冠婚喪祭主皆身答勞疏戚咸得其心爲世聞婦

義和公主

饒安公主

盛唐公主

平原公主薨咸通時已而追封

唐陽公主

許昌莊肅公主下嫁柳涉薨中和時

豐陽公主

懿宗八女

衛國文懿公主郭淑妃所生始封同昌下嫁韋保衡咸通十年薨帝既素所愛自製挽歌羣臣畢和又許百官祭以金貝寓車廐服火之民爭取煨以汰寶及葬帝與妃坐延興門哭以過柩仗衛彌數十里冶金爲俑怪寶于計寶墓中與乳保同葬追封及諡

安化公主

普康公主

昌元公主薨咸通時

昌寧公主

金華公主

仁壽公主

永壽公主

僖宗二女

唐興公主

永平公主

昭宗十一女

新安公主

平原公主積善皇后所生帝在鳳翔以主下嫁李茂貞子繼偁后謂不可帝曰不爾我無安所是日宴內殿茂貞坐帝東南主拜殿上繼偁族兄弟皆西向立主徧拜之及帝還朱全忠移茂貞書取主還京師

乾隆四年校刊

唐書卷八十三列傳

信都公主

益昌公主

唐興公主

德清公主

太康公主

永明公主蚤薨

新興公主

普安公主

樂平公主

贊曰婦人內夫家雖天姬之貴史官猶外而不詳又僖昭之亂典策埃滅故諸帝公主降日薨年粗得其槩亡者闕而不書

唐書卷八十三

考證

廣靈公主傳下嫁程昌胤○后妃傳中作程昌裔

韓國貞穆公主傳○舊書德宗紀作莊穆

潯陽公主傳太和三年與平恩邵陽二公主並為道士○太和疑作元和

唐書卷八十三考證

十四

